

DIŽA' GÜEN DAN' BZOJ SAN LUCAS

Da' nga bzoj Lucasen' par Teófilo

¹⁻⁴ Teófilo, naco' bene' zaca' na' chzoja' le' diža' quinga cont nezdo' da' li ca nac da' ba bosozejni'ide' le' che da' ca' ba gosac. Bene' zan bach bosozoje' che Jesúsena', gosoe diža' che da' ca' bene', con can' bosozejni'i bene' ca' neto', bene' ca' besele'ede' can' gwzolaon cate' goljte Jesúsena'. Na' bene' ca' gosende' na' besele'ede' can' goquen' bososed bosolo'ede' bene' yoble diža' güen che'. Na' neda' cate' beyož gwnabyoža' can' goquen' na' gwyazlaža' gwzojan' tcho'a cont nezdo', Teófilo.

To angl gwdixjue'ede' galje Juan

⁵ Ca tiemp caten' gwnabia' rey Herodes distritw gana' nzi' Judea, na' gwzoa to bxož che bene' Israel ca' bene' le Zacarías. Bene' žin len to xonj bxož bene' zjale Abías. Na' no'ol che Zacarías le Elisabet, na' naque' diaža che da' bxož Aarón.

⁶ Na' Zacarías len Elisabeten' zja'accze' to licha len Diosen' na' gosonyane' yogo'lol da' non Xancho Diosen' mandadw da'na' nyoj le'e ley che'na'. ⁷ Na' nono xi'ingaque' nita' neche Elisabeten' naque' no'ol güiž. Na' chopte' ba zjanaque' bene' gole.

⁸ Na' goquen' beyala' Zacaríasena' len bene' lježe' ca' bene' ca' zjanaque' bxož cont yesone' da'na' besyeyale' yesone' yesonexene' Dios. ⁹ Na' bxož ca' yogo' ni'a chesone' rifa cont chata'bia'

noe' choj gwzeye' yal lo' yodao' blao chegaque' gan' chesonxene' Xancho Diosen'. Na' bchoj Zacaríasen' caten' gosone' rifan' bzeye' yala' lo' yodao'na'. ¹⁰ Na' šlac bzeye' yala' gosenita' yogo'lo_l bene' zan ca' chyo'ole bosol_l güiže' Diosen'. ¹¹ Na' to angl bene' gwsela' Xancho Dios blo'elagüe' Zacaríasen', na' gwzecha angla' cuit mesa' lichale gan' chosozeye' yala'. ¹² Na' cate' ble'e Zacaríasen' anglen', benit bechol_l lo' yichjlažda'ogüe' na' bžebchgüe'. ¹³ Perw anglen' gože' le':

—Bitw žebo' Zacarías. Diosa' ba bzenague' che dan' gwṇabdo'ne', na' no'ol chio' Elisabeten' sane' to xi'ino', na' gwsio'be' Juan. ¹⁴ Na' so' mbalaz na' yebedo' na' lecze bene' zan yesyebede' še ba goljbe'. ¹⁵ Gache' to bene' blao lao Diosen'. Bitw ye'ejbe' vino ne bichle da' chzože bene'. Na' cate' za' galjtebe' ba yo'o Spiritw che Diosa' lo' yichjlažda'obe' nabi'an lebe'. ¹⁶ Na' gombe' cont zan bene' Israel ca' yosoša' yichjlažda'ogüe' na' yesonxene' Xancho Diosen' can' cheyała' yesonxene' le'. ¹⁷ Na' cuialaobe' lao Xancho'n', na' soa Spiritw che Diosen' len lebe' can' gwzoan len da' Elíasen', na' lecza ca' yela' guac che Diosen'. Na' bene' ca' bi nita' binlo len xi'ine' ca', gombe' ga yesenite' binlo len legacbe', na' bene' güedenag ca' gombe' yosozenague' che Diosen'. Gombe' cont yesenita' bene' yesonxene' Xancho'n' cate' yide'.

¹⁸ Nach Zacaríasen' gože' anglen':

—¿Nac gac nežda' da' nga? Neda' naca' bene' gole na' lecza ca' no'ol chian' ba naque' bene' gole.

¹⁹ Nach anglen' gože' le':

—Neda' naca' angl Gabriel bene' za' yaba. Zoa' len Diosen' na' chonxena'ne', na' gwsele' neda' zedetixjue'eda' le' diža' güen qui. ²⁰ Le' bi gac nio' na'a, le bi chejli'o xtiža' nga. Cate' žin ža gac da' nga, cana' gac yeñio' da' yoble. Na' da' li gwžin ža gac can' gwnia'.

²¹ Na' bene' ca' že' chyo'ole chesebeze' Zacaríasen' besyebande' da' gwžede' lo' yodao' blaona'. ²² Na' cate' bechoj Zacaríasen', bene' señw len ne'e da' bi goc ñie'. Nach gosacbe'e bene' ca' ble'ebande' lo' yodao'na'.

²³ Na' cate' beyož bdelaze' dan' bene' žin lo' yodao'na', beyej liže'. ²⁴ Gwde na' no'ol che' Elisabeten' gwchendao' bidaon' lo' le'e. Na' gayo' bio' gwzoaze'. ²⁵ Na' gwne':

—Güenchguan' ba ben Xancho Diosen' len neda'. Ba bžin ža beži'ilaže'de' neda', cont bich yeson beñacha' xbab bibi zaca'.

To angl gwduxjue'ede' galje Jesucriston'

²⁶ Goc xop bio' noa' Elisabeten' bidaon', Diosen' besele' anglen' ben' le Gabriel, gwyeje' to yež da'na' nzi' Nazaret gan' mbane distritw Galilea. ²⁷ Gwsele' le' gan' zoa to no'ol güego' le' María. Na' Marían' napši'ichgua cuine'. Na' to bene' le' José bach naquen gwšagna'lene' le' cont gaque' xo'ole'. Na' Joséna' naque' diaža che rey David ben' gwzoa cani'. ²⁸ Na' bžin to angl bene' za' yaban' gwyo'e gan' zoa María na' gože'ne':

—Patiox. Xancho Diosen' nži'ide' le' na' zoe' len le'. Na' gone' cont so' mbalazch ca yogo'lo' no'ole yezica'chle.

²⁹ Cate' ble'e Marían' anglen', bebanchgüede' ca nac dižan' dan' gože' le'. Na' bene' xbab bi zejen dan' gwne' caten' bguape'ne' tiox. ³⁰ Na' anglen' gože'ne':

—Bitw žebo' María, Diosen' nži'ide' le'. ³¹ Na'a gua' xi'ino' to bi' byo dao', na' sano'be', na' go'o labe' Jesús. ³² Na' Jesús'en' gague' to bene' blao na' beñachen' yososi'ene' Xi'in Dios, Dios ben' naque' la'zelagüe bene' blao. Na' Xancho Diosen' gone' cont nabi'e nación Israel chele ca gwnabia' da xoxxta'ogüe' rey David. ³³ Na' le' nabi'e nación Israelen' toli tocañe, na' gwbat te yela' gwnabia' chen'.

³⁴ Nach gož Marían' angla':

—¿Nacxe gac sana' bdaon'? Bitw nžaga' bene' byo.

³⁵ Nach gož angla' le':

—Spiritw che Diosen' yiden gana' zo'na', na' yela' guac che Diosa' soan len le', Dios ben' naque' la'zelagüe bene' blao. Da'nan' bidaon' za' galje gacbe' laždao' xilaže' na' yososi'ebe' Xi'in Dios. ³⁶ Na' bene' xna'o Elisabeten' lecze bač gwchen-dao' bidao' lo' le'e la'czla' ba naque' bene' gole. Ba goc xop bio' no'e to bi' byo dao', len gosene' naque' no'ole güiž. ³⁷ Bibi de da' nacho da' cbi gac gon Dios.

³⁸ Nach gož Marían' anglen':

—Ni zoa' naca' xmos Xana' Diosen'. Gacšca chia' con can' ba gwnao'.

Nach beza' anglen' gan' zoa Marían'.

Marían' jane'e Elisabeten'

³⁹ Gwde na' la' gwyejte Marían' to yež da' žia to lo ya'a gan' mbane distritw Judean', ⁴⁰ na' bžine' liž Zacaríasen'. Na' gwyo'e bguape' Elisabeten' tiox.

41 Na' cate' Elisabeten' bende' chol güiž Marían' le', nach goche'ede' chxite' chžia bidaon' lo' le'e. Na' Spiritw che Diosen' gwnabian' yichjlaždao' Elisabeten' 42 na' gwne' zižje da' bebecgüede', gože' Marían':

—Zo' mbalazch ca yogo'lol no'ole yezica'chle. Na' lecze bidaon' no'ona' soabe' mbalaz. 43 Chebanda' le' naco' xna' Xana' zedena'o neda'. 44 Con cate' benda' chguapo' neda' tiox, bidao' chian' lecze bebebe', bxite' bžiabe' lo' lian'. 45 Zo' mbalaz da' gwyejli'o gac can' gwna xtiža' Diosen' dan' gož anglen' le'.

46 Nach Marían' gwne':

Chonxena' Xancho Diosen' do yichj do laža'.

47 Na' do yichj do laža' chebecgüeda' Dios ben' bebeje' neda' lo da' malen'.

48 Ba beyaše'de' neda' naca' xmose' la'czla' bibi zaca'.

Na' na'a bene' yesenita' toli tocañe yesene' neda' zoa' mbalaz.

49 Dios ben' chac chon da' nono gac gon ba bene' da' güen juisyw len neda'.

Toz len' naque' bene' laždao' xilaže' juisyw.

50 Na' note'teze bene' chesape' le' bala'an do yichj do laže', Diosen' cheži'ilaže'de' legaque'.

Cheži'ilaže'de' bene' že' na'a na' yeži'ilaže'de' xi'in diaža chegaque' ca'.

51 Baç blo'e Diosen' beñaçhen' yela' guac che'.

Na' ba bolague' bene' ya'laže' ca'.

52 Ba bene' cont bene' gwnabia' ca' bich yesenabi'e.

Na' bene' bi naque' bene' blao, Diosen' ba bnežjue' latje yesaque' bene' blao.

53 Na' be_{ne}' chesedon, Diosen' ba bnežjue' lega_{que}'
da' zan da' güen.

Na' be_{ne}' gw_{ni}'a ca', ba bose'e lega_{que}', bibi
bonežjue' lega_{que}'.

54 Nach ba goclene' chio' be_{ne}' Israel naccho ca
xmose'.

Ba blo'ede' bitw ganlaže' chio', san ba cheyaše'
cheži'ilaže'de' chio'.

55 Ba bene' can' gože' da' Abraham len yezica'chle
da' xozxta'ocho.

Na' soacze' yeyaše' yeži'ilaže'de' xi'in diaža che da'
Abrahanna' toli tocanē.

56 Na' cate' ba goc šone bio' zoa Marían' len
Elisabeten', nach Marían' beyej liže'.

Golje Juan be_{ne}' bzo_e' be_{ne}' nis

57 Na' cate' bžin ža san Elisabeten', gwzane'
bi' byo dao'. 58 Na' cate' goseneze be_{ne}' gualič
chegaquen' na' diaža chegaquen' Xancho Diosen'
ba beyaše' beži'ilaže'de' Elisabeten', nach besye-
bechgüede' len le'. 59 Na' goc xono' ža goljbe' na'
jasezoe'be' señw dan' že' circuncisión can' gosone'
len yogo' bi' byo dao' bi' gosaljbe' lo diaža che da'
Abraham. Na' gosaclaže' si' labe' Zacarías can' le
xaben', 60 perw xna'be' gwne':

—Bi gac. Cheyała' si'be' Juan.

61 Na' lega_{que}' gose'ene':

—Notno diaža chele nita' be_{ne}' zjale ca', neca
xozxta'ole.

62 Na' gosone' señw gosenabde' xaben' nac
che'nde' si' labe'. 63 Nach bene' señw gw_nabe'
to yagla' dao' da' bzoje': “Si' labe' Juan.” Na'
yogüe' besyebande'. 64 Beyož bzoje' da'na', la'
gocte be_{nie}', nach la' gwzolaote be'e diža' benxene'

Diosen'. ⁶⁵ Na' besyebane bene' gualiz̄ chegaquen'. Na' xtiža' gaquen' gos gwłaljen doxen yež ca' zjachi' lo ya'ana' gan' mbane distritw Judean'. ⁶⁶ Na' yogo'lol̄ bene' gosende' dižan' gosone' xbab lo' yichjlažda'ogüe' che da' ca', na' gosene':

—¿Bixe gon bdao'na'?

Gosene' ca' le gosenezde' zoacze Xancho Diosen' len lebe'.

Diža' da' be' Zacarías

⁶⁷ Nach gwnabia' Spiritw che Diosen' yichjlaždao' Zacaríasen', nach be'e xtiža' Diosen', gwne':

⁶⁸ Chonxena' Xancho Dios ben' chonxen chio' bene' Israēl.

Cheyaše' cheži'ilaže'de' chio' naccho nación che' na' ba chsele' bene' yebej chio' lo da' malen'.

⁶⁹ Na' bena' bač za' cont yebej chio' lo da' malen', naque' bene' gwnabia' gual,

na' naque' xi'in diaža che da' rey David ben' goc xmos Diosen'.

⁷⁰ Chac can' gwna Diosen' len cho'a da' bene' ca' gwsele' cani', bene' gosac lo ne'e gosoe' xtižen'.

⁷¹ Ba za' ben' gwne' yosle' chio' lo na' yogo' bene' chesegue'e chio'.

⁷² Chac can' gože' da' xozxta'ocho ca' yeyaše' yeži'ilaže'de' legaque'.

Bi chanlaže', san chone' yogo' da' ba gwne' gone' gaclene' chio'.

⁷³ Diosen' chone' can' gwlo'e da' bałi lao da' xozxta'ocho da' Abraham gože'ne' gaccze can' gwnen'.

74-75 Gwne' yosle' chio' lo na' be_{ne}' chesegue'ede' chio'.

Nach gac lažda'ochon' xilaže' lao le' na' gonxenchone' sin cbi žebcho,
na' šejcho licha gonxenchone' šlac de yela' mban checho.

76 Nach Zacaríasen' gože' bdao' c_{hen}':

Bdao' c_{hia}', be_{nach} yesene' c_{hio}' naco' be_{ne}' choe' xtiža' Dios, Dios ben' naque' la'zelagüe be_{ne}' blao.

Yesene' ca' da' cuialaguo' lao Xanchon' na' go'o xtižen' cont nita' be_{ne}' yosozenague' c_{he}' cate' yide'.

77 Gwsed gwlo'edo' neto' can' chaclaže' Diosa' yebeje' chio' naccho nación c_{he}' lo da' mala' na' yezi'xene' xtolā'chon'.

78 Diosen' cheyaše' cheži'ilaže'de' chio',

le len' gwlo'e be'ni' c_{he}' lo' laždao' chio' be_{nach}.

79 Cue'e be'ni' c_{he}' lo' yichjlaždao' chio' naccho ca be_{ne}' chaš ga nac c_{hol}, chio' chžebcho gatcho.

Na' gwzejni'ide' chio' be_{nach} naquen' soa cuezcho yežlio nga.

Can' be' Zacaríasen' xtiža' Diosen'.

80 Na' Juanna' zej chcha'obe' zejte chac yichjlažda'oben' can' chazlaže' Diosen'. Na' jasoe' latje daš. Na'ate zoe' cate' gwzologüe' gwduxjue'ede' xtiža' Diosen' len be_{ne}' Israel ca'.

2

Caten' golje Jesúsen'
(Mt. 1:18-25)

¹ Na' ľecz ťlac gwnabia' rey César Augusto, bene' mandadw gwyas to censo cont ńezde' baľ bene' že' to to yež da' zjachi' doxen yežlio gan' chnabi'e. ² Na' ľecz cana' Cirenio naque' gobernador gan' nzi' Siria. Na' naquen da' nechw bcheľe' baľ bene' že' to to yež. ³ Na' yogo'loľ bene' jaya'aque' lažgaque' jasyede cuent cuine' cont bosochele' ľe'. ⁴ Na' José naque' diaža che da' rey David. Da'nan' beze'e Nazaret gan' mbane distritw Galilea, beyeje' yež Belén dan' nac laž da' rey David. Na' chi' yež Belén gan' mbane distritw Judea. ⁵ Beyeje' jayde cuine' cuent na' zenche'e no'ol che' Marían' perw biņa' yeseca'a ľježe'. Na' Marían' ba no'e bdao'. ⁶ Na' ťlac nite' Belén bžin ža sane'. ⁷ Na' gwxane' bi' nechw, to bi' byo dao', na' btobe'be' lache' na' gwlo'ebe' ga chesagw beyixe', da' bich bi latje yo'o mesónna' par ľegaque'.

Angl ca' bosozende' bene' güeyoe xila' ba golje Jesúsen'

⁸ Na' že'na' yixe' che yež Belén na'ate že' bene' güeyoe xila' chesape' xila' chen'. ⁹ Na' to angl bene' gwsela' Xancho Diosen' bžine' gan' nita' bene' güeyoe xila' ca', na' be'ni' che Xancho Diosa' gwyečhjen bsenin' gan' nite'na'. Na' besežebchgüe'. ¹⁰ Na' gož angla' ľegaque':

—Bitw žeble. Na'a chixjue'eda' le'e to diža' güen da' yesebechgüe yogo'loľ bene'. ¹¹ Na'aža lo yež che rey David ba golje bena' gac yebeje' benachen' lo da' mal. Naque' Cristo, na' zeje diža' naque' ben' gwsela' Dios cont nabi'e, na' ľecze naque' Xancho. ¹² Cont yeželele bdao'na', quinga naquen: bdao'na'

ba ntobe'be' lache' na' debe' gan' chesagw beyix̄e' ca'.

¹³ Beyož gwna angla' ca' la' besežinte bene' zan angl gan' zoa angl nechua', za'aque' gan' zoa Diosen'. Na' chesonxene' Diosen' chesene':

¹⁴ ¡Chonxencho Diosa' ben' zoa yaba,

na' lo yežlio yesezoa yesebez benachen' binlo, con bena' cheson can' chazlaže' Diosen'.

¹⁵ Na' cate' besyeya'ac angl ca' zjaya'aque' yaba, na' bene' güeyoe xila' ca' gose' lježe':

—Yeyejcho Belén šjayna'cho dan' ba goc can' nac dan' gwsela' Xanchon' angl quinga bedesedixjue'ede' chio'.

¹⁶ Na' beseya'aces bene' güeyoe xila' ca' jaya'aque' Belén. Na' besyeželde' Marían' len Josén' na' len bdao'na'. Na' bdao'na' debe' gan' chesagw beyix̄e' ca'. ¹⁷ Beyož besele'ede' can' ba goquen, na' goso'e diža' che bdao'na' len bene' ca' yezica'chle ca' nac dan' gož anglen' legaque'. ¹⁸ Na' yogo'lol bene' ca' gosende' diža' dan' gosoe' bene' güeyoe xila' ca' besyebande'. ¹⁹ Na' lecze Marían' gwlo'o yichje' yogo'lol diža' dan' gosoe' bene' güeyoe xila' ca' na' bene' xbab lo' yichjlažda'ogüe' bi zejen. ²⁰ Nach besyeya'ac bene' güeyoe xila' ca' chesonxene' Diosen'. Na' cheso'e diža' nacchgua Diosen' bene' güen da' ba goc yogo'lol da' ba gosende' na' besele'ede' dan' gož anglen' legaque'.

Diaža che Jesúsen' jasesane'be' lo' yodao' blaona'

²¹ Cate' goc xono' ža golje bdao'na' jasezoe'be' señw da'na' nzi' circuncisión, na' bososi'e labe' Jesús, can' ben anglen' mandadw cate' za' gua' Marían' lebe'.

22 Na' cate' gwde ba beyac Marían' xilaže' len bdao'na' con can' bzoj da' Moisésen', nach ja'aque' ciuda Jerusalén goselene'be' jasesane'be' lao Xancho Diosen'. 23 Gosone' can' nyoj ley che' dan' ža: “Yogo' bi' byo dao' bi' nechw cheyała' gacbe' lo na' Dios.” 24 Nach gosonxene' Diosen', gosone' can' ža ley che Xancho Dios dan' žan: “Cheyała' gotle chop ngolbex o chope plomxtil.”

25 Na' Jerusalénna' gwzoa to bene' le' Simeón. Benan' gwyejcz'e' bene' da' güen lao Diosen' na' benxene' le', na' gwleze' batcan' yid Cristo ben' selä' Xancho Diosen' cont yebeje' bene' Israel ca' lo da' mal. Na' Spiritw che Diosen' gwyo'on lo' yichjlaždao' Simeón, 26 na' bzejni'in le' bi gate' še biña' le'ede' Criston'. 27 Na' Spiriton' benen cont gwyeje' yodao' blaona', na' zoe' yodao'na' cate' besežin xaxña' Jesús'en' zjano'ebe' cont yesone' len lebe' can' non ley chegaquen' mandadw. 28 Nach Simeónna' gwlene'be' nach benxene' Diosen', gože'ne':

29 Xana' Dios, bačh goc can' gwnaon'.

Ben latje yeyeda' binlo gana' zo'na', neda' naca' xmoso'.

30 Ba ble'eda' bena' zedyelej neto' lo da' mal.

31 Naque' bene' gwnalažo' gwselo' neche yogo'lol benačh.

32 Na' cue'e be'ni' che' lo' yichjlaždao' bene' cbi zjanaque' bene' Israel.

Na' gaque' la'zelagüe bene' zaca' len neto' bene' Israel.

33 Nach xaben' len xña'ben' besyebande' ca diža' chebe' dan' be' Simeónna'. 34 Na' Simeónna'

gwnabde' Diosen' cont gac güen čhegaque'. Na' gože' Marían':

—Beñe' Israel ca' yesejnilaže' xi'ino' nga yesenite' mbalaz, na' beñe' Israel ca' cbi yesejnilaže'ne' bi yesenite' mbalaz. Zedelo'ede' benachen' can' chaclaže' Diosen' goncho, perw zane' bi yesejle'e che'. ³⁵ Nach Diosen' gwlo'e non' chzenag che' na' non' cbi chzenag. Na' cacze chac ga chaz cwšiyw gac lo' yichjlažda'oguoñ' catequen' žaglaguo' len da' gac che'.

³⁶ Na' lecze yodao' blaona' gwzoa to no'ole le Ana, na' cho'e xtiža' Diosen'. Naque' xi'in da' ben' le' Fanuel na' naque' diaža che da' Aser. Bšagne'e cate' naque' no'ol güego', perw na' gaž izga gwzoalene' beñe' che' na' gote', na' bga'ane' güezebe. Na' Anan' ba naque' to beñe' gole, ³⁷ taplalj tap izde'. Bicze chechoje' yodao' blaona'. Leca chonxene' Xancho Diosen' do ža do yel, gwzoatie' tgüje bene' gwbas na' con gwzoachgüe' bol güiže' Diosen'. ³⁸ Na' goquen' gwbiga' Anan' gan' zoa Josén' len Marían' lo' yodao'na' na' be'e yela' choxcen che Diosen' bač gwsele' Jesúsén'. Na' be'e diža' che Jesúsén' len yogo' beñe' ca' že' Jerusalén ben' chesebeze' batca' sela' Diosen' ben' yebeje' legaque' lo da' malen'.

Jaya'aque' Nazaret

³⁹ Nach Josén' len Marían' cate' beyož gosone' yogo'lol dan' non ley che Xancho Diosen' mandadw yesone', jaya'ac lažgaque' Nazaret gan' mbane distritw Galilea. ⁴⁰ Na' Jesúsén' zej chcha'ogüe' na' zej chchachlaže'. Na' ca' zej chcha'ogüe' na' zej chejni'ichde', na' Diosen' nži'ilaže'de'ne'.

Can' ben Jesúsen' chašil yodao' blaona'

⁴¹⁻⁴² Na' xaxne'e ca' yogüiz chja'aque' lni da' chala' Jerusalén chjaseze'ede' can' goc cate' Diosen' betue' bi' nechw che yogo' bene' Egipto na' bosle' bene' Israel. Šižinw ize Jesúsen' cate' goseche' xaxne'en le' ja'aque' lnin' Jerusalén. ⁴³ Na' cate' gwde lnina' besyeya'aque', perw Jesúsen' bega'ane' ciuda Jerusalén. Na' xne'ena' len Joséna' bi gosache'ede'. ⁴⁴ Con gosacde' ba zjayde' txen len bene' ca' nžaggaque'. Na' tža nez ba gosa'aque' cate' gwzolao chesyeyiljue'ne' ladjo diaža chegaque' na' no bene' xmigüe', ⁴⁵ perw bitw besyeželde' le'. Nach besyebi'e jaya'aque' Jerusalénna' da' yoble cont šjasyediljue' le'.

⁴⁶ Na' beyon žach besyeželde' Jesúsen' chašil yodao' blaona', chi'e gachol bene' ca' chososed chosolo'ede' dan' bzoj da' Moisés. Jesúsen' chzenague' xtiža'gaquen' na' zanen chnabde' legaque'. ⁴⁷ Na' yogo'lol bene' ca' chosozenague' xtiža' Diosen' da' cho'e chesyebande' can' chejni'ide' na' can' choži'e xtiža' bene' ca' zjansed dan' bzoj da' Moisés. ⁴⁸ Na' cate' besele'e xaxne'en le', besyebande', na' xne'en gože' le':

—Xi'indagua', žbixchen' chondo' neto' ca'? Xao' nga na' neda' ba gwdato' beyiljwto' le', na' da' juisyw ba ble'eto'.

⁴⁹ Jesúsen' gože' legaque':

—žBičhen' beyiljwle neda'? žBi nezele liž Xa' ngan' cheyala' soa'?

⁵⁰ Perw xaxne'e bitw gosejni'ide' bi zejen dan' gože' legaque'.

⁵¹ Na' beyeje' yež Nazaret len xaxne'e bzenague' c̄hegaque'. Na' gwlec yichj xne'ena' yogo'lol dan' goca'. ⁵² Na' ca' chac zej chejni'iche Jesús'en' na' zej gwcha'oche', na' Diosen' len beñacha' zej chesa-zlaže'che' le'.

3

Juan gw̄dixjue'ede' diža' güen c̄he Diosa'
(Mt. 3:1-12; Mr. 1:1-8; Jn. 1:19-28)

¹ Cate' lo iz šino' dan' chnabia' César Tiberio doxen ga mbane nación Roma, izna' goc Poncio Pilato gobernador c̄he distritw Judea, na' goc Herodes gobernador c̄he distritw Galilea. Na' bene' biše' Herodesen', ben' le Felipe, goque' gobernador c̄he distritw Itorea na' c̄he distritw Traconite. Na' goc Lisantias gobernador c̄he distritw Abilinia. ² Nach lecze izna' Anás na' Caifás gosacche' bxoz blao c̄he bene' Israel. Izna' Juan ben' naque' xi'in Zacarías gwzoe' to latje daš. Nach Diosen' be'lene' Juanna' diža'. ³ Na' Juanna' gwyeje' yogo'lol yež dan' nita' gala'ze yegw Jordán, jatixjue'ede' yogo'lol bene' cheyala' yesyetinjde' xtoła'gaque' na' yesezoe' nis cont nitlao xtoła'gaquen'. ⁴ Juanna' bene' dan' bzoj da' Isaías ben' be' xtiža' Diosen' cani'te, gana' žan: Bena' chne' zižje latje dašen', že':

“Le gonšagüe' yichjlažda'olen' cont soale gwzenagle c̄he Xanchon' cate' yide',
le cuejyichj da' malen' chonle cont yichjlažda'olen' gaquen ca to nez da' ba gosonšagüe'.

⁵ Gwžin ža cate' yogo' ya'a yegw ca' yesyeyaquen laše',
na' no nez da' nacchgua bxoca' yesyeyaquen licha,

na' no nez da' nžaš nche'ene yesyeyaquen ba'a.

6 Na' yogo'lol beṇe' yesache'ede' can' chaclaže' Diosen' yebeje' beṇaḇhen' lo da' mal."

7 Na' beṇe' zan ja'aque' gan' gwzōa Juanna' cont gwzoe'ne' nis. Na' Juanna' gože' legaque':

—Le'e nacchuale beṇe' zgot na' beṇe' gwxiye'. ¿Chaquēle guac yelale lao castigw dan' seḷa' Diosen' caten' gone' yela' justis che beṇaḇhen'? 8 Še da' li ba betinjele xtoḷa'le, cheyaḷa' gonle da' nac güen cont yesache'e beṇe' ba boša' yichjlažda'olen'. Na' bitw gonle xbab gaquēle Diosen' bitw gone' le'e castigw che xtoḷa'len' lagüe da' nacle xi'in diaža che da' Abrahanna'. Bitw nacho leca chyažje Diosen' le'e. Guac gone' cont yej quinga yesyeyaquen xi'in diaža che da' Abrahanna'. 9 Ca nac le'e, še bi chonle can' chazlaže' Diosen', zaca'leble ca to yag frut da' bibi chbia. Na' yogo'te yag frut da' bibi chbia, chog xan yaga' len na' gwzeyen'.

10 Nach beṇe' ca' chosozenag xtiže'na' gosenabde' Juanna', gose'ene':

—¿Bica' da' cheyaḷa' gonto'?

11 Na' gože' legaque':

—Ben' nape' chope camis cheyaḷa' gwnežjue' ton che beṇe' bi de che'. Na' lecze ca' che ben' de da' gagüe', cheyaḷa' gwnežjue' che ben' bi de gagüe'.

12 Na' cate' to chope beṇe' güechixjw ca' jasebigue' cont gwzōa Juanna' legaque' nis, na' gose'ene':

—Maestrw, ¿bica' da' cheyaḷa' gonto'?

13 Na' gože' legaque':

—Bitw gwchixjwchle ca da' cheyaḷa' yeseyixjue'.

14 Na' to chope bene' ca' zjanac soldadw lecze gosenabde' le', gose'ene':

—¿Chix neto'? ¿Bica'ch da' cheyała' gonto'?

Na' Juanna' gože' legaque':

—Bitw ca'ale da' de che bene', na' neca gonlaže'le len da' yosbague'le bene' cont ca'ale xmechw-gaque'. Le gon banez len laxjwle.

15 Na' bene' ca' gosezoe' lez yid Cristo ben' naquen sela' Diosen' yedenabi'e, na' gosacde' še Juanna' naque' Cristo. 16 Na' Juanna' gocbe'ede' xbab chegaquen' na' gože' yogo'lole':

—Neda' da' li chzoa' le'e nis, perw za' yid bena' gon cont soa Spiritw che Diosen' lo' yichjlažda'olen' naban' le'e. Na' Spiriton' naquen ca' yi', na' gwxi gwloan yichjlažda'ole. Bena' za' za' zaca'che' ca' neda', na' da' nacchgüe' bene' zaca' bitw zaca' gona' xmandadoe' lechja' no xe'le'. 17 Benan' gone' len benachen' can' choncho cate' chdecho trigon' lo' rner. Chtobcho trigon' chgo'ošagüe'chon na' chzeycho yix beben'. Na' bene' chesejnilaže' Diosen', yotobe' legaque' cont šjasyenite' txen len le', na' bene' bi chesejnilaže' le', sele' legaque' lo' yi' gabilen' dan' cbi cheyol chemit.

18 Da' zanch da' gwna Juanna' gwdixjue'ede' legaque' diža' güen, na' gwneyoede' legaque' yesejle'en. 19 Nach Juanna' gwdile' gobernador Herodes ca' nac da' mal da' bene' beque'e Herodías ca' xo'ole', le Herodíasna' naque' xo'ole Felipe bene' biše' Herodesen'. Na' Juanna' lecze be'e diža' yogo'loł da' mal dan' ba ben Herodes. 20 Na' Herodesen', gualaz da' gwzenague' che Juanna', benche' yeto da' mal, gwlo'e Juanna' ližya.

Can' goc caten' gwzoa Jesúsen' nis
(Mt. 3:13-17; Mr. 1:9-11)

²¹ Nach šlac chzoa Juanna' bene' nis, bene' zan ja'ac cont bzoe' leaque' nis. Na' len Jesúsen' gwzoe' nis. Na' lo hora' Jesúsen' bol güiže' Diosen' na' la' byaljwte yaba gan' zoa Diosen'. ²² Na' betj Spiritw che Diosen' bžinen gwzoan len le', na' ca hora' Spiriton' naquen ca to ngolbex. Na' gosende' gwne Dios ben' zoa yaban', gwne':

—Le' naco' Xi'ina' bene' chacchgüeda', na' chebe chezaquelaže' chgüeda' chio'.

Diaža che Jesúsen'
(Mt. 1:1-17)

²³ Na' ca do šichoa ize Jesúsen' cate' gwzolao bene' yogo'lol da' zedeyene'. Na' bene' ca' gwnita' na' gosone' xbab še naque' xi'in Joséna'. Josén' naque' xi'in Elí, ²⁴ na' Elí naque' xi'in Matat, na' Matata' naque' xi'in Leví, na' Levína' naque' xi'in Melqui, na' Melquin' naque' xi'in Jana, na' Janan' naque' xi'in yeto ben' le' José. ²⁵ Na' Joséna' naque' xi'in Matatías, na' Matatíasen' naque' xi'in Amós, na' Amósen' naque' xi'in Nahum, na' Nahunna' naque' xi'in Eslí. Na' Eslin' naque' xi'in Nagai, ²⁶ na' Nagain' naque' xi'in Maat, na' Maata' naque' xi'in Matatías, na' Matatíasen' naque' xi'in Semei, na' Semein' naque' xi'in José, na' Josén' naque' xi'in Judá. ²⁷ Na' Judán' naque' xi'in Joana, na' Joanan' naque' xi'in Resa, na' Resan' naque' xi'in Zorobabel, na' Zorobabelen' naque' xi'in Salatiel, na' Salatielen' naque' xi'in Neri, ²⁸ na' Nerin' naque' xi'in Melqui, na' Melquin' naque' xi'in Adi, na' Adin' naque' xi'in Cosam, na' Cosanna'

naque' xi'in Elmodam, na' Elmodanna' naque' xi'in Er. ²⁹ Na' Era' naque' xi'in Josué, na' Josuén' naque' xi'in Eliezer, na' Eliezeren' naque' xi'in Jorim, na' Jorinna' naque' xi'in Matat. ³⁰ Na' Mataten' naque' xi'in Leví, na' Levín' naque' xi'in Simeón, na' Simeóna' naque' xi'in Judá, na' Judán' naque' xi'in José, na' Josén' naque' xi'in Jonán, na' Jonánna' naque' xi'in Eliaquim. ³¹ Na' Eliquinna' naque' xi'in Melea, na' Melean' naque' xi'in Mainán, na' Mainánna' naque' xi'in Matata, na' Matatan' naque' xi'in Natán. ³² Na' Natánna' naque' xi'in David, na' Davida' naque' xi'in Isaí, na' Isaín' naque' xi'in Obed, na' Obeda' naque' xi'in Booz, na' Boozen' naque' xi'in Salmón, na' Salmónna' naque' xi'in Naasón. ³³ Na' Naasónna' naque' xi'in Aminadab, na' Aminadaba' naque' xi'in Aram, na' Aranna' naque' xi'in Esrom, na' Esronna' naque' xi'in Fares. Na' Faresen' naque' xi'in Judá, ³⁴ na' Judán' naque' xi'in Jacob, na' Jacoben' naque' xi'in Isaac, na' Isaaquen' naque' xi'in Abraham, na' Abrahanna' naque' xi'in Taré, na' Tarén' naque' xi'in Nacor. ³⁵ Na' Nacoren' naque' xi'in Serug, na' Seruga' naque' xi'in Ragaun, na' Ragaun' naque' xi'in Peleg, na' Peleguen' naque' xi'in Heber. Na' Heberen' naque' xi'in Sala, ³⁶ na' Salan' naque' xi'in Cainán, na' Cainánna' naque' xi'in Arfaxad, na' Arfaxaden' naque' xi'in Sem, na' Senna' naque' xi'in Noé, na' Noén' naque' xi'in Lamec. ³⁷ Na' Lamequen' naque' xi'in Matusalén, na' Matusalénna' naque' xi'in Enoc, na' Enoca' naque' xi'in Jared, na' Jareden' naque' xi'in Mahalaleel. Na' Mahalaleela' naque' xi'in Cainán,

38 na' Cainánna' naque' xi'in Enós, na' Enósen' naque' xi'in Set, na' Seta' naque' xi'in Adán, na' Adánna' naque' xi'in Dios.

4

Satanásen' goclažen' co'oyelan' Jesúsen' cont gone' da' mal

(Mt. 4:1-11; Mr. 1:12-13)

¹ Na' Spiritw che Diosen' gwnabian' yichjlaždao' Jesúsen'. Na' Jesúsen' beze'e cho'a yegw Jordán, na' Spiritua' benen cont gwyeje' latje daš. ² Čhoa ža gwzoe' latje dašen' na' lao čhoa žan' bicze bi gwdagüe'. Na' cate' gwde čhoa žan' gwdone'. Na' Satanás dan' chnabia' da' xigüe' ca' goclažen' co'oyelan' le' cont gone' da' mal. ³ Nach gož Satanásen' le':

—Še le' naco' Xi'in Dios, gož yej nga yeyaquen yetextil.

⁴ Na' gož Jesúsen' len:

—Nyojczte Xtiža' Diosa' žan: “Gague yela' guagw na'zen' chyažje chio' benač cont gac bancho, san lecze chyažjecho yogo'loł diža' dan' ža Diosen'.”

⁵ Na' gwče' Satanásen' le' to lo ya'a sibe na' be-dao'nez blo'en le' yogo'loł nación da' zjachi' yežlio. ⁶⁻⁷ Nach gožen le':

—Doxen yela' gwnabia' da' de yežlio nga naquen lo na' cont gwnežjuan' con no che'nda'. Še le' gwzoe' xibo' gonxeno' neda', nach goņa' le' yela' gwnabia' che nación ca' zjachi' yežlio nga na' len yela' zaca' yela' xdan che nación ca'.

⁸ Nach Jesúsen' gože' Satanásen':

—Becuas ca'ale Satanás. Nyojczte Xtiža' Diosen' žan: “Cheyala' šejnilaže'cho Xancho Diosen' na' toz le' gonxencho.”

⁹ Nach Satanásen' gozche'en le' ciuda Jerusalén. Na' bcuen le' yichjo' yodao' blao gan' nac la'zelagüe sibe, na' gožen le':

—Še len' naco' dogualje Xi'in Dios, nga boslažo' cuino', ¹⁰ le nyojczte Xtiža' Diosen', žan:

Sela' Diosen' bene' ca' zjanac angl che' yesaclene' le' na' yesape' le',

¹¹ yesoxe' le' cont bi chego' no vej.

¹² Nach Jesúsén' gožen':

—Lecz ca' nyoj Xtiža' Diosen' žan: “Bitw goncho Xancho Diosen' prueba še lede' can' žen'.”

¹³ Beyož gota'bia' bi gwzoe Satanásen' co'oyelan' Jesúsén' gone' da' mal, nach becuasen šlož len le'.

Jesúsen' gwzologüe' chyixjue'ede' diža' güen che Diosen' distritw Galilea

(Mt. 4:12-17; Mr. 1:14-15)

¹⁴ Nach Jesúsén' beyeje' distritw Galilea, na' yela' guac che Spiritw che Diosen' gwzoan len le'. Na' yogo'lol bene' že' yež ca' zjachi' doxen Galilea gosenezde' che Jesúsén'. ¹⁵ Na' Jesúsén' bsed blo'ede' legaque' lo' yodao' chegaquen', na' yogo'lol bene' ca' gosonxene' le'.

Bežin Jesúsén' Nazaret

(Mt. 13:53-58; Mr. 6:1-6)

¹⁶ Na' bežin Jesúsén' yež Nazaret gan' gwcha'ogüe', na' gwyo'e yodao' ža che Dios can' ba yolagüe' chone', na' gwzechede' cont gwlabé'.

¹⁷ Na' ben' yo'o lo ne'e yodao'na' bnežjue'ne' yiš da' ndobe gan' nyoj dan' bzoj da' Isaías ben' be'

Xtiža' Diosen' cani'te. Na' Jesúsen' bzaše' yišen' na' beželde' ga nyojen žan:

¹⁸ Zoa Spiritw che Diosa' len neda',
na' Diosen' gwleje' neda' zedeya' diža' güen len
bene' yaše'.

Na' gwsele' neda' zedeyena' cont yesyeyaclaže'
bene' ca' chesacyaše'de'.

Na' za'a cont gwsana' bene' ca' zjade ližya.

Na' zedeyena' cont yesyele'e bene' lchoł.

Na' bene' chyi chzaca', zedeyena' cont noch no
yosoči yososaque' legaque'.

¹⁹ Na' zedetixjue'eda' ba bžin ža gaclen Diosen'
benachen'.

²⁰ Jesúsen' botobe' yišen' na' bonežjuen' ben' yo'o
lo ne'e yodaon' na' gwchi'e. Na' yogo' bene' ca' nita'
yodaon' la' gosenā'tie' le'. ²¹ Nach gwzolao be'e
diža' gwne':

—Ža na'aža ba chac can' ža Xtiža' Diosen' dan' ba
benele nga.

²² Na' yogo' bene' ca' gosende' diža' dan' be'e
besyebande' catec mba nac xtiža' Jesúsen'. Na'
gosenie' güen che' na' gose' lježe':

—¿Gague benga xi'in Josén'?

²³ Nach gož Jesúsen' legaque':

—Ye'ljale neda' can' ža diža' dan' de: “Bene' güen
rmed le', beyon cuino'.” Na' lecze ye'ljale neda':
“Dan' chesene' beno' yež Capernaum da' bebane
bene', lecz can' cheyala' gono' lažcho nga.”

²⁴ Nach goze'e legaque':

—Da' li chnia' le'e, bene' gualaž che note'teze
bene' choe' xtiža' Diosen' bitw chesezi'e che'. ²⁵ Ca
tiemp che da' Elías ben' be' xtiža' Diosen' cani',
bibi yejw goc šon iz yo gašje na' goc gwbin juisyw

čhegaque' doxen gan' zelao mbane Israel. Naquen da' li gwnita' zan no'ol güezebe yež ca' gan' mbane Israel ca tiempa', ²⁶ perw Diosen' bi gwsele' Elíasen' cont gaclene' ne to bene' güezeb ca'. Gwsele' le' yeto yež yoble gan' nzi' Sarepta gan' mbane ciuda Sidón cont goclene' to no'ol güezebe. ²⁷ Na' lecz ca' tiemp che da' Eliseo ben' be' xtiža' Diosen' cani', gwnita' zan bene' Israel bene' gosacšene len yižgüe' da' nzi' lepra. Ne to legaque' bi beyon Eliseon'. Toz bene' zito' bene' Siria, ben' le' Naamán, beyon Eliseon'.

²⁸ Na' yogo' bene' ca' že' yodao'na' cate' gosende' dan' gwna Jesúsén' beseža'achgüe'. ²⁹ Na' la' besyezoža'te' na' besyebeje' Jesúsén' yežen', na' goseche'ene' to lo ya'a da' zoa gala'ze, gosacłaže' yososlažoe'ne' lo ya'a na'ate, ³⁰ perw bibi goc yesonde' le'. Con beza' Jesúsén' bedie' gachol gaque'.

Jesúsén' bebeje' da' xigüe' dan' yo'o yichjlaždao' bene'
(Mr. 1:21-28)

³¹ Na' jasoe' yež Capernaum gan' mbane Galilean', na' že che Dios bsd blo'ede' bene' ca' že' lo' yodao'na'. ³² Na' bene' ca' besyebande' ca' nac dan' bsd blo'eden', le bzejni'ide' cacze to bene' neзде' cayanen' nac xbab che Diosen'.

³³ Lo' yodao'na' gwzoa to bene' yo'o nyaze' da' xigüen'. Na' bosye'e gwne':

³⁴ —¿Bixchen' chgoša' chlaže' chio' len neto', Jesús bene' Nazaret? ¿Zedežiayo'o neto'? Neda' nombi'a le' na' nezda' naco' bene' laždao' xilaže' juisyw ben' gwseła' Diosen'.

³⁵ Nach Jesúsén' gwdile' da' xigüen' na' gožen':

—¡Sšago! Bechoj yichjlaždao' benga.

Na' bchix da' xigüen' bena' gachol bene' ca' že'na' nach bechojen. Perw bitw benen le' zi'. ³⁶ Na' leca besyebane yogo' bene' ca', nach gose' lježe':

—¿Bixen' chac? ¿Bixe da' coben' chlo'e benga? Nachbia' nape' yela' chnabia' na' yela' guac, le chone' mandadw na' la' chechojte da' xigüe' da' yo'o nyaz bene'.

³⁷ Na' ca' nac dan' ben Jesúsen' gos gwlalje dižan' doxen lagüe yež ca' zjachi' do na'.

Jesúsen' beyone' taobi'in che Simónna'

(Mt. 8:14-15; Mr. 1:29-31)

³⁸ Na' cate' beze'e yodao'na', na' gwyeje' liž Simón. Na' taobi'in che Simónna' chacšende', yo'e da' la. Na' bosol güiže' Jesúsen' cont yeyone' le'. ³⁹ Na' Jesúsen' gwzeche' cuite' gan' die', na' bcheque' gwdile' da' lan' cont bechojen. Nach taobi'in che Simónna' la' gwyastie' na' bsin'e da' gose'ej gosagüe'.

Jesúsen' beyone' bene' zan

(Mt. 8:16-17; Mr. 1:32-34)

⁴⁰ Na' cate' ba chxoa gwbižen' goseche'e con yogo' bene' chese'e yižgüe' jasesane' legaque' lao Jesúсна'. Na' Jesúsen' gwxo'a ne'e yichj to toe' na' beyone' legaque'. ⁴¹ Na' lecz ca' bebej Jesúsen' da' xigüe' da' yo'o yichjlaždao' bene' zan. Na' besyechojen gosenen zižje, gosenan:

—Le' naco' Xi'in Dios.

Na' Jesúsen' gwdile' legaquen na' bitw be'e latje bi yesenan, le gosenezen naque' Cristo ben' gwlej Diosen' cont yedenabi'e.

*Jesúsna' gwde' doxen Galilean' bsed blo'ede'
(Mr. 1:35-39)*

⁴² Na' beteyo cate' gwye'ni', beze'e na' beyeje' to latje ga nono nla'. Na' bene' ca' besyeyiljue'ne' na' ja'aque' gan' zoen'. Na' gosaclačže' yosozague' Jesúsen' cont bi yeze'e. ⁴³ Na' Jesúsen' gože' legaque':

—Lecz ca' bene' ca' nita' yež yoble cheyała' šjalo'eda'ne' cont yosozenague' che Diosen' na' nabi'e yichjlažda'ogaque'. Diosen' gwsele' neda' cont šjatixjue'eda' legaque' xtižen'.

⁴⁴ Ca' goquen', Jesúsen' gwde' to to yež che distritw Galilea na' bsed blo'ede' bene' ca' lo' yodao' čhegaquen'.

5

*Gosezene' be zan belja'a
(Mt. 4:18-22; Mr. 1:16-20)*

¹ Na' šlac zecha Jesúsen' cho'a nisdao' da'na' nzi' Genesaret, besežag bene' zan na' bosochite' Jesúsen' da' gosaclačže' yosozenague' xtiža' Diosen' dan' bi'e cho'a nisdaon'. ² Na' Jesúsen' ble'ede' čhope barcw dao' cho'a nisdaon'. Na' bene' gwxcn bel ca' ba besyežaše' lo' barcon' ba chesyeyibe' yixjw bel čhegaquen'. ³ Na' Jesúsen' gwyo'e lo' barcw che Simónna' na' gwnabde' le' bosožigue' barcon' yelate' lo' nisen'. Na' Jesúsen' gwchi'e lo' barcon' blo'ede' bene' ca' že'na'. ⁴ Cate' beyož bi'e dižan' na' gože' Simónna':

—Le gwžiga'ch barcon' yelate' gan' nac sitjw, na' le gwzala' yixjw chelen' na' senle belen'.

⁵ Nach Simónna' gože' Jesúsen':

—Maestrw, ba bento' žin do yel na' ne to nono bdola'. Perw le' ba gwnao' yezolaoto', na' gwzala'to' yixjw ca' da' yoble.

⁶ Na' beyož bosozala' yixjw chegaquen' zjany-icoco'ten belen', yeleze ca' yesyecheza'ten. ⁷ Na' beņe' ca' zjanita' lo' barcw che Simónna' gosone' señw gosaxe' beņe' lježen' že' yeto lo' barcw yoble cont yesaclene' legaque' yesyebeje' yixjon'. Yelez ca' gwdebe nisen' chopte barcw ca' dan' gosegüe'e bel zan lo'enna'. ⁸ Nach Simónna', ben' lecz le' Pedro, cate' ble'ede' da'na' goquen' na' bzoa xibe' lao Jesúsen' gože' le':

—Xana', neda' naca' to beņe' mal, bibi zaca' par so' nga len neda'.

⁹ Gwne' ca' le le' txen len beņe' lježe' ca' že' lo' barcon' besyebanchgüede' da' gosezene' bel zanna'. ¹⁰ Lecz ca' besyebane xi'in ben' le Zebedeo, zjanac chop biše'tie', Jacobo len Juan. Beņe' ca' chesone' žin len Simónna'. Nach Jesúsen' gože' Simónna':

—Bitw žebo'. Le' naco' beņe' gwxcen bel, na' chebejo' belen' lo' nisen'; perw na'a gona' cont gaxle beņe' yesyechoje' lo da' malen'.

¹¹ Na' cate' besyežinlene' barcon' yo biž, nach gosebejyichje' barcon' len yogo' xšinlaže' ca' na' ja'aclene' Jesúsen'.

Jesúsen' beyone' to beņe' che'ede' yižgüe' dan' nzi' lepra

(Mt. 8:1-4; Mr. 1:40-45)

¹² Na' šlac Jesúsen' zoe' to yež na' bžin to beņe' che'ede' to yižgüe' dan' nzi' lepra. Na' bena' cate' ble'ede' Jesúsen', bzoa xibe' lagüe' na' bol güiže'ne' gože'ne':

—Xana', še chaclažo', guac yeca'o yižgüe' dan' che'eda' nga.

¹³ Nach Jesúsen' bli ne'e na' gwxoen' yichje' na' gože' le':

—Chaclaža' yeyacdo'. Beyaque.

Nach la' bega'ate yižgüe' dan' che'eden'. ¹⁴ Nach Jesúsen' bene' mandadw gože' le' notno ye'e can' ba beyone' le'. Na' gože' le':

—Con gwyej ja'na' bxoza' cont le'ede' bach beyacdo'. Na' bnežjo' da' cheya'la' gwnežjo' dan' non Moisésen' mandadw cont yeyaco' xilaže' len ley che Diosen'. Ben ca' cont yogo' bene' yesenezde' ba beyacdo'.

¹⁵ Na' tža tža gos gwłalje diža' ca' nac yela' guac dan' ben Jesúsen'. Na' besedob bene' zan cont bosozenague' xtiža' Jesúsen' na' cont beyone' legaue' len bite'teze yižgüe' da' chese'ede'. ¹⁶ Nach Jesúsen' bchoje' to ši'i güeje jal güiže' Diosen' to latje daš.

*Jesúsen' beyone' to bene' bi chda šla'a ni'a ne'e
(Mt. 9:1-8; Mr. 2:1-12)*

¹⁷ Nach to ža zoa Jesúsen' to yo'o gan' chsed chlo'ede' bene'. Na' gala'ze zjanita' zan bene' Israel bene' zjanzi' fariseo. Na' lecze zjachi' yeto cuen bene' ca' chososed chosolo'ede' dan' bzoj da' Moisés. Bene' ca' že'na' za'aque' yogo'lol yež ca' gan' mbane distritw Galilea len distritw Judea, na' lecze bale' za'aque' ciuda Jerusalén. Na' bosozenague' diža' da' be' Jesúsen'. Na' yela' guac che Xancho Diosen' zoan len Jesús'a na' beyone' bene' güe' ca'. ¹⁸ Na' besežin xonj bene' zjanlene' to bene' xinj, bene' bi chda šla'a ni'a ne'e, zjanxoe' le'

to lo cam dao'. Na' gosaclaže' yesedie' šjasesane' le' lao Jesúsá'. ¹⁹ Na' da' že' chgua beñe' zan bi goc latje yesedie' šjasesane' beñe' güen' lao Jesúsén'. Nach beñe' ca' gosepe' yichjo'ole gosesaljue' goseque'e tej na' beseletje'ne' len xcame'na' gachol beñe' ca' že' lo' yo'ona' cont bžine' lao Jesúsén'. ²⁰ Cate' gocbe'e Jesúsén' gosejnilaže' le' na' gože' beñe' güe'na':

—Xi'ina', ba bezi'xena' xtolon'.

²¹ Na' beñe' ca' chososed chosolo'e dan' bzoj Moisása' na' beñe' fariseo ca' gosene':

—¿Non' chaque benga naque' chñe' ca'? Chon cuine' ca' Dios. Le nono zoa beñe' gac yezi'xene' xtolá' beñachén'. Toz Diosén' gac yezi'xenen'.

²² Jesúsén' gocbe'ede' ca' nac da' cheseža'laže' na' gože' legaque':

—¿Bichena' chza'laže'le ca' lo' yichjlažda'ole? ²³ Še yapa'ne': “Ba bezi'xena' xtoló'na'”, bi ñezele še napa' yelá' gwnabia' cont yezi'xena' xtole'na'. San še yapa'ne': “Gwyas na' gwda”, na' nacbia' še napa' yelá' guac gac can' gwnian'. ²⁴ Na'ach gona' cont gacbe'ele napa' yelá' gwnabia' cont yezi'xena' xtolá' beñach, neda' naca' bena' gwseła' Diosén' golja' beñach.

Nach gože' beñe' xinja':

—Chapa' le' beyas, beyoa' xcamon', na' beyej ližo'.

²⁵ Nach la' beyaste beñe' xinja', cheseña'te beñe' ca' nita'na'. Nach beyoa' xcamen' na' beze'e zjayda liže' chonxene' Diosén'. ²⁶ Na' yogo'lol beñe' ca' že'na' besyebande' yelá' guac che Jesúsén' dan' bene'na'. Nach gosonxene' Diosén', na' do chesežebe' gose' lježe':

—Da' yebanecho da' ca' ba ble'echo ŋa'aža.

Jesúsen' gwleje' Leví cont goque' le' txen

(Mt. 9:9-13; Mr. 2:13-17)

²⁷ Gwdena' beza' Jesúsen' na' ble'ede' to beŋe' güeçhixjw beŋe' le' Leví, chi'e latje gan' chçhixjue'. Na' Jesúsen' gože' le':

—Da len neda'.

²⁸ Nach gwzoža' Levín' gwlejjichje' yogo' xšinlaze' na' gwyejlene' Jesúsen'.

²⁹ Nach Levína' bene' to l̄ni xen ližen' par Jesúsen', na' ja'ac beŋe' zan beŋe' güeçhixjw ca' na' beŋe' yezica'chle na' gosebe'lene' le' cho'a mesen' gosagüe'. ³⁰ Na' beŋe' ca' chososed chosolo'ede' dan' bzoj Moisésen' na' len beŋe' fariseo ca' gosacyožlene' beŋe' ca' zjanaque' Jesúsen' txen, gose'e legaque':

—¿Nacxeçhen' che'ej chagwle txen len beŋe' güeçhixjw na' yebale beŋe' güen da' xinj ca'?

³¹ Jesúsen' gože' legaque':

—Beŋe' cbi chesacšene bitw cheseyažjde' beŋe' güen rmed. Beŋe' ca' chesacšene, legaquen' cheseyažjde' beŋe' güen rmed. ³² Gague beŋe' ba zjanaque' beŋe' güen len Diosen' zedeneyoeda' cont yesyetinjde' xtolen', san beŋe' güen da' xinj. Legaque' zjanaque' ca beŋe' cheseyažjde' beŋe' güen rmed.

Gosenabde' Jesúsen' bixçhen' cbi gwleje' tgüeje ža gwbas

(Mt. 9:14-17; Mr. 2:18-22)

³³ Nach bał beŋe' gose'e le':

—Beŋe' ca' zjanaque' txen len Juan na' beŋe' zjanaque' txen len beŋe' fariseo ca' chesonchgüe'

gwbas chosol güiže' Diosen'. Perw na' bene' ca' zjanaque' le' txen chese'ej chesagüe'. ¿Bixchen'?

³⁴ Nach gož Jesúsen' legaque':

—¿Guac yesezoa gwbas bene' chaxe' to ga chac yela' güešagna' šlac ben' bšagnan' zualene' legaque'? Bi gac. ³⁵ Perw žin ža cate' bich soe' len legaque', cana'ch yesone' gwbas. Na' ca'cze naquen len neda' na' len bene' ca' zjanaque' neda' txen.

³⁶ Na' Jesúsen' be'e jempl nga bzejni'ide' legaque':

—Notno zoa bene' cheza' xe' da' cobe na' yode'en de'exo'. Še gone' ca' gwžiaje'e xe' da' coben' na' xe' de'exon' bitw gac leben len lache' coben'. ³⁷ Na' neca zoa bene' chgue'e vino cobe lo' bzod yide'exo', le vino coben' chšon' yide'exon' na' lalje vino na' yesebiayi' chopen. ³⁸ Cheyala' yesegue'e vino coben' lo' yid cobe cont bibi gaquen. ³⁹ Na' ca nac bene' bach yolagüe' che'eje' vino golen', bitw ye'nde' ye'eje' vino coben', san že': “Vino golen' nacchen güen.”

6

Bene' ca' zjanaque' Jesúsen' txen goselechje' trigon' gosagüen' ža che Dios

(Mt. 12:1-8; Mr. 2:23-28)

¹ Na' to ža nac ža che Dios, Jesúsen' gwddie' gan' nyaž trigw len bene' ca' zjanaque' le' txen. Nach bene' ca' zjanaque' le' txen goselechje' trigon' na' gosexoben' gosagüen'. ² Na' besele'e bal bene' fariseon' can' gosone' na' gose'e legaque':

—¿Bichen' chonle da' bi de lsens goncho ža che Dios?

³ Na' Jesúsen' gože' legaque':

—¿Bi_na' gw_lable can' ben da' rey David to ža cate' le' na' be_ne' lježe' ca' gosedone'? ⁴Gwyo'o Davin' liž Dios na' jaxi'e yetextil da' nac che Dios da' bi chac gagw be_ne' bi nac b_xoz, na' gw_dagüen', na' le_cze bnežjue' che be_ne' zja'ac len le'.

⁵Na' le_cz ca' gwna Jesúsen':

—Naquen lo na' n_ia' bi da' nac güen goncho cate' nac ža che Dios, neda' naca' ben' gwse_la' Diosen' golja' be_na_{ch}.

Beyac to be_ne' n_xo'on š_la'a taque'
(Mt. 12:9-14; Mr. 3:1-6)

⁶Na' yeto ža che Dios gozeje' lo' yodaon' na' bsd blo'ede' be_ne' ca' že'na'. Na' ladjo be_ne' ca' zjaže'na' yo'o to be_ne' n_xo'on taque' li_{ch}a. ⁷Na' be_ne' ca' chososed chosolo'e dan' bzoj da' Moisés na' be_ne' fariseo ca' chosogüia chese_ne'e Jesúsen' še yeyone' bena' ža che Dios cont de da' yosode'ede' yesagüe' xya che'. ⁸Na' gocbe'e Jesúsen' can' chesone' xbaben', na' gože' ben' n_xo'on taque':

—Gwzoža' na' gwzecha nga gachol.

Nach bena' bžine' gwzeche' lagüen'. ⁹Na' Jesúsen' gože' be_ne' ca' že'na':

—¿Bi da' cheya_la' goncho ža che Dios? ¿Goncho da' güen, še goncho da' mal? ¿Cheya_la' yoslacho be_ne', še gwž_iayi'chone'?

¹⁰Jesúsen' gw_ne'e yogo'te ben' že'na', nach gože' ben' n_xo'on taque':

—Bli naon'.

Nach bli_ne' na' taquen' beyaquen bin_lo. ¹¹Na' be_ne' ca' chososed chosolo'e leyna' na' len be_ne' fariseon' leca beseže'e na' gwzolao bosoxi'e nacle yesone' len Jesúsen'.

Jesúsen' gwleje' šižinw postlw
(Mt. 10:1-4; Mr. 3:13-19)

¹² Na' to ža gwyej Jesúsen' to lo ya'a jel güiže' Diosen'. Na' do yel be'lene' Diosen' diža'. ¹³ Na' cate' gwye'ni', goxe' be_{ne}' ca' zjanaque' le' txen, nach gwleje' šižin_{ue}' na' bsi'e lega_{que}' postlw. ¹⁴ Be_{ne}' qui gwleje': Simón ben' bsi'e Pedro, na' be_{ne}' biše' Andrés, na' Jacobo, na' Juan, na' Felipe, na' Bartolomé, ¹⁵ na' Mateo, na' Tomás, na' Jacobo xi'in Alfeo, na' Simón ben nac cananista, ¹⁶ na' Judas be_{ne}' biše' Jacobo, nach Judas Iscariote ben' bdie' Jesúsen' lo na' be_{ne}' chesegue'ede' le'.

Jesúsen' bzejni'ide' be_{ne}' zan
(Mt. 4:23-25)

¹⁷ Na' beyetje' lo ya'an len lega_{que}' na' gwzeche' ga nac to laše' len be_{ne}' ca' zjanaque' le' txen. Na' lecze nita' be_{ne}' zan be_{ne}' za'ac doxen Judean', do ciuda Jerusalénna' na' do gan' mbane yež ca' zjanzi' Tiro na' Sidón. Na' Tiro len Sidón zjachin' cho'a nisdao'. Na' len be_{ne}' ca' nita' chosozenague' xtiža' Jesúsen' zjančhix_e ba_l be_{ne}' chese'e yižgüe'. Na' Jesúsen' beyone' lega_{que}'. ¹⁸ Na' be_{ne}' ca' zjayo'o zjanyaz da' xigüen' yichjlažda'oga_{que}', Jesúsen' bebejen'. ¹⁹ Na' yogo' be_{ne}' goseyiljue' nacle yesone' cont yeselapa' na'gaquen' le', le gosenezde' nape' yela' guac cont yega'a yižgüe' čhegaquen' še yesechele'ne'.

Non' zoa mbalaz na' non' cbi zoa mbalaz
(Mt. 5:1-12)

²⁰ Na' Jesúsen' gw_{lis} lagüe' gw_{ne}'e be_{ne}' ca' zjanaque' le' txen na' gože' lega_{que}':

—Mbalaz zoa le'e be_{ne}' yaše', le'e chzenagle che Diosen' cont chnabi'e yichjlažda'olen'.

21 'Mbalaz zoa le'e chdon_{le} na'a, gwžin ža cate' bich ton_{le}.

'Na' mbalaz zoa le'e chbežle na'a, gwžin ža cate' gwxižle.

22 'Neda' naca' ben' gwse_{la}' Diosen' golja' be_{na}ch. Na' mbalaz soale še dan' chejnilaže'le neda' chesegue'e be_{ne}' le'e, na' chesyebeje' le'e lo' yodao' chegaque', na' cheseneye'e chele, na' chesene' nacle be_{ne}' mal. 23 Le yebechgüe cate' chac da' quinga, na' le soa mbalaz, le Diosen' gone' cont gacchgua da' güen chele cate' yežin_{le} gan' zoe'na'. Can' chesonde' le'e, ca'czen' goson da' xoxta'ogaque' len da' be_{ne}' ca' goso'e xtiža' Diosen' cani'.

24 'Na' nyaše'chguaze nac le'e be_{ne}' gw_{ni}'a. Chac güen chele na'a, perw gague to_{li} tocan_{en}' gac chele ca'.

25 'Nyaše'chguaze nac le'e dechgua da' chagwle na'a. Gwžin ža cate' bich bi gata' chele.

'Nyaše'chguaze nac le'e chxižle na'a. Gwžin ža cate' yegüine'le na' cuežyaše'le.

26 'Nyaše'chguaze nac le'e chesonxen yogo'lo be_{ne}' le'e. Ca'czen' goson da' xoxta'ogaque', gosonxene' be_{ne}' ca' goseziye'e gosene' cheso'e xtiža' Diosen' cani'.

Cheya_{la}' gaquecho be_{ne}' chesegue'ede' chio'

(Mt. 5:38-48; 7:12)

27 'Le'e chzenagle chia', cheya_{la}' gaquele be_{ne}' chesegue'ede' le'e. Cheya_{la}' gon_{le} da' güen len be_{ne}' ca' chesegue'ede' le'e. 28 Le nab cont be_{ne}' chesegue'ede' le'e nite' mbalaz. Le soa le nabe

Diosen' gaclene' be_{ne}' chososaca'zi' le'e. ²⁹ Še to be_{ne}' chaze' šla'a xaga'le, le güe' dan' yešla'a. Še to be_{ne}' que'e xado_n chele, le güe' latje lechje' len xcamisle. ³⁰ Note'teze be_{ne}' bi dan' nabde' le'e, le gwnežjon. Še to be_{ne}' que'e bite'teze da' de chele, bitw ye_nablen. ³¹ Con yogo' da' güen da' chaclaže'le yeson be_na_{ch}en' len le'e, lecze ca' cheya_la' gonle len legaque'.

³² 'Še chaquele šinze be_{ne}' chacde' le'e na' bi chaquele be_{ne}' yoble, ¿bix_{ch}en' chaquele chebe Diosen' can' chonle? Ca'cze cheson be_{ne}' güen da' mal ca'. ³³ Lecze še chonle da' güen len be_{ne}' ca' cheson da' güen len le'e na' bi chonle güen len be_{ne}' yoble, ¿bix_{ch}en' chaquele chebe Diosen' can' chonle? Ca'cze cheson be_{ne}' güen da' mal ca'. ³⁴ Še chbejle bi da' chbejle len be_{ne}' chaquele yesyeyonen' le'e, ¿bix_{ch}en' chaquele chebe Diosen' can' chonle? Ca'cze cheson be_{ne}' güen da' mal ca', chesebeje' bi dan' chesebej lježgaque', na' nite' lez yosyonežjuen'. ³⁵ Perw na' le'e, le soa le gaque be_{ne}' chesegue'ede' le'e, na' le soa le gon da' güen. Na' le soa le cuej bi dan' cuejle, perw bitw soale lez yesyeyonen'. Še gonle ca dan' ba gwnia' le'e, gwlo'ele nacle xi'in Dios ben' nac la'zelagüe be_{ne}' blao, na' Diosen' güebi'icze' güen len le'e. Le'na' naque' be_{ne}' šagüe' len be_{ne}' ca' bi cheso'e yela' choxclen che' na' len yezica'chle be_{ne}' güen da' mal ca'. ³⁶ Na' ca Xacho Diosen' ben' zoa yaba cheyaše' cheži'ilaže'de' yogo' be_na_{ch}en', ca'cze cheya_la' yeyaše' yeži'ilaže'le ljež be_na_{ch}len'.

Bitw zaca'cho n̄acho bene' zjanape' dola'
(Mt. 7:1-5)

³⁷ 'Bitw gonle xbab zaca'le n̄ale bene' zjanape' dola'. Še n̄ale che bene' zjanape' dola', ca'cze Diosen' ne' le'e nape dola'. Na' bibi yosbaga'le bene' cont Diosen' bibi yosbague'de' le'e. Le soa le yezi'xen che bene' cont Diosen' yezi'xene' chele. ³⁸ Le soa le gwnežjo bi da' gwnežjwle bene' na' Diosen' güeyon̄cze' chele. Bał bene' leca nala' chosochixe' bi dan' chesote', chosochiše' lao yagarm chegaquen' na' chesebiben' na' choso-zoaya'aten'. Ca'czen' cheyala' gonle gwnežjwle bi dan' cheseyažje bene' na' lecz ca' gon Diosen' len le'e.

³⁹ Nach Jesús en' be'lene' bene' že'na' to jempl, gwne':

—¿Guaque to bene' l̄chol̄ cue'e nez yeto bene' l̄chol̄? Bi gac. Le nezecho chopte' šjasebixe' to lo' yechw. ⁴⁰ Ca nac cate' to bene' chsede' len to maestrw, bi n̄acho naque' bene' blaoch ca maestra'. Na' la'czla' še ben' chseda' gwda' yichje' yogo'loł dan' blo'e maestron' le', bitw naque' bene' sina'ch ca maestra'.

⁴¹ ¿Bixchen' ch̄na'le beb dao' dan' yo'o lo' yejlao bene' lježle, na' bi chache'ele naquech beb xen dan' yo'o lo' yejlaolen'? ⁴² Na' še le'e yo'o to da' xen lo' yejlaolen' ¿nacxechen' che'le bene' lježlen': "Ben yebeja' beb dao' dan' yo'o lo' yejlaguon'"? ¡Bene' güexoayag! Zgua'tec le yebej beb xen dan' yo'o lo' yejlaolen', nach le'ele binlo cont yebejle dan' yo'o lo' yejlao bene' lježle.

Dan' choncho chlo'en bin'yo'o lo' yichjlažda'ochon'
(Mt. 7:17-20; 12:34-35)

43 'Bitw nacho to yag frut güen chbian frut da' bi nac güen, na' neca nacho dan' bi nac güen chbian da' nac güen. 44 Con can' nac da' chbia to to yaguen' nezecho bi yaga'. Yag yeše' bitw chbian da'na' nzi' yixgüigw. Lecz ca' yag bisga'a bi chbian uvas. 45 To beñe' laždao' ži'ilaže' chone' da' güen, le ca ža lo' yichjlažda'ogüe' nan' chone'. Na' ben' chon da' mal, chone' ca' lagüe dan' chzenague' che laždao' xi'a che'na'. Na' yogo'te diža' dan' chchoj cho'achon', lo' yichjlažda'ocho nan' za'aquen.

Chope beñe' na' yo'o da' chon to toe'
(Mt. 7:24-27)

46 '¿Bichen' che'le neda': "Xana", na' bi chonle can' nona' mandadw? 47 Na'a nia' nac zaca'lebe beñe' nao' neda' na' chzenague' xtiža' na' chone' can' nona' mandadw. 48 Naque' ca to beñe' ben yo'o na' gwche'ene' sitjw gwleque' lene yo'on da' nac da' gual. Cate' betjchgua yegw gwyechjen liže'na', na' bitw bebixen cuiayin', le gwzoachachchguan. 49 Na' yogo' beñe' chende' xtiža'na' na' bi chone' can' žia'na' naque' ca yeto beñe' ben yo'o, con benen' lo yo na'ze na' bibi lenen gwleque'. Na' cate' betjchgua yegw gwyechjen liže'na', na' bebixen gwžiai'te yo'on.

7

Jesúsen' beyone' xmos to xan soldadw
(Mt. 8:5-13)

1 Na' cate' beyož be' Jesúsen' diža' len beñe' ca', beyeje' yež Capernaum. 2 Na' zoa to xan soldadw beñe' bitw naque' beñe' Israel. Na' zoa to xmose' chacšenchgüede', na' yelez ba de' par gate'. Na'

xan soldadon' chacchgüede' le'. ³ Na' cate' xan soldadon' bende' diža' che Jesús'en', gwsele' bal bene' gole blao che bene' Israel cont jaseñabde' Jesús'en' šeje' liže' yeyone' xmose'. ⁴ Nach cate' besežine' gan' zoa Jesús'en', gosenabde' le' gaclene' xan soldadon'. Na' gose'e Jesús'en':

—Xan soldadon' naque' to bene' zaque' gacleno', ⁵ le chacde' chio' bene' Israel, na' le' bene' yodao' čheto' nga len xmechue'.

⁶ Nach gwyej Jesús'en' len legaque', perw za' yesežine' liže'na' cate' gwseła' xan soldadon' bal bene' migw che' lao Jesús'en' na' gose'ene':

—Xan soldadon' že' bitw gwša'a yichjo' yido' liže'na', le nežde' bitw zaque' cont šo' liže'na'. ⁷ Da'n'an' bitw beyaxjde' yide' nabde' le' gacleno'ne'. Con che'nde' gonšco' mandadw yeyaque' xmose'na'. ⁸ Xan soldadon' že' zoa bene' chnabia' le' perw lecze nita' soldadw che' na' chnabi'e legaque'. Na' cate' che'e toe': “Gwyej”, na' cheje', na' cate' che'e yetoe': “Da”, na' chide', na' cate' che'e xmosen': “Da' nga gono”, na' chonen'. Na' nežde' con nao' yeyac' xmose'na' na' yeyacde'.

⁹ Na' Jesús'en' cate' bende' diža' dan' gose' bene' migw che' xan soldadon' le', bebande' na' beyechje' gože' bene' zan ca' zjanao' le':

—Žia' le'e ne toze bene' Israel biña' šejnilaže' neda' ca chejnilaže' benga bi naque' bene' Israel.

¹⁰ Nach jaya'ac bene' ca' gwseła' xan soldadon'. Cate' besyežine' liže'na' ba beyaque' xmosen'.

Jesús'en' bosbane' xi'in to no'ole güezebe

¹¹ Jesús'en' gwyeje' to yež dan' nzi' Naín len bene' ca' zjanaque' le' txen na' zan bene' yoble.

12 Ba zja'aque' galá'ze par yesežine' cho'a puert che yežna' cate' besele'ede' chesechoj xonj bene' cho'a puerten' zjanlene' to bene' guat. Na' ben' goten' naque' bene' tliša', na' xne'en naque' no'ole güezebe. Na' bene' zan bene' lo yeža' zja'aclene' xna' bene' guaten'. 13 Na' cate' ble'e Xanchon' no'olen', beyaše'de' le' na' gože'ne':

—Bitw cuežo'.

14 Nach gwyeje' jaḡoa ne'en lo yagla' gan' xoa bene' guata'. Nach bene' ca' zjanlen le' gosebeze'. Na' gože' bene' guata':

—Bene' güego', neda' žia', beyas.

15 Nach bene' guaten' gwchi'e na' gwzolaküe' benie'. Na' Jesúsen' beyone' le' lo na' xne'e. 16 Na' yogo'lol bene' ca' besežebe' dan' beban bene' guata' nach gosonxene' Diosen' gosene':

—Ba bla' to bene' blao ga zoacho, bene' choe' xtiža' Diosen', na' Diosen' ba gwsele'ne' cont gac-lene' chio' naccho nación che'.

17 Ca nac dan' ben Jesúsen' gos gwlalj diža' chen' doxen Judea na' yogo'lol yež ca' dan' zjanita' galá'ze.

Juanna' gwsele' chope ben' gosaque' le' txen gan' zoa Jesúsen'

(Mt. 11:2-19)

18 Nach bene' ca' zjanaque' txen len Juanna' jaseye'lene' le' diža' yogo'lol ca' nac dan' chon Jesúsen'. Nach gox Juanna' chope bene' ca' 19 nach gože' legaque':

—Le šja'ac gan' zoa Jesúsen' na' ye'lne': “¿Len' naco' ben' chbezto' sela' Diosen' o še cheyala' cuezchto' yid bene' yoble?”

20 Nach be_{ne}' ca' chope cate' besežine' gan' zoa Jesúsen' gose'ene':

—Juan ben' chzoa be_{ne}' nis gwsele' neto' laguo' nga nabeto' le' še len' naco' ben' chbezto' sela' Diosen' o še cuezchto' yid be_{ne}' yoble.

21 Šlacte ne' nita' chope be_{ne}' ca', Jesúsen' beyone' bene' zan be_{ne}' ca' chesacšene na' be_{ne}' chese'ede' yižgüe' gual. Lecze bebeje' da' xigüe' da' zjayo'o zjanyaz yichjlaždao' be_{ne}' zan. Na' bene' cont besyele'e zan be_{ne}' lchol. 22 Nach Jesúsen' boži'e xtiža' be_{ne}' ca' gwsela' Juanna' lagüe'na', gože' legaque':

—Le šjaya'ac na' le šjayež Juanna' doxen da' ca' ba ble'ele na' da' ca' ba benele. Ba ble'ele chona' cont chesyele'e no be_{ne}' lchol, na' chesyeda no be_{ne}' zjanxinj ni'e. Na' lecze be_{ne}' gose'e yižgüe' dan' nzi' lepra besyeyacde', na' chesyeyene no be_{ne}' cuež. Ba ble'ele bosbana' no be_{ne}' guat, na' ba benele choa' diža' güen len be_{ne}' yaše' ca'. 23 Mbalaz zoa be_{ne}' chejle'e chia' na' bi chdebde'.

24 Na' cate' besyeya'ac be_{ne}' ca' gwsela' Juanna', nach Jesúsen' be'lene' be_{ne}' ca' zjandoben' xtiža' Juanna', gože' legaque':

—¿Nacxe nac ben' jale'ele latje dašen'? ¿Šayichj šayen chaque'? Bi naque' ca'. 25 ¿Nac naque' caten' jale'elne'? ¿Nyaze' lache' šagüe'? ¿še bitw? le be_{ne}' ca' zjanyaz lache' šagüe' na' chesenite' chese'ej chesagwšagüe' na' chesone' legr, bena' nita' yo'o güenchgua, ca no liž be_{ne}' gwnabia'. 26 ¿Noxen' jale'ele? ¿Naque' to be_{ne}' choe' xtiža' Diosen'? Da' li naque' to be_{ne}' choe' xtiža' Dios, perw chnia' le'e, zaca'che' ca note'teze be_{ne}' choe' xtiža' Dios. 27 Che benga nyojen le'e Xtiža' Diosen' žan:

Neda' Dios se_la' to be_ne' cuialagüe' laguo' güe'e
xtižon'

cont cate' yido' ba nita' be_ne' yesonxene' le'.

²⁸ Chnia' le'e, notech no be_načh na' soa be_ne'
naquech be_ne' blaoch ca Juanna'. Perw na'
note'teze be_ne' gwzenague' che Diosen' cont
Diosen' nabi'e yichjlažda'ogüe', la'czla' bi naque'
be_ne' blao, gwžin ža cate' šejni'ichde' chia' clel ca
Juanna'.

²⁹ Ba bzoa Juanna' be_ne' zan nis na' len ba_l be_ne'
güechixjw. Na' yogo' be_ne' ca' gosacbe'ede' Diosen'
zejcze' to licha dan' gwsele' Juanna' jatixjue'ede'
legaue' yesyeti_njde' xtola'gaue'. ³⁰ Perw na'
be_ne' fariseo ca' na' be_ne' ca' chososed chosolo'e
dan' bzoj da' Moisés, goson yichjlaogaquen' cbi
besyeti_njde' xtola'gaquen' can' goclaže' Diosen'. Bi
gosaclaže' gwzoo Juanna' legaue' nis. ³¹ Nach
Jesúsen' gože' legaue':

—¿No gwsaca'lebda' le'e zoale na'a? ¿No chon
can' chon_len'? ³² Nacle ca bidao' neche bicze bi de
chlebele. Can' zjanac bidao' ca', cate' nita'be' gan'
chac ya'a chese' lježbe': “Ba bcuežto' bžejo, neca
bya'ale, na' ba bilyaše'to', neca gwchežle.” ³³ Juan
ben' chzoa be_ne' nis bide' laole nga, bitw güe'ej
gwdagwšagüe' can' chese'ej chesagw be_ne' yoble,
na' neca güe'ej vino, nach gwnale che': “Yo'o nyaz
da' xigüen' yichjlažda'ogüe'.” ³⁴ Na' neda', chle'ele
che'ej chagua' can' chese'ej chesagw be_ne' yoble,
na' žale chia' naca' be_ne' lia na' be_ne' borrašw,
neda' naca' ben' gwse_la' Diosen' golja' be_načh. Na'
lecze žale naca' migw che be_ne' güechixjw ca' na'
migw che nochle be_ne' güen da' xinj. ³⁵ Perw
na' be_ne' chosozenag che Diosen' zjanape' to

yela' sina' na' chesone' cont nachbia' Diosa' naque' la'zelagüe' bene' sina'.

Jesúsen' gwyeje' liž Simón bene' fariseo

³⁶ To bene' fariseo goxe' Jesúsen' šeje' liže' cont yesagüe'. Na' bžin Jesúsen' liž bena' na' gwchi'e cho'a mesen'. ³⁷ Na' to no'ole lo ciudan', no'ole zle', gwnezde' bžin Jesúsen' liž bena'. Na' Jesúsen' len bene' ca' yezica'chle ba nite' cho'a mesen' cont yesagüe', cate' bžin no'olen'. Na' no'olen' noxe' to da' nac de yejese da' yože set da' la'zelaoze chla' zix. ³⁸ Na' jabigue' gala'ze xni'a Jesúsen' na' gwcheže' na' nis xchež chen' bžonen ni'a Jesúsen' gwbsen. Na' bxie' ni'ena' len yiša' yichje' na' bnopen' na' gwdeben' set zixen'. ³⁹ Na' ben' goxe' Jesúsen' ližen', cate' ble'ede' can' chon no'ola' na' gocde': "Šaca' benga naque' to bene' choe' xtiža' Dios, guache'ede' no'olen' chgan ni'ena' naque' no'ole zle'". ⁴⁰ Nach Jesúsen' gože'ne':

—Simón, de to da' che'nda' yapa' le'.

Nach Simónna' gože' Jesúsen':

—Gwnan Maestrw.

⁴¹ Jesúsen' gože'ne':

—Gwzoa to bene' na' nita' chope bene' chesale' xmechue'. Toe' chale' gayo' gayoa mechw da' nzi' denario, na' ben' yeto chale' šiyon mechw lecze denario. ⁴² Na' chopte bene' ca' ne toe' ca de chegaque' cont yesyeyixjue' xyan'. Na' ben' gwlej mechon' gwlejjichje' dan' chesale' chen'. Gwnašč neda', čnoe' bene' ca' chope' gosacchde' che'?

⁴³ Nach Simónna' gože'ne':

—Šeca ben' goc xya chen' da' xench na' gwlejjichjen'.

Jesúsen' gože'ne':

—Da' li can' ba gwnao'na' naquen.

⁴⁴ Nach Jesúsen' gwyečhje' gwne'e no'ola' na' gože' Simónna':

—¿Chle'edo' no'ole nga? Neda' ba gwyo'a ližo' nga na' bi beño' nis chib ni'a, perw no'ole nga ba gwdibe' ni'an' len nis xčež chen' bxien' len yiša' yichje'. ⁴⁵ Bi bnopo' neda', perw na' no'ole nga cate' bla'atia' gwzolagüe' chnope' ni'a nga. ⁴⁶ Bi gwdebo' set yichja', perw no'ole nga ba gwdebe' set zix ni'a nga. ⁴⁷ Na' žia' le', xtole'na' gosaquen da' zan, perw ba bezi'xena' che'. Da'nan' chacchgüede' neda'. Beñe' bi žinlaže' xtole'na' ca xtoła' no'ole nga, cate' yezi'xena' che' bitw gactecde' neda'.

⁴⁸ Nach gože' no'olen':

—Ba bezi'xena' xtoło'na'.

⁴⁹ Nach beñe' ca' chesagw len Jesúsen' txen lo mesen' gwzolač chese' lježe':

—¿Nox bengä chacde' le'na' chezi'xene' xtoła' beñachen'?

⁵⁰ Nach gož Jesúsen' no'ola':

—Dan' chejnilažo' neda' da'nan' ba de yela' mban chio' toli tocañe. Beyej to šagüe' to güen.

8

No'ol ca' gosaclene' Jesúsen'

¹ Na' gwdechle gwyej Jesúsä' zan ciuda na' zan yež jatixjue'ede' diža' güen, gwne' Diosen' nabi'e yichjlaždao' beñe' yosozenague' che'. Na' zja'aclen beñe' šižinw ca' le', beñe' ca' zjanzi' postlw. ² Nach to xonj no'ole lecze zja'aclene' Jesúsen' beñe' ca' ba beyone'. Bale' ba bebeje' da' xigüe' da' zjajo'o

zjanyaz lo' yichjlažda'ogaque' na' yebaľe' ba bey-one'ne' cate' gosacšende'. Na' toe' lie' María bene' Magdala, bebej Jesúsen' gaže da' xigüe' gwyo'o gwyaz yichjlažda'ogüe'na'. ³ Nach ľecze len ben' le Juana, xo'ole ben' le Chuza, na' Chuzan', gwyo'o lo ne'e liž rey Herodes na' yežlio che' ca'. Na' ľecze len ben' le Susana gwyejľene' Jesúsen', na' yezan bene' yezica'chle. Na' no'ol ca' bosochine' bite'teze da' gota' chegaque' cont bosonežjue' dan' byažje Jesúsen' len bene' ca' zjanaque' ľe' txen.

Jempl che bene' goz trigon'

(Mt. 13:1-9; Mr. 4:1-9)

⁴ Na' bene' zan besežag gan' zoa Jesúsen' bene' za'ac to to yež ca'. Na' be'e to jempl, gwne':

⁵ —To bene' güen žin jeze' trigw na' šlac zeje' chose' trigon' late' biñ jasechazen do cho'a nezen', na' bosolej bosošošj bene' len, na' be žia xil be chaš ľe'e yaba gosagwban'. ⁶ Yelaten' jasechazen ga nac lo yej, na' cate' beselan' na' gosebižen, ľe gague bi gopa' den'. ⁷ Yelaten' jasechazen ga nac lo yag yeše', na' gosecha'on txen, na' bosoloľe' yag yeše' ca' len. ⁸ Perw na' yelaten' jasechazen ga nac yo šagüe' na' beselan', na' baľen gosebjan to gayoa güeje.

Na' beyož be'e diža' quinga gwne' zižje gože' ľegaque':

—Le'e žia nagle da' chene, ľe gwzenag xtiža'na'.

Jesúsen' gwne' bixchen' bi'e jempl cate' bzejni'ide' bene'

(Mt. 13:10-17; Mr. 4:10-12)

9 Nach be_{ne}' ca' zjanaque' Jesúsen' txen gosenabde' le' bi zejen jempl da' ba bi'e. 10 Na' gož Jesúsen' legaque':

—Nono na' neze can' nac yela' gwnabia' che Diosen'. Perw ba chone' cont le'e chejnilaže'lene' nezelen. Perw be_{ne}' bi chesaclaže' yesejnilaže'ne', chzejni'igacda'ne' len jempl. Chona' ca' cont yesele'ede' can' chonan' na' bitw yesacbe'ede' bi zejen, na' cont yesende' xtižan' na' bi yesejni'iden'.

Jesúsen' bzejni'ide' bi zejen jempl che be_{ne}' goz trigon'

(Mt. 13:18-23; Mr. 4:13-20)

11 'Na' ca' nac jempl nga zejen quinga: Ca dan' byažen zejen xtiža' Dios. 12 Na' bi_n dan' besego'onen chanezen', zejen be_{ne}' ca' chesende' xtiža' Diosen', perw na' chžin Satanás dan' chnabia' da' xigüe' ca' chebejen xtiža' Diosen' lo' yichjlažda'ogaque' cont bi yesejnilaže' le' na' bi gata' yela' mban čhegaque' to_{li} toca_{ne}. 13 Na' bi_n dan' besego'on ga' nac lo' yej zjanaquen ca' be_{ne}' chesyebede' xtiža' Diosen', perw zjanaque' ca' to da' bibi loe chon, šložga chesejle'e che xtiža' Diosen', na' cate' chac bi da' mal čhegaque' la' chesebejyichjte' xtižen'. 14 Na' bi_n dan' besego'onen ga' nac lo' yag yeše', zejen ca' be_{ne}' ca' ba gosende' xtiža' Diosen', perw šlac zjambane' chesyelal chesyěžejde' na' chese'nde' yeseni'e, na' chesede' chesonteze' con da' žazen čhegaque'. Na' da' qui bi choen' latje yega'an xtiža' Diosen' lo' yichjlažda'ogaque' na' da'nan' bi chesejnilaže' le' ca' cheyala'. 15 Na' da' ca' besego'onen lo' yo šagüen', zejen ca' be_{ne}' cate' chesende' xtiža'

Diosen' chesezi'en chesonen' chęgaque', na' chese-
jnılaže' le' do yichj do laže', na' chesechejde'
bite'tez dan' chac chęgaque' cont chesone' can'
che'ne Diosa'.

Jempl che yi' dan' chguala'cho

(Mr. 4:21-25)

16 Na' Jesúsen' gwne':

—Notno gwguala' to yi' na' gw dosen' to yeso',
na' nęca gwcuáše' yin' xan xcame'. San chde'en
le'e ze'e cont gwsęnin' len yogo'lol beņe' yeso'o lo'
yo'o. 17 Le yogo'lol da' ngaše' chia' neda', lenņa'
gwlo'elaon, na' yogo'lol da' nono nęa' nęze chia', žin
ža yesęzden' na' yesejni'iden'.

18 Le gwzenag da' quinga da' chzejni'ida' le'e,
le note'teze beņe' chzenague' xtiža' Diosen' gwze-
jni'ich Diosen' le', perw na' note'teze beņe' bi
chzenague', da' daon' chacde' ba nęzde', yeca'a
Diosen' len.

Xņa' Jesúsen' len beņe' biše' ca' besežine' gan' zoe'

(Mt. 12:46-50; Mr. 3:31-35)

19 Na' xņa' Jesúsen' len beņe' biše' ca' besežine'
gan' zoa Jesúsen', gosacłaže' yeso'e, perw catec
beņe' zan že' gague goc latje yesežine' lagüe' na'ate.

20 Na' to ben' ze na' gože' Jesúsen':

—Xņa'o len beņe' bišo' ca' zjanite' chy'o na'
chesacłaže' yedesęne'e le'e.

21 Na' Jesúsen' gože' legaque':

—Beņe' ca' chosozenag xtiža' Diosen' na'
chesezi'e cho'alao xtižen', beņe' can' zjanaque'
xņa'a na' biša'.

Jesúsen' bcueze' be' bdono' lo nisdao'

(Mt. 8:23-27; Mr. 4:35-41)

²² Na' goc to ža Jesúsen' gwyo'e to lo barcw len be_{ne}' ca' zjanaque' le' txen. Na' gože' legaque':

—Laga'cho yeš_{la}'ale nesdaon'.

Nach bosose'e barcon'. ²³ Šlac zejen lo nisen' gwtas Jesúsen'. Nach gwzolao gwyechj to be' bdono' lo nesdaon', na' gwzolao cheyož nis lo' barcon'. Na' besexožde' yesebiaye'e. ²⁴ Nach bosyosbane' Jesúsen' gose'e le':

—iMaestrw! iMaestrw! Bač chbiayi'cho.

Nach gwyase' na' gwdile' be' bdono' len nesdaon', na' la' gosebe'žiten. ²⁵ Na' gože' legaque':

—iNacxečen' bi chejle'le chia'?

Nach legaque' besežebe' len besyebande'. Nach gose' lježe':

—iNoxe benga? lente be' bdono' na' len nesdaon' chosozenaguen che da' že'.

*To be_{ne}' Gadara yo'o nyaze' da' xigüe'
(Mt. 8:28-34; Mr. 5:1-20)*

²⁶ Na' besežine' laž be_{ne}' Gadara ca', to yež da' chi' šla'a distritw Galilean', laga'cho nesdaon'.

²⁷ Na' cate' bechoj Jesúsen' lo' barcoa', to be_{ne}' lo yežna' jašague' le'. Ba gwža yo'o nyaz da' xigüen' yichjlaždao' bena'. Na' ba chde' con gague bi xe' chazche', na' bich zoe' liže', con ba zoe' do cap-santwle. ²⁸⁻²⁹ Na' be_{ne}' gualaž che' ca' bosocheje' ni'a ne'e len gden na' gosape' le'. Na' da' xigüe' ca' gosonen cont bzojx btine' gden_{na}' zan ni'a. Na' gosonen cont gwyeye' ga nono be_{ne}' zjanla'. Na' bena' cate' ble'ede' Jesúsen' na' bzoa xibe' lagüen'. Na' bosye'e zižje gwne':

—¿Bixchen' chgoša' chlaže' chio' len neda', Jesús? Le' naco' dogualje Xi'in Dios ben' nape' la'zelagüe' yela' gwnabia' xen. Chneyoeda' le' bi gwsaco' neda'.

Gwne' ca' dan' ben Jesús'en' mandadw yechoj da' xigüen' yichjlažda'ogüen'. ³⁰ Nach Jesús'en' gože' da' xigüen' yo'o nyaz yichjlaždao' bena':

—¿Bi lio'?

Nach da' xigüen' gwnan:

—Legión lia'.

Gwnan ca' le' zjanaquen da' zan zjajo'on yichjlažda'ogüen'. ³¹ Nach da' xigüe' ca' gosata'yoen Jesús'a' bi yeselen' lo' yi' gabil. ³² Na' to ya'a da' zoa gala'ze chesaš zan coš chesagwba'. Nach da' xigüe' ca' gosata'yoen Jesús'en' gwnežjue' latje šjaseyo'on yichjlaždao' coš ca'. Na' Jesús'en' bnežjue' latje. ³³ Nach besyechojen yichjlaždao' bena' na' jaseyo'on yichjlaždao' coš ca'. Na' besyeyetjes coš ca' le'e ya'a gan' nita'ba' na' jaselažo'ba' lo' nisdao' ga gosatba' gose'ejba' nis.

³⁴ Na' bene' ca' chosoyoe' cošen' besele'ede' dan' ba goquen' bosyoxonje' jasyeyeže' bene' lagüe yež len bene' chaš yixe', gose'e legaque' can' ba goquen. ³⁵ Nach ja'ac bene' jaseñe'e bixen' goc. Na' cate' besežine' gan' zoa Jesús'en' besele'ede' bena' ba gwyo'o gwyaz da' xigüen', na'a ba chi'e gala'ze cuit Jesús'en' nyaz xalane', na' ba bezoa yichjlažda'ogüe' binlo. Na' besežebe'. ³⁶ Na' bene' ca' besele'ede' can' goquen' goso'e diža' che dan' goc che bena' gwyo'o gwyaz yichjlažda'ogüe' da' xigüen' na' can' ba beyaque'. ³⁷ Nach yogo'lol bene' ca' že' gan' mbane yež Gadaran' jasetayoede' Jesús'en' yeze'e lažgaquen', le besežebchgüe'. Nach

Jesúsen' beyo'e lo' barcon' cont yeze'e. ³⁸ Na' bena' beyaque cate' Jesúsen' bebeje' da' xigüe' ca' goso'o gosazen yichjlažda'ogüe', gota'yoede' le' gwnežjue' latje šejlene'ne'. Perw Jesúsen' bi be'e latje, san gože'ne':

³⁹ —Beyej ližo' na' jayež beņe' lo' yo'o chio' yogo' da' güen da' ba ben Diosen' len le'.

Nach beza' ben' na' gwzologüe' cho'e diža' doxen yežen' yogo' can' ba ben Jesúsen' len le'.

Jesúsen' beyone' xi'in Jairo na' beyone' yeto no'ole beņe' gwdane' xe'

(Mt. 9:18-26; Mr. 5:21-43)

⁴⁰ Na' cate' Jesúsen' belague' nisdaon', beņe' zan ba nita' chesebeze' le'. Chesyebechgüede' da' bežine' na'. ⁴¹ Na' bžin to beņe' le' Jairo, ben' nac to beņe' gwnabia' che yodao' che yežna'. Na' bzoa xibe' lao Jesúsen' gota'yoede' le' šejlene' le' liže', ⁴² le' ba zoa gat bi' no'ol che'. Nache' bi' tliša', na' šižinw izguebe'. Na' šlac zej Jesúsen' len le', beņe' zan gosebiadi'e le' na' bosochichgüe' le'.

⁴³ Na' len to no'ole ba goc šižinw iz chzoe' gwbao' na' ba benditje doxen xmechue' len beņe' güen rmed ca'. Na' notno goc gon le' rmed. ⁴⁴ Na' gwbiga' no'olen' cože' Jesúsen' na' gwdane' lox xen', nach la' gwlezte gwbao' dan' zoen'.

⁴⁵ Na' gwna Jesúsen':

—¿Non' gwdan neda'?

Na' ne toe' ca' gosechebe' še ba gosegane' le'. Nach Pedron' len beņe' ca' zja'aclen Jesúsen' gose'e le':

—Maestrw, be_{ne}' zan be_{ne}' za'ac nga choso_{chie}' le' na' choso_{žigue}' le' nile na'le. ¿Bix_{chen}' ch_nabo' no gwdan xaon'?

⁴⁶ Nach Jesúsen' go_{že}' lega_{que}':

—To be_{ne}' ba gwdane' neda'. Chacbe'eda' ba beyacde' len ye_{la}' guac _{chia}'na'.

⁴⁷ Nach no'olen' cate' go_{che}'ede' cbi bga_{še}' dan' benen', nach gwbigue' lao Jesúsen' do cha_ž ch_{že}be' na' bzoa xibe' lagüe'na', be'e di_{ža}' lao yogo' be_{ne}' ca' _{že}'na' bix_{chen}' gwdane' le' na' can' goc _{la}' beyactede'. ⁴⁸ Nach go_ž Jesús'a' no'ola':

—Xi'ina', ba beyacdo' dan' chejnila_{žo}' neda'. Beyej bin_o.

⁴⁹ Ne' choe'te Jesús'a' di_žan' ca' cate' b_žin to be_{ne}' gwza' li_ž Jairo je_{že}' le':

—Ba got bi' no'ol dao' _{ch}ion'. Bich gondo' Maestroa' zed.

⁵⁰ Perw cate' bene Jesúsen', na' go_{že}' Jairo:

—Bitw _{že}bo', con gwyejnila_{že}' neda' na' yeya_{que}be'.

⁵¹ Na' cate' bese_žine' li_ž Jairona', Jesúsen' bi be'e latje yeso'o zan be_{ne}' ca' zja'aclen _{le}', san Pedro, len Juan, len Jacobo, na' len xax_na' bi' guat na'ze goso'o. ⁵² Na' ba chi'chgua _{žaš} na' yogo' be_{ne}' ca' _{že}'na' chesebe_žchgüe'. Na' Jesúsen' go_{že}' lega_{que}':

—Bitw cue_žle. Bi_na' gatbe', san chtasbe'.

⁵³ Na' bosoxi_{že}' goson_{le}' _{che}' da' zja_{ne}zde' ba gotbe'. ⁵⁴ Perw Jesúsen' be_xue' taca' bi' no'ol guaten' na' bo_l güi_{že}'be' go_{že}'be':

—No'ol dao', beyas.

⁵⁵ Nach bebambe', _{la}' beyastebe'. Na' Jesúsen' bene' mandadw yeso'ebe' da' gagwbe'. ⁵⁶ Na'

xaxna'be' besyebanchgüede'. Perw Jesúsén' bene' mandadw bi yeso'e diža' can' goca'.

9

Jesúsa' gwsele' bene' šižinw ca' jasedixjue'ede' xtižen'

(Mt. 10:5-15; Mr. 6:7-13)

¹ Jesúsén' botobe' bene' šižinw ca' gwleje' cont zjanaque' le' txen na' bnežjue' legaque' yela' gwnabia' na' yela' guac cont goc besyebeje' da' xigüe' lo' yichjlaždao' bene', na' lecze ca' besyeyone' bene' ca' chesacšene. ² Na' lecze bene' mandadw šjasedixjue'ede' Diosa' nabi'e yichjlaždao' bene' yosozenag che'. Na' bene' mandadw yesyeyone' no bene' güe'. ³ Na' gože' legaque':

—Bibi goxe'le tnez. Bitw goxe'le xis da' gwčhiše'le, neca gua'le bzod, ne yet, ne mechw, na' bitw gua'le yeto xcamisle. ⁴ Cate' žinle to liž bene', na'ze yega'anle šlac zoale lagüe yeža'; cate'ch yeza'le yeža', cana'ch yeza'le latja'. ⁵ Na' še zoa ga bi yosolebe' le'e, cate' yeza'le na', le cuibe ni'alen' yo bište cont nacbia' malen' chesone' bi chosozenague' xtiža' Diosen'.

⁶ Nach bene' šižinw ca' ja'aque' to to yež, na' gate'teze ja'aque' jasedixjue'ede' diža' güen che Jesúsén' na' besyeyone' no bene' güe'.

Ba gosote' Juan ben' bzoa bene' nis

(Mt. 14:1-12; Mr. 6:14-29)

⁷ Na' gobernador Herodes goque' tole bende' yogo'lo' da' güen da' chon Jesúsén'. Gocžejlaže', le bal bene' gose'e le' ba beban da' Juan ladjo bene' guat ca'. ⁸ Na' yebale' gosene' šeca da' Elías

ben' be' xtiža' Diosen' cani' ba bela' yežlio nga da' yoble. Yebale' chesene' yeto bene' be' xtiža' Diosen' cani'te ba bebane' ladjo bene' guat ca'.
 9 Na' Herodesen' gwne':

—Neda' bena' mandadw gosechogue' yen Juanna', perw čnoxen' chon da' güen ca dan' chesoe' bene' diža'?

Na' gwdiljwlaže' nacle gone' cont le'ede' Jesúsen'.

Bguagw Jesúsen' gayo' mil bene'

(Mt. 14:13-21; Mr. 6:30-44; Jn. 6:1-14)

10 Na' cate' besyežin postlw ca' gan' zoa Jesúsen' nach gose'e le' can' ba gosonen'. Na' gwčhi'e legacze' na' ja'aque' to latje gan' mbane yež Bet-saida. 11 Cate' gosacbe'e bene' ca' nita' gan' zoa Jesúsen' ba gosa'aque' len bene' ca' zjanaque' le' txen, nach zja'aque' zjana'ogüe' legaque'. Jesúsen' blebe' legaque' na' bsed blo'ede' legaque' Diosen' nabi'e yichjlaždao' bene' yosozenag che', na' bey-one' bene' ca' chesacšene.

12 Cate' gwzolao gwxa gwbizen', nach bene' šižinw ca' zjanaque' Jesúsen' txen gose'ene':

—Besela' bene' quinga cont šjaya'aque' ga že' bene' do ranšw na' do yež ca' dan' nyechj mbi'i cont yeseyiljue' ga yesetase' na' yeseyiljue' da' yese'ej yesagüe', le ca nac latje gan' zoacho nga, naquen to latje daš.

13 Perw na' gož Jesúsen' legaque':

—Le'e le güe'e da' yesagüe'.

Na' gose'e le':

—Gayo'ga yetextil na' yechopga bel ya'a de checho, lete še si'chon cont gaquen yesagw yogo'lol bene' quinga.

14 Gosene' ca' le že' ca gayo' mil bene' byo, bi cuent no'ol ca' len bidao'. Nach Jesúsen' gože' bene' ca' zjanaque' le' txen:

—Le gon mandadw yesebe' šiyon güej bene' ca'.

15 Nach gosone' mandadw gosebe' yogo' bene' ca', 16 na' Jesúsen' gwxi'e gayo' yetextilen' na' chope bel ya'ana', na' gwne'e yabale, be'e yela' choxcen che Diosen' na' bzojjen' na' be'en bene' šižinw ca' cont goso'e che to to bene' ca'. 17 Na' gosagüen' ca goseljde'. Nach bososše'e šižinw žome len yetextil bixjw na' len late' güeje bel da' bega'an.

*Pedron' gwne' Jesúsen' naque' bene' gwsel'a' Dios
(Mt. 16:13-19; Mr. 8:27-29)*

18 Na' gozac yeto, bene' ca' zjanaque' Jesúsen' txen zjanite' len le' lchojiže, na' Jesúsen' chol güiže' Diosen'. Nach gože' legaque':

—¿Bi chesena bene'? ¿Non' naca' neda'?

19 Na' gose'e le':

—Bale' chesene' naco' da' Juan ben' bzoe' bene' nis. Na' yebale' chesene' naco' Elías ben' be' xtiža' Diosen' cani'. Na' yebale' chesene' naco' yeto bene' be' xtiža' Diosen' cani' ben' ba beban ladjo bene' guat ca'.

20 Nach gože' legaque':

—¿Chixe le'e? ¿No žale naca'?

Na' gož Pedron' le':

—Len' naco' Cristo ben' gwlej Diosen' cont yedenabi'o.

*Jesúsen' gwduxjue'ede' gate'
(Mt. 16:20-28; Mr. 8:30-9:1)*

²¹ Nach Jesúsen' gože' legaque' nono yese'e naque' ben' gwlej Diosen' cont yedenabi'e. ²² Na' gože' legaque':

—Da' zan da' saca'zi'a, neda' naca' ben' gwsela' Dios golja' benach. Na' bene' gole blao ca' chesen-
 abia' nación chechon' na' bxoz gwnabia' ca', na' bene' ca' chososed chosolo'e ley dan' bzoj da' Moisés, bi yesele'ede' neda' güen dan' bi gosejle'e chia', na' yesote'nda', perw yeyon ža yebana' ladjo bene' guat ca'.

²³ Nach gože' yogo' bene' ca' zjanaque' le' txen:

—Note'tez bene' še chaclaže' gaque' neda' txen, cheyala' cuejyichj cuine' yogo' ža, la'czla' saca'zi'e, na' gone' can' nia' neda'. ²⁴ Note'tez bene' chacde' gone' cont bi saca'zi'e o cont nono yesot le', benan' cuiayi'. Na' note'teze bene' chzanlaže' cuine' saca'zi'e o gate' ne chia' neda', ba de yela' mban che' toli tocanē. ²⁵ ¿Bixe zejenna' to bene' nabi'e doxen yežlion' še cuiaye'e na' bi gata' yela' mban che' toli tocanē? ²⁶ Na' note'tez bene' še cheto'ede' par ye'e lježe' chejnlaže' neda' na' še cheto'ede' par gwzenague' xtižan', lecze ca' neda' yeto'eda' che' par nia' naque' neda' txen, neda' naca' ben' gwsela' Diosen' golja' benach. Yeto'eda' che' cate' yida' da' yoble nsa'a yela' zaca' juisyw chia' na' yela' zaca' juisyw che Xa' Diosen' na' che ben' zjanac angl che'. ²⁷ Da' li žia' le'e, balle nita'le nga na'a bina' gatle cate' žin ža le'ele gwlo'e Diosen' yela' gwnabia' chen'.

Jesúsen' goque' ca to be'ni'
 (Mt. 17:1-8; Mr. 9:2-8)

28 Nag goc to xman gwna Jesúsena' ca', gwyeye' to lo ya'a jel güize' Diosena' na' gwche'e Pedro len Juan len Jacobo. 29 Na' šlac chol güize' Diosena' goc cho'alagüen' ca da' bža'. Na' xalanen' beyaquen šiš xila' na' goctiten. 30 Na' lo hora' besežin chop bene' gan' zoa Jesúsena', toe' da' Moisés na' yetoe' da' Elías bosošaljlene' le'. 31 Goso'e diža' gosene' ba zoa gat Jesúsena' Jerusalén. Na' be'ni' che Diosena' gwyechjen bsenin' legaque'. 32 Na' Pedron' len bene' ca' yehope leca gosac ša tase' perw bi gose-tase' na' besele'ede' Jesúsena' chactit cho'alagüen' na' zeche' choe'lene' da' Moísesena' len da' Elíasena' diža'. 33 Na' cate' ba cheza' da' Moísesena' len da' Elíasena', Pedroa' gože' Jesúsena':

—jMaestrw, leca güenna' zoacho nga! Gonto' šone ranšw, to chio', to che Moisés, na' yeto che Elías.

Con gwne' ca' sin ca bene' xbab. 34 Ne' choe'te Pedron' diža' cate' to bejw gwyechjen legaque' na' besežebe' lagüe dan' goc ca'. 35 Na' lo' bejon' gosende' gwne' Diosena', gwne':

—Benga Xi'ina' ben chacda'. Le gwzenag che'.

36 Na' cate' beyož gwna Diosena' ca', besele'ede' yetoze Jesúsena'. Na' ca' beyoža' bibi diža' gosoe'lene' bene' ca' yezica'chle can' nac dan' ba gosende' na' dan' ba besele'ede'. Con gosenita'teze' šižize.

*Beyon Jesúsena' to bi' gwyo'o gwyaz da' xigüe'
(Mt. 17:14-21; Mr. 9:14-29)*

37 Na' beteyo cate' ba besyeyetje' ya'ana' bene' zan jasešague' legaque' gan' nite'na'. 38 Na' toe' gwne' zižje, gože' Jesúsena':

—Maestrw, chata'yoeda' le' gaclenšco' xi'ina' nga. Nacbe' xi'ina' tliša'. ³⁹ Chniz da' xigüen' lebe' na' la' chgosya'aten lebe', chonen cont chazbe' šon na' cont chžia bžina' cho'abe' na' chonen lebe' zi', na' cañe chsanen lebe'. ⁴⁰ Ba gota'yoeda' beñe' ca' zjanaque' le' txen cont yesyebeje' da' xigüen' yo'o nyazbe', perw bitw gosezaque'de'.

⁴¹ Nach Jesúsen' gože' beñe' ca' že' na':

—¡Le'e beñe' bi chejnilaže', chonchguale clele! ¿Šna chyažjen soalena' le'e cont šejnilaže'le? ¿Batca' zelao na'lagua' le'e?

Nach gože' xa bidao'na':

—Ben bidao' chion' nile.

⁴² Na' šlac zjasane'be' lao Jesúsen', da' xigüen' benen cont gwyazbe' šon, na' bchix btoleñ lebe' lo yo. Na' Jesúsen' gwdile' da' xigüen' cont bechojen lo' yichjlažda'obe'. Nach beyaquebe'. Gwdena' beyone'be' lo na' xabe'. ⁴³ Na' yogo' ben' že'na' besyebande' cate' besele'ede' yela' guac che Diosen'.

*Da' yoble Jesúsen' gwdixjue'ede' gate'
(Mt. 17:22-23; Mr. 9:30-32)*

Na' besyebande' che yogo'lol dan' chon Jesúsen', na' šlac nite' ca', Jesúsen' gože' beñe' ca' zjanaque' le' txen:

⁴⁴ —Le gon cont diža' nga šo'on yichjlažda'ole, na' bi ganlaže'len. Neda' gaca' lo na' ben' chesegue'enda', neda' naca' ben' gwsela' Diosen' golja' beñach.

⁴⁵ Perw legaque' bitw gosejni'ide' diža' dan' be' Jesúsen', le naquen ca to da' ngaše' len legaque'. Na' besežebe' yesenabde'ne' bi zejen dan' gože' legaquen'.

*Gosacyože' noe' nacch blao**(Mt. 18:1-5; Mr. 9:33-37)*

⁴⁶ Na' beṇe' ca' zjanaque' Jesúsen' txen gosacyože' noe' nacch blao. ⁴⁷ Jesúsen' gocbe'ede' xbab dan' chesonen', na' beṇue' to bidao' na' bzeche'be' cuite'na' ⁴⁸ na' gože' legaque':

—Note'teze beṇe' chone' güen len to bidao' ca bi' nga neche da' chejnilaže' neda', choncze' güen len neda'. Na' note'teze chon güen len neda' choncze' güen len Dios ben' gwsela' neda'. Na' note'tez le'e cate' chonle xbab che cuinle bibi zaca'tecle, canan' ba nacle beṇe' blao.

*Beṇe' bi chon contr chio' txenczen' chone' len chio'**(Mr. 9:38-40)*

⁴⁹ Nach Juanna' gože'ne':

—Maestrw, bežagto' to beṇe' cho'e lao' na' chebeje' da' xigüe' da' yo'o nyaz beṇe'. Na' bžonto' gone' ca', le bi chone' chio' txen.

⁵⁰ Nach Jesúsen' gože'ne':

—Bitw gwžonle gone' ca', le še to beṇe' bi chone' contr chio', txenczen' chone' len chio'.

Jesúsen' gwdile' Jacobo len Juan

⁵¹ Na' lagüe' ba zoa bagwze yezi' yeca'a Diosen' le', bechoglaže' šje' Jerusalén. ⁵² Na' gwsele' to chope beṇe' gosebialao lagüe'na'. Na' ja'aque' to yež gan' mbane distritw Samaria cont šjasesiṇi'e gan' soa Jesúsen' len beṇe' ca' zjanaque' le' txen. ⁵³ Perw beṇe' Samaria ca' bi bosolebe' Jesúsen' len beṇe' ca' nžague', le gosache'ede' zja'aque' Jerusalén. ⁵⁴ Na' chope beṇe' ca' zjanaque' Jesúsen'

txen, Jacobon' len Juanna', cate' besele'ede' can' goson bene' Samaria ca', nach gosenabde' Jesúsén':

—Maestrw, ¿che'ndo' gonto' can' ben da' Elías ben' be' xtiža' Diosen' cani', nabeto' Diosen' sele' yi' gwzeyen bene' qui?

⁵⁵ Nach Jesúsén' gwyechje' gwdile' legaque' gwne':

—Le'e bitw nezele non' chnabia' yichjlažda'ole.

⁵⁶ Neda' bitw za'a cont gwžiaya'a benach, san za'a cont gwnežjua'ne' yela' mban toli tocanē, neda' naca' ben' gwsela' Diosen' golja' benach.

Nach ja'aque' yež yoble.

Can' gož Jesúsén' bene' ca' gosaclaže' yesaque' le' txen

(Mt. 8:19-22)

⁵⁷ Šlac zja'aque' na', to bene' gože' le':

—Sa'lena' le' gate'teze šejo'.

⁵⁸ Nach gož Jesúsén' le':

—Nita' xišna' beza' na' lecz chesyežin xišna' be dao' ca' zjazoa xil be chaš le'e yaba, perw bibi xišna' neda' de ga yezi'laža', neda' naca' ben' gwsela' Diosen' golja' benach.

⁵⁹ Nach Jesúsén' gože' yeto bene':

—Yo'o len neda'.

Perw bena' gože' le':

—Xana', za' got xa'. Benšca latje zgua'tec šjaycuaša'ne'.

⁶⁰ Na' gož Jesúsén' le':

—Bene' ca' zjanac yichjlažda'ogüe' ca che bene' guat, legaque' guacze yosocuaše' yezica'chle bene' guat. Perw le', jatixjue'e bene' Diosa' nabi'e yichjlaždao' bene' yosozenague' che'.

⁶¹ Nach lecze yetoe' gože' Jesúsén':

—Sa'lena' le' Xana', perw zgua'tec šjayzenda' xaxna'a len diaža chia'.

⁶²Jesúsen' gože' le':

—Beñe' ba gwzolaog nagüe' neda', še bi ze'e do yichj do laže', o še yo'o yichje' da' ba gwdele, bi zaque' gone' xšin Diosen'. Naque' ca to beñe' chñe'e coscože'le šlac chgua'ane' go'n.

10

Jesúsen' gwsele' gayonši beñe' šjasedixjue'ede' xtiže'

¹Na' gwdechle Xancho Jesúsen' gwleje' yegayonši beñe' na' bene' mandadw yesebialagüe' šja'ac čhope güeje' to to yež ga za' šej le'. ²Na' cate' za' yesa'aque' gože' legaque':

—Chyažje beñe' zan yeseyixjue'ede' xtiža' Diosen', perw to čhoga beñe' nita' yeseyixjue'eden'. Na' beñe' yosozenag čhe Diosen' zjazaca'lebe' ca to coseš xen da' chyažje yedobe. Da'nan' le nabe Xancho Diosen' sela'che' beñe' yesaclene' chio' yotobcho coseš čhen'. ³Le šja'ac, le neda' chsela' le'e šjatixjue'ele xtižen' len beñe' ca' chesegue'ede' le'e. Zaca'leble ca xila' dao' ben' chja'ac gan' že' beco'yo. ⁴Bitw gua'le bzod, ne mechw, ne yel, na' bi šele guaple beñe' tiox beñe' yežagle chanez. ⁵Note'tez liž šo'le zgua'tec nale: “Chñablaže'šca' soa cuezle binlo len xbab dan' yo'o lo' yichjlažda'ole, le'e nita'le nga.” ⁶Na' še zoa to beñe' chaclaže' soa cueze' binlo len yichjlažda'ogüe'na', nach gac can' gwñablaže'le cont soa cueze' binlo; perw še nono zoa beñe' chaclaže' soa cueze' binlo len yichjlažda'ogüe', bi gac dan' ba gwñablaže'len'. ⁷Na' lo' yo'o na'teze

yega'anle. Bitw tale to to yo'o. Le ye'ej le gagw bite'teze da' chesone' ye'ej gagwle. Ca to bene' güen žin cheyała' si' laxjue', lecz ca' le'e zaca'le yesone' da' ye'ej gagwle. ⁸ Na' cate' žinle to yež ga chesonxene' le'e, le ye'ej le gagwteze da' yesone' le'e. ⁹ Le yeyon bene' güe' bene' nita' yež gan' žinle, na' le' ye'e: “Ba bžin ža gwzenagle che Diosen' cont nabi'e yichjlažda'ole.” ¹⁰ Perw na' cate' žinle to yež ga bi yosolebe' le'e, le šja'ac la cay na' le ye'e: ¹¹ “Bište che lažle nga da' žia ni'ato', cuibton' cont gwlo'eto' le'e malen' chonle bi chzenagle xtiža' Diosen' dan' choe'to'. Perw chyixjue'eto' le'e Diosen' chazlaže' gwzenagle che' cont nabi'e yichjlažda'olen'.” ¹² Da' mal xen goson bene' ciuda Sodoma cani', perw žia' le'e, žan' gac juisyw bene' ca' bi bosolebe' le'e ližen', yesale'chde' clal ca bene' Sodoman'.

Bene' ca' bi chosozenag xtiža' Jesúsen'
(Mt. 11:20-24)

¹³ Nach gozna Jesúsen':

—jNyaše'chguaze gac che le'e bene' Corazín! jNyaše'chguaze gac che le'e bene' Betsaida! Bene' ca' nita' Tiro na' Sidón ba' besyetiñjde' xtoła'gaque' šaca' blo'egacda'ne' yela' guac chia' ca da' ba blo'eda' le'e. Na' bosoše'e ca gosone' šaca' bena' ca', chesazlje' to lache' gasj da' naquen zeše' na' chosože'elja cuine' no de cont yesacbe'e bene' ba boša' yichjlažda'ogüen'. ¹⁴ Saca'zi'chle clal ca bene' že' Tiro na' Sidón cate' žin ža gac juisyw. ¹⁵ Le'e nita'le yež Capernaum chonle xbab šeca Diosen' gončgüe' le'e yela' bala'an. Bi gone' le'e yela'

bala'an san gone' le'e castigw toli tocane dan' bi chejle'le chia'.

¹⁶ Nach Jesúsen' goze'e bene' gayonši ca':

—Bene' gwzenag xtiža'len' lecze gwzenague' xtiža'na', na' bene' goncze yichjlagüe' bi gwzenague' xtiža'len', lecze bi gwzenague' chia' neda'. Na' bene' goncze yichjlagüe' bi gwzenague' xtiža'na', lecze bi gwzenague' xtiža' Diosen' ben' gwsela' neda'.

Besyežin bene' gayonši ca'

¹⁷ Bene' gayonši ca' cate' beyož jasedixjue'ede' xtiža' Jesúsen', besyežine' gan' zoen' na' besyebchgüede'. Nach gose'e Jesúsen':

—Xanto', chebechgüeto' can' goquen', le da' xigüe' ca' chosozenaguen cheto' cate' chonto' mandadw yesyechojen lo' yichjlaždao' bene' choe'to' lao'.

¹⁸ Na' gože' legaque':

—Ble'eda' bedao'nez gwnit yela' gwnabia' che Satanásen' dan' chnabia' da' xigüe' ca'. ¹⁹ Ba beña' le'e yela' guac cont gwlej gwšošjle no bel' znia na' no beḅjoni' na' cont soele Satanásen' bi gonen le'e gan. Na' bibi de da' gonen le'e zi'. ²⁰ Perw bi yebele neche da' xigüen' chosozenaguen chele, san le yebe da' ba bzoj Diosen' lale le'e libr gan' nyoj la yogo'lol xi'ine' ca'.

Bebechgüe Jesúsen'

(Mt. 11:25-27; 13:16-17)

²¹ Za' beyožte gwna Jesúsen' ca' nach ben Spiritw che Diosen' cont bebechgüede' na' bol' güiže' Diosen', gwne':

—Xa', le' chnabi'o beṇe' ca' že' yaba na' yežlion'. Na' chona' yeḷa' choḡcḷen chio' ba bzejni'ido' baḷ beṇe'. Ba bzejni'ido' beṇe' ca' gosacbe'ede' cheseyažjde' no gwsed gwlo'e ḷegaque'. Na' bitw bzejni'ido' beṇe' ca' cheson xbab zjanaque' beṇe' sina' na' beṇe' zjanejni'i. Beno' ca' Xa', le can' gwyazlažo'.

²² Nach gože' beṇe' ca' že'na':

—Xan' ba bene' lo na' chona' cont chombia' beṇe' le'. Le' nombia'yaṇe' neda', na' neda' nombia'yaṇa' le'. Na' beṇe' ca' ba gwleja' ba zjanombi'e Xan'. Na' nono nochle zjanombia' Xa' ṇe neda'.

²³ Na' gwyechj Jesúsen' gwṇe'e beṇe' ca' zjanaque' le' txen na' gože' ḷegaque':

—Mbachgua zoale chle'ele neda' na' chle'etele da' ca' chona'. ²⁴ Na' chnia' le'e zan beṇe' ca' goso'e xtiža' Diosen' cani' len beṇe' zan rey gosacḷaže' yesele'ede' dan' chle'ele ṇa'a, perw bitw goḷa' yesele'eden', na' gosacḷaže' yesende' dan' chene-len', perw bitw goḷa' yesenden'.

Jempl che to beṇe' güen, beṇe' Samaria

²⁵ Na' gwzoža' to beṇe' nsedchgüe' ley dan' bzoj da' Moisés, gocḷaže' cueje' Jesúsen' diža' da' gwḷchine' contr le' na' gože'ne':

—Maestrw, ¿bi da' cheyaḷa' gona' cont gata' yeḷa' mban chia' toḷi tocaṇe'?

²⁶ Na' gož Jesúsen' le':

—¿Bi nyoj le'e ley na'? ¿Nac žan?

²⁷ Na' ben' chejni'ichgüe' ley na' boži'e xtiža' Jesúsen', gože' le':

—Ley che Diosa' žan: “Cheyaḷa' gaquecho Xancho Diosen' con ca zelao chejni'icho, do yichj

do laže'cho, do fuers valor checho, na' gaque lježcho ca chaque cuincho.”

28 Nach gož Jesúsen' le':

—Da' licze can' ba gwnao'na'. Can' cheyała' gono' cont bano' toli tocane.

29 Na' bena' goclaže' gwlo'ede' choncze' can' ža leyna', na' gože' Jesúsen':

—¿Non' nac beŋe' lježa' ben' cheyała' gacda'?

30 Na' Jesúsen' gože' le':

—To beŋe' beza' Jerusalén par yežine' yež Jericó, jasyexen beŋe' gwban le'. Na' goseyine' xałane' na' gosot goseyine' le'. Nach besyeya'aque' bosocua'ane' le' cacze to beŋe' guat. 31 Na' to bꞑoz che beŋe' Israel ca' gwđie' lo' neza', na' cate' ble'ede' bena' dena', nach gwcuase' to šla'ale neza' na' con gwdeze'. 32 Lecz ca' ben to diaža che da' beŋe' Leví ca'. (Xi'ın diaža che da' Leví yo'o lo' na'gaque' chesone' mandadw lo' yodao' blao.) Bena' zeje' tnez na' cate' ble'ede' ben' dena', na' gwcuase' to šla'ale neza' na' con gwdeze'. 33 Nach to beŋe' Samaria ngü'e'e neza' nłague' xpurrue' na' bžine' gan' de bena', perw na' le' cate' ble'ede' ben' beyaše'laže'. 34 Na' gwbigue' gan' de' na' bene' le' rmed, bšone' set len vino lao güe' che'na' na' bchejen' lache'. Na' božie' le' cože' xpurrue' na' beche'e le' ga zoa to mesón ga gwŋe'e le'. 35 Na' beteyo cate' beza' beŋe' Samaria, gwleje' mechw da' zaca' ca chop ža žin na' bnežjuen' xan mesónna' ca laxjue', na' gože' le': “Gwŋa' benga na' še žan bichle da' gono' gastw na' chixjuan' cate' zeza'a.”

³⁶ Beyož be' Jesúsen' diža' can' goc che ben' jasyexen bene' gwban ca', nach gože' bena' chsed chlo'e leyna':

—¿Nac chono' xbab? ¿No bene' ca' šone gocde'ne' ca bene' lježe'?

³⁷ Nach bena' chsed chlo'e leyna' gože' Jesúsen':

—Bena' beyaše' beži'ilaže'de' bena' jasyexen gwban ca'.

Nach gož Jesúsen' le':

—Lecze ca' cheyała' gono' le', yeyaše' yeži'ilaže'do' yogo'lol bene'.

Jesúsa' jane'e Marta na' María

³⁸ Na' gosego'oche' nez na' besyežine' to yež ga zoa to no'ole lie' Marta, na' Jesúsen' gwyeje' liže'na'.

³⁹ Na' zoa to bile' le María. Na' Marían' gwchi'e cuit Jesúsen' bzenague' xtiže'na'. ⁴⁰ Perw na' Martan' belalchgüede' bsini'e da' yesagüe'. Na' gwyeje' lao Jesúsen' na' gože' le':

—Xana', ¿bi chacdo' median can' bcua'an bene' bilan' neda' toza' len mandadua'? Benšca mandadw gaclene' neda'.

⁴¹ Xancho Jesúsen' gože' le':

—Marta, chi'chgua yichjo' mandadua' na' chacžejlažo' dan' nyančguan. ⁴² María nga ba gwleje' da' naquech da' güen. Chi'e chzenague' chia', na' notno gwžon gone' ca', le len da' nacch da' žialao da' cheyała' gonle.

11

Jesúsen' blo'ede' can' yosoł güiže' Diosen'
(Mt. 6:9-15; 7:7-11)

¹ Na' gwzoa Jesúsa' to latje chol güiže' Diosen'. Cate' beyož bol güiže'ne' to bene' ca' zjanaque' le' txen gože' le':

—Xanto', bzejni'i neto' nac cheyala' yol güižto' Diosen', can' bzejni'i da' Juanna' bene' ca' gosaque' txen len le'.

² Na' Jesúsen' gože' legaque':

—Cate' yol güižle Diosen', quinga nale:

Xato' bene' zoa yaba,

chnabto' yogo'lol bene' yesonxene' le'.

Zelaže'to' nabi'o yichjlaždao' yogo' neto' benach.

Gacšca can' chazlažo' yežlio nga can' chac yabana'.

³ Ca nac dan' che'ej chagwto' tža tža, beňšca četo' na'a.

⁴ Na' bezi'xenšca četo', le lencze neto' chezi'xento' che ljež benachto' bite'tez da' chesonde' neto'.

Na' bitw go'o latje soa da' gwžigan' neto' gonto' da' mal,

san bcuase bcue'ejšca neto' len da' mala'.

⁵ Nach gož Jesúsen' legaque':

—Le gon xbab še šejle liž bene' migw čele do chel na' ye'lne': “Migw chia', beňšca neda' šone yetextil. ⁶ Ba bla' to bene' migw chia' bene' za' zito',

na' bibi de chia' da' gua'ane' gagüe'.” ⁷ Na' chixe še migw čelen' yo'e lo' yo'ote yoži'e xtiža'len': “Bitw gondo' neda' zed, le ba nyeyjw cho'a yo'o na' ba

deto' chtasto' len bi' četo' ca'. Bi gac časa' gona' dan' chyažjdo'.” ⁸ Chnia' le'e, la'czla' naque' migw čele,

bitw ye'nde' chase' gone' dan' chyažjele, perw še gata'yoelne' sša na' chasšaze' gone' bite'tez da' chyažjele. ⁹ Na' chnia' le'e, še žan bi da'

chyažjecho, chnabchon. Še žan to da' chaclaže'cho

želecho, chyiljwchon. Še žan chaclaže'cho saljw beņe' cho'a yo'o che', na' necho cho'a yo'on cont saljue'. Na' ca'cze cheyaļa' ye'le Diosen' cate' bi da' chyažjele o bi da' chaclaže'le gone'. ¹⁰ Na' note'tezle še bi da' nabelene', goņczen'. Na' še bi dan' che'nele gwzejni'ide' le'e, gwzejni'iczdēn'. Na' note'tezle še žan chaclaže'le gac to da' gac, yoļ güižle Diosen' can' chon to beņe' chņie' cho'a yo'o, nach Diosen' gone' cont gacczen.

¹¹ 'Na' le'e nacle xa bidao', še xi'inle nabebe' le'e yetextil, ģgwnežjwlebe' to yej? Na' še nabebe' le'e yid beļ gagwbe' ģgwnežjwlebe' to be xigüe'? ¹² Na' še nabebe' le'e to žit gagwbe' ģgwnežjwlebe' to be xjoni'? Cabi gonle ca'. ¹³ La' nacle beņe' mal, nezczele gwnežjo xi'inle to da' güen. Nacchxe güen gon Xacho Diosen' ben' zoa yaba gwnežjue' Spiritw chen' soan lo' yichjlaždao' beņe' chņab len.

Gosene' Jesúsen' bebeje' da' xigüe' len yela' guac che Beelzebú

(Mt. 12:22-30; Mr. 3:19-27)

¹⁴ Gwzoa to beņe' gwyo'o gwyaz da' xigüe' yichjlažda'ogüe' na' benen cont bi goc nie'. Na' Jesúsen' bebeje' da' xigüe' lo' yichjlažda'ogüe'na'. Na' cate' bechoj da' xigüēn', na' goc beņie'. Na' beņe' ca' že'na' besyebanchgüede'. ¹⁵ Perw bale' gosene':

—Beelzebú dan' chnabia' da' xigüe' ca' chacle-nen le' cont chebeje' da' xigüe' zjayo'o zjanyaz yichjlaždao' beņe'.

¹⁶ Na' yebale' cont gosagüe' xya che' gosenabde'ne' gone' to yela' guac da' yesele'ede'le'e yaban' cont yeseņezde' še da' licze Diosa' gwsele'

le'. 17 Perw Jesúsen' gočbe'ede' xbab dan' gosone', na' gože' legaue':

—Ša to gobiern choje' čop šon cuen na' yeyoža' yesedile' legacze', gobiernna' bi sibi'e. Na' še beņe' to lo' yo'o yesechoje' chople na' yesedile' legacze', gague sša yesenite' txen. 18 Na' še Satanásen' dan' chnabia' da' xigüen' len da' xigüe' čen ca' yesechojen chople na' yesedilen, lecze bi sibian', san na' yeyož yedon. Le'e chnale Beelzebún' dan' chnabia' da' xigüe' ca' chaclenen neda' cont chebeja' da' xigüe' zjajo'o zjanyaz yichjlaždao' beņe'. 19 Šaca' naquen can' žalen', lecze zejen dan' chnabia' da' xigüe' ca' chaclenen beņe' lježle ca' chesyebeje' da' xigüe' zjajo'o zjanyaz yichjlaždao' beņe'. Beņe' lježle ca' yese'e le'e clelen' žale. 20 Neda' chebeja' da' xigüe' len yela' guac che Dios, na' dan' chona' ca' chlo'en ba bžin ža Diosen' nabi'e yichjlaždao' beņe' yosozenag che'.

21 'Satanásen' naquen ca to beņe' gual, na' neda' naccha' beņe' gualch. Na' nezele cate' to beņe' gual chape' ližen' len spada, bibi gac che da' de che'. 22 Perw cate' žin to beņe' gualch ca le' na' tillene' le', nach ben' nac beņe' gualch gon gan. Na' que'e spada che ben' da'na' zoe' lez gaclen le' na' ca'atie' bichle da' de che' na' chisen' len beņe' migw che' ca'.

23 'Beņe' bi chone' neda' txen, chone' contr neda'. Na' beņe' bi chaclene' cont yosozenag beņe' yoble chia', zeje diža' chone' par bi yosozenague' chia'.

Da' xigüe'na' yeyo'on da' yoble lo' yichjlaždao' beņe'
(Mt. 12:43-45)

24 'Na' še to da' xīgüe' da' gwyo'o gwyaz lo' yichjlaždao' bene' yechojen, nach lažen nile na'le yeyiljon ga soan mbalaz. Na' še bibi latje želen, nach nan: "Da' yoblecze šjajo'a lo' yichjlaždao' ben' gan' ba gwyo'a." 25 Nach yeyejen da' yoble gan' zoa ben'. Cate' le'en bač cheyone' güen, na' ba zoache' binlo, 26 nach šjaytoben yegaže da' xīgüe' ca' da' zjanacch malech ca len, na' txen yeso'on lo' yichjlažda'ogüe'na'. Na' še bač goc ca', gacch mal che bena' clal ca dan' ba goc che' da' nechw.

Mbalaz nita' bene' ca' chosozenag xtiža' Diosen'

27 Šlac be' Jesúsen' diža' quinga, gwzoa to no'ole gachol bene' ca' že' gan' bsed blo'ede', na' no'ola' gwne' zižje, gože'ne':

—Mbalaz zoa no'ola' gwxañ le' na' bguaže' le'.

28 Perw na' Jesúsen' gože'ne':

—Nacchxe mbalaz nita' bene' ca' chosozenag xtiža' Diosen' na' chesone' can' žanna'.

Bene' bi chosozenag che Diosen' chesenabe' gon Jesúsen' to yela' guac

(Mt. 12:38-42; Mr. 8:12)

29 Na' bene' zan gosebigue' gosehjde' Jesúsen', nach Jesúsen' gwne':

—Le'e zoale na'a nacchgualle bene' laždao' xi'a. Chñable gona' yeto yela' guac da' le'ele cont nezele še Diosa' gwsele' neda', perw bi gona' ca dan' chñablana', le ba ble'ele da' ca' chona'. Lete gac chia' can' goc che da' Jonás ben' be' xtiža' Diosen' cani'. 30 Na' ca dan' goc che Jonásen' blo'en bene' Níneve ca' Diosen' gwsele' le', ca'cze dan' gac chia' gwlo'en le'e zoale na'a Diosen' gwsele' neda' golja' beñach. 31 Cate' žin ža gon Diosen' castigw

che yogo'lol bene' cheson da' mal, da' no'olen' gwnabi'e bene' Seba ca' yedecuiše' le'e mbanle na'a. Le' gwze'e gan' nac zito'chgua na' bide' nga cont bedezenague' diža' sina' dan' be' da' rey Salomón len le', na' neda' zoa' nga naccha' bene' blaoch ca da' Salomón na' bitw chzenagle chia'.
³² Na' cate' žin ža gon Diosen' castigw che yogo'lol bene' cheson da' mal, lecze žana' yesyeban bene' Nínive ca' na' yosocuiše' le'e nita'le ža na'aža. Le legaque' besyetingde' xtoła'gaque' cate' da' Jonásen' gwdixjue'ede'ne' can' gwna Diosen'. Na' neda' zoa' nga naccha' bene' blaoch ca da' Jonása' na' bi chzenagle chia'.

Dan' bsed blo'e Jesúsén' naquen ca to yi'

(Mt. 5:15; 6:22-23)

³³ 'Notno gwguala' to yi' na' gw dosen' caj, na' neca gwcuašen' ga yoble ga nono le'e len, san chde'en le'e ze'e cont gwseni' len yogo'lol bene' yeso'o lo' yo'ona'.
³⁴ Žia yejlaocho cont le'echo. Con še bibi chaquen chle'eczecho binlo. Perw še ncholcho, bi chle'echo. Ca'czen' naquen len yichjlažda'ochon'. Še naccho bene' laždao' güen, yo'o be'ni' che Diosen' lo' yichjlažda'ochon'. Perw še naccho bene' mal, chol nac yichjlažda'ochon'.
³⁵ Da'nán' le gon cont gacle bene' laždao' güen, na' šo' be'ni' che Diosen' yichjlažda'ole. ³⁶ Še nyeni' yichjlažda'olen' na' bibi da' mal yo'on, gwseni'czen xnezle can' chseni' to yi' ga nac chol.

Jesúsén' gože' bene' fariseo ca' zjanape' doła' na' len bene' ca' chososed chosolo'e ley

(Mt. 23:1-36; Mr. 12:38-40; Lc. 20:45-47)

37 Cate' beyož be' Jesúsén' diža' quinga, to beñe' fariseo gwche'e le' liže' cont yesagüe'. Na' gwyo'o Jesúsén' liž beñe' fariseon' na' gwchi'e cho'a mesen'. 38 Na' beñe' fariseon' bebande' ble'ede' bitw bona' Jesúsén' cate' za' gagüe' can' cheson legaque' chesacde' chebe Diosen' legaque' dan' chesone' ca'. 39 Na' Xancho Jesúsén' gože' le':

—Le'e beñe' fariseo nacle ca xiga' ye'eñ da' chchin beñe' na' chyibe' cožen' binlo perw bi chyibe' do lo'en. Chonle cont chesaque beñe' nacle beñe' güen, perw chebele chca'ale bi da' de che beñe' na' nacle beñe' mal juisyw. 40 Bicze bi chejni'ile. Chi' yichjle gacle xilaže' len cuerp chelen'. Lecz ca' cheyała' cue' yichjle gacle xilaže' len yichjlažda'ole, le Diosen' ben' bene' cuerp chechon' lecze bene' yichjlažda'ochon'. 41 Le yeyaše' beñe' na' le gwnežjo bi da' cheseyažjde'. Še gonle ca', nacia' nacle beñe' laždao' xilaže'.

42 'iNyaše'chguaze gac che le'e beñe' fariseo! La'czla' chnežjwle Diosen' to part lao ši part che yixe'güe'j, che yej Santa María, na' che bichle cuan chele, bibi zejen dan' bi chonle bichle da' nac da' güen, na' da' bi chaquele Diosen'. Da' nac da' žialao gonle, gonle da' nac güen na' gaquele Diosen'. Perw bi cuejyichjle gwnežjwle da' ca' chnežjwle Diosen'.

43 'iNyaše'chguaze gac che le'e beñe' fariseo! Chze-laže'le cue'le lo' yodao' txen len beñe' blao ca', na' cate' chejle do gan' chac ya'a chaclaže'le yesonxen beñe' le'e.

44 'iNyaše'chguaze gac che le'e chsed chlo'ele da' bzoj da' Moisés na' len le'e beñe' fariseo! Chonle cont nacia' gan' xoa ba che beñe' guaten', le

ley chechon' žan zjanaquen zban na' bi cheyala' gwlejchon. Perw le'e nacle ca ba da' bi zjanachia'. Chosozenag bene' chele na' bi chesache'ede' nacle bene' laždao' zban.

⁴⁵ To bene' chsed chlo'e ley boži'e xtiža' Jesúsen', gože'ne':

—Maestrw, lagüe da' žo' da' quinga, chaqueton' zi'.

⁴⁶ Na' gož Jesúsen' legaque':

—Lecze ca' le'e chsed chlo'ele ley da' bzoj da' Moisés, įnyaše'chguaze gac chele! Da' žale da' zan da' cheyala' yeson bene', chonle leyna' ca to yoa' da' nocze no do'e, to yoa' da' chaclaže'le yesoa' bene' yoble, perw le'e ne late'ze bi chaclaže'le gua'len.

⁴⁷⁻⁴⁸ 'įNyaše'chguaze gac che le'e chonšagüe'le cho'a ba che da' bene' ca' gosoe' xtiža' Diosen' cani'! Chacle toze len da' xozxta'ole ca' ben' gosote' legaque'. Na' dan' chonle ca', zejen chazlaže'le dan' gosote' legaquen'.

⁴⁹ 'Da'nan' Diosen' lao yela' sina' che' gwne' sele' bene' yesoe'lene' le'e xtižen' na' sele' postlw che' ca' len le'e. Na' gwne' gotle bale' na' gwchi gwsaca'le yebale'. ⁵⁰ Na' da' li ba chonle can' gw-nen'. Da'nan' si'le castigw che yela' got che yogo' bene' ca' gosoe' xtižen' gwzolaon caten' gwxete yežlion' chžinten ža na'aža. ⁵¹ Zan bene' gosot bene' yoble legaque' gwzolaozen len da' Abel ben' beyot da' biše' Caín le', na' beyožen len da' Zacarías ben' gosote' ladjo yodao' blaona' na' ladjo mes de yej dan' zoa chy'o yodao' gan' chesote' beyix'e cont chesonxene' Diosen'. Na' le'e mbanle na'a si'le castigw che yela' got che yogo' bene' ca'.

52 'jNyaše'chguaze nac le'e chsed chlo'ele ley che Diosen! Bitw chzejni'ile bene' leyna' to licha can' naquen, neca chzenagle chen. Na' bene' chesaclaže' yosozenaguen', neca choe'le latje yosozenaguen'.

53 Na' cate' beyož be' Jesús'en' diža' quinga, nach bene' fariseo ca' na' bene' ca' chososed chosolo'e ley gosacyožchgüe' len le'. Na' gosaclaže' yese-beje' le' diža' 54 le gosaclaže' choj dižan' cho'e da' yosode'ede' yesagüe' xya che'.

12

Yela' güexoayag che bene' fariseo

1 Na' goc zan mil bene' besežague' gan' zoa Jesús'en', catec bene' zan besežag bosolej bosošošte ni'a lježe'. Na' Jesús'en' zgua'tec gwzologüe' be'e diža' len bene' ca' zjanaque' le' txen, gože' legaque':

—Le gwsaca' len levadura che bene' fariseo ca'. Dan' cheseziye'e bene' cont yesacde' zjanaque' bene' güen zaca'leben ca levadura dan' chchixede' yetextil. Bitw gonle can' chesonen'. 2 Le bitwbi de da' ngaše' da' nacho cbi gwlo'elaon, neca de da' nono na' neze da' nacho cbi yesenezden'. 3 Da'nan' bite'teze da' gwnale bagaše'ze, bene' zan yesenden'. Na' dan' ba gwnale šižize lo' yo'o chelen', yogo'ze bene' yesenezden'.

Non' cheyala' žebcho

(Mt. 10:28-31)

4 'Bene' migw chia', chyixjue'eda' le'e bitw žeble bene' ca' yesot le'e, le cate' ba gotle bich bi gac yesonde' le'e. 5 San zoa ben' cheyala' žeble, cheyala' žeble Diosen', le cate' bačh beque'e yela' mban

čhele, ľecze nape' yela' chnabia' cont yesele' le'e gabıl. Da' yoble chnia' le'e, cheyala' žeble Diosen'.

⁶ 'Nezecho byın dao' ca' bibi zjazaca'tecba', perw na' Diosen' ne toba' bi chanlaže'. ⁷ Na' ca nac chio', da' ľeca chaque Diosen' chio' neztede' bał yiša' yichj to tocho žia. Da'nan' bitw žeble, ľe zaca'ch le'e clel ca yogo' byın dao' ca'.

*Cheyala' ye'cho bene' nombia'czcho Jesucriston'
(Mt. 10:32-33; 12:32; 10:19-20)*

⁸ 'Na' chnia' le'e, note'tez bene' še cho'e diža' len beňachen' che'ene' chejle'e chia', ľecze ca' neda' gua'a diža' len angl che Diosen' bene' že' yaba yapegaca'ne' bena' naque' neda' txen, neda' naca' ben' gwsela' Diosen' golja' beňach. ⁹ Na' note'teze bene' še cho'e diža' len beňachen' che'ene' bitw chejle'e chia', ľecze ca' neda' gua'a diža' len angl che Diosen' bene' že' yaba yapegaca'ne' bena' bitw naque neda' txen.

¹⁰ 'Na' note'teze bene' še ne' yela' ya' chia' neda' naca' ben' gwsela' Diosen' golja' beňach, Diosen' yezi'xene' che' še yetinjde'. Perw note'teze bene' še ne' yela' ya' che Spiritw che Diosen', gwbat yezi'xen Diosen' che'.

¹¹ 'Na' cate' yeseche'exoxje' le'e lao bene' gwnabia' che yodaon' o lao justis o še lao nochle bene' gwnabia', bi cuec yichjle nac yoži'ile xtiža'gaquen' o še nacle nale. ¹² Lo hor na'teze gwzejni'i Spiritw che Diosen' le'e bin' cheyala' nalen'.

*Bitw cheyala' cuec yichjcho tlaoze bi da' de
checho*

¹³ To bene' bchoje' ladjo bene' zan juisyw ben' zjanžag na', na' gože' Jesús'en':

—Maestrw, gonšco' mandadw cont bene' bišan' gone' neda' bien che da' xaxna'to' da' cheyala' si'a.

¹⁴ Na' Jesús'en' gože' le':

—Bitw naca' neda' juez chele. Bi cheyala' gua' neda' laze da' de chele.

¹⁵ Nach gože' yogo'lol bene' ca' že'na':

—Le gwsaca' cont bi selaže'le bi da' gata' chele yežlio nga, la' de bi de checho o la' bibi de checho bi da' chyažj chchinecho, gague da' can' nac yela' mban checho.

¹⁶ Na' be'lene' legaque' to jempl, gwne':

—To bene' gwni'a gocchgua coseš che', ¹⁷ na' bene' xbab lo' yichjlažda'ogüe' gwne': “¿Nacxe gona'? Bich bi latje de ga gwže'šagua' coseš chian'.”

¹⁸ Nach gozne': “Quinga gona', yochinja' yo'o gan' že' coseš chia' quinga na' gona' yo'o xench. Na' gwže'šagua' cosešen' na' bichle da' de chia'. ¹⁹ Na' lagüe ba de da' yažjda' da' zan iz, bich gona' žin. Ye'ej gagwteza' con da' chaclaža' na' gona' legr.”

²⁰ Perw Diosen' gože' bena': “Chono' xbab da' bibi zaca'. Na'aže' bžin hor gato', na' ¿nola lo na' gac yogo' da' de chio'?” ²¹ Can' gac che note'tez bene' še con chbec yichje' tlaoze da' de che' šlac mbane' na' bi chone' da' chazlaže' Dios.

Diosen' chapši'e xi'ine' ca'

(Mt. 6:25-34)

²² Na' gož Jesús'en' bene' ca' zjanaque' le' txen:

—Da'nan' žia' le'e, bi gacžejlaže'le bi da' gagwle šlac mbanle, na' lecz ca' bi gacžejlaže'le che xalana'le.

²³ Zaca'ch yela' mban chelen' ca' yela' guagw. Lecze ca' cuerp chelen', zaca'chen ca' xalana'le. ²⁴ Le gon

xbab che bechj ca', bitw chesazba', bitw chesyelapba', neca zoa da'a xoa' chegacba', neca zoa ga ncu'a' no goš chegacba' ga že' da' yesagwba', perw na' Diosen' chguagwcz'e'ba'. ¡Nacchle zaca' le'e ca be ca' zjažia xil! ²⁵ Na' ne tole bi gac yoston cuinle gašje metr še con cue' yichjle tonle. ²⁶ Nezele bitw gac yoston cuinle, na' neca naquen da' zaca'. Da'nan' bi gacžejlaže'le che bica'chle da' chyažjele.

²⁷ 'Le gon xbab ca nac yej ca' da' zjaze yix'e'. Chesecha'oczen, bibi žin chesonen, neca chesaljen do. Na' chnia' le'e, da' rey Salomón gocue' lache' güen juisyw, perw bitw bžinlaže' xalane'na' ca yela' xdan che yej ca'. ²⁸ Diosen' none' xdan da' ca' ze yixen' la'czla' to chop žaze nitan' na' chosozeyen'. ¡Nacchxe gon Diosen' len le'e gwleccze yichje' gone' yogo' da' chyažjele, le'e late' lasze chejle'le che'! ²⁹ Da'nan' bitw güe'laže'le cont gata' da' ye'ej da' gagwle. Bitw gacžejlaže'le chen. ³⁰ Be'ne' ca' bi chesonxene' Diosen' con chesoe'laže' che bi da' gata' yese'ej yesagüe' na' che xalana'gaque'. Perw Xacho Diosen' nezczede' bi da' ca' chyažjele. ³¹ Cheya'la' güe'laže'le gwzenagle che Diosen' cont nabi'e yichjlažda'olen', na' yogo' da' ca' chyažjele, goncze Diosen' len.

Da' zaca'ch gata' checho yežincho yaba
(Mt. 6:19-21)

³² 'Bitw žeble la'czla' nac to chople. Diosen' chbede' chnabi'e yichjlaždao' le'e chzenagle che' na' chaclene' le'e. ³³ Le yeyote' da' de chele cont gata' da' gwnežjwle be'ne' ca' cheseyažje. Še gonle ca', Diosen' gone' le'e da' zaca'ch na' da' cbi te chen cate' yežinle yaba gan' zoe'na'. Na' bitw gac

šo' bene' gwban que'en, na' nēca gac šo' be dao' gwžiayi' len. ³⁴ Gan' de dan' chaquele nan' zoa yichjlažda'olen'.

Cheyala' soa cuezcho batcan' yide Criston' yeto

³⁵⁻³⁶ 'Le soa le cueze batcan' yida' yeto. Le soa can' nita' bene' chesape' liž xangaquen' šlac zeje' to yela' güešagna'. Zjanyaz xalana'gaque' na' čala' yi'. Nach cate' yežine' na' nie' cho'a yo'on, na' la' yesesaljwte' cont yeyo'e. ³⁷ Mba gac che bene' ca' chesebeze' batcan' yežin xangaquen'. Še nite' chesebeze' le' caten' yežinen', nach gwsini'e da' yesagüe' na' cuine' gwnežjue' legaque' dan' yese'ej yesagüe'. ³⁸ Mba gac čegaque' še chesebeze' batcan' yežine' la'czla' yežine' do chel o do šbal. ³⁹ Le gon xbab che da' nga. Šaca' neze xan yo'on baten' žin bene' gwban liže'na', le gwna'ze' cont bi güe'e latje šo' bena' liže'na' cuane' xšinlazen'. ⁴⁰ Le soa le cueze batcan' yida' da' yoble, le cate' bi chonle xbab yida', canan' yida', neda' naca' bena' gwsela' Diosen' golja' benach.

*Mos ben' chon güen, na' mos ben' bi chon güen
(Mt. 24:45-51)*

⁴¹ Pedroa' gože' Jesúsen':

—Xanto', čcho'o jempl nga par neto'ze o še par yogo'lol benach?

⁴² Nach gož Xanchon' Pedroa':

—Naquen par note'tez bene' še chone' can' chon mos blao ben' chejni'i, ben' chon can' cheyala' gone'. Ben' chon ca', co' xane' lo ne'e ližen' cont ne'e mos ca' yezica'chle. Na' gone' da' yesagw to toe' cate' žin hor yesagüe'. ⁴³ Še to bene' mos chonteze'

can' ben xanen' mandadw gone', mba soe' cate' yežin xanen'. ⁴⁴ Da' li chnia' le'e, xanen' cue'e lo na' mosen' yogo'lol da' de che'. ⁴⁵ Perw na' še mosen' gone' xbab na' ne': "Ba gwže xanan'", na' solagüe' got chine' mosa' yezica'chle na' ye'ej gagwxate' na' sožde', ⁴⁶ nach xane'na' yežine' to ža senyale' le' cate' bi gache'ede'. Na' da' bi chon mosen' can' cheyala' gone', xane'na' got chinchgüe' le' na' gone' cont si'e castigw txen len yezica'chle beñe' bi cheson can' cheyala' yesone'.

⁴⁷ 'Na' mos ben' nac beñe' güedenag, la'czla' ba ñezde' can' che'ne xanen' gone', bi chone' ca'. Bi zoe' chbeze' batcan' yežin xanen', na' da'nan' xanen' got chinchgüe'ne'. ⁴⁸ Na' beñe' bi ñezde' bin' non xanen' mandadw gone' na' da'nan' chone' da' zaca' chine' le', na' xanen' bi chinteque' le' zi'. Note'teze beñe' zjanye'chgua xbab, chesego'o beñe' lo na'gaque' da' zan da' yesone', na' chonen byen yesone' yogo' da' ca' zjayo'o lo na'gaque' yesone'.

Yesedil beñe' neche da' bid Jesúsén'
(Mt. 10:34-36)

⁴⁹ Nach gwna Jesúsén':

—Dan' zedeyena' yežlio nga naquen ca to yi' da' cuec beñe'. Na' yebeda' šaca' ba chi' yi'na'. ⁵⁰ Za'a cont saca'zi'a na' gata'. Na' chžaglagua' šlac chbeza' žin ža yeyož gaquen. ⁵¹ ¿Chonle xbab beñe' že' yežlio yesezoa yesebeze' binlo len lježgaque' na'a dan' ba bidan'? Chnia' le'e, bi yesezoa yesebeze' binlo len lježgaque' na'a ba bida', san yesedile' na' yosošaše'. ⁵² Quinga solao gac na'a, še žan nita' gayo' beñe' to lo' yo'o, yesedil legacze', chope' contr šone' na' šone'

contr chope'. ⁵³ Yesedił bene' byo len xi'ine' na' xi'ine' len le'. Na' yesedił no'olen' len xi'ine' no'ole, na' xi'ine' no'olen' len le'. Na' yesedił no'olen' len xo'oliže' na' xo'oliže' len le'.

Bitw gosacbe'ede' bi zeje da' ca' chon Diosen'
(Mt. 16:1-4; Mr. 8:11-13)

⁵⁴ Nach lecze gož Jesúsen' bene' ca' nita' na':

—Cate' chle'ele chi' bejw gan' chxoa gwbiža' na' žale: “Gac yejw”, na' chac ca'. ⁵⁵ Na' cate' chechj be' da' za' ži'le na' žale: “Guac zeye”, na' chac zeye'.

⁵⁶ Bene' gwxiye' le'e. Cate' chle'ele nac chac le'e yaban' na' lo yežlion' nezele še gac yejw o še gac zeye'. ¿Bixchen' bi chache'ele bi zejen da' ca' chon Diosen' tiemp nga zoacho na'a?

Cheyała' goncho cont yezoacho binlo len bene' che'e chio' lao justis
(Mt. 5:25-26)

⁵⁷ ¿Bixchen' bi chonle xbab cont nezele can' cheyała' gonle? ⁵⁸ Cate' to bene' gonle xya che' na' che'e le'e lao justis, šlac ngo'ole nezen' le yey-iljwlaže' nac gonle yezoale binlo len le' cont bi che'e le'e lao justisen'. Še bitw gonle ca', cate' žinle lao justisen' nach gone' le'e lo na' bene' ca' yososeyjue' le'e ližya. ⁵⁹ Chnia' le'e bitw yebeje' le'e še biña' chixjwle doxen da' čala'le.

13

Cuiayi'cho še bitw yetinjecho xtoła'chon'

¹ Na' len bene' ca' že'na' gwnita' bał bene' gosoe'lene' Jesúsen' diža', gose'ene' Pilaton' gwsele' soldadw che' ca' jasetue' to xonj bene' Galilea ca' na' bchixde' xčhengaquen' len che beyixe' ca' ba

gosote' cont yesonxene' Diosen'. ² Nach boži'i Jesúsen' xtiža'gaquen' gože' legaque':

—¿Chonle xbaba' gosac chegaque' ca' lagüe dan' gasonche' da' malech clel ca bene' Galilea ca' yez-ica'chle? ³ Chnia' le'e, bi naquen ca'. Še bitw yetinjele xtoła'le ca', lecze gwžin ža cate' cuiayi'le.

⁴ Nezele che bene' šino'šone ca', šlac zjanite' yež Siloé gwbiže to campanaryw na' gwdenen legaque' na' gosate'. ¿Lecze chonle xbab goc ca' dan' zjanac-che' bene' mal clel ca bene' ca' zjaže' Jerusalén?

⁵ Chnia' le'e, gague can'. Še le'e bi yetinjele xtoła'le, lecze gwžin ža cate' cuiayi'le.

Jempl che yag yixgüigw da' bibi chbia

⁶ Na' be'lene' legaque' jempl nga, bzejni'ide'ne' cheyala' yesyetinjde' xtoła'gaque', na' gože' legaque':

—To bene' zoa to yag yixgüigw che' gan' že' yag uvas che' ca'. Na' gwyeje' lo' yaguen' jane'e še de toga yixgüigw gagüe', perw bitw bi bželde'. ⁷ Na' gože' ben' chape' yag che' ca': “Ba chac šon iz chedena'a yag nga še chbian yixgüigw, perw bitw bi chbian. Gwchoguen, lažjw con zoan nlanen, na' neca bi chbiazen.” ⁸ Na' gož ben' le': “Xana', jayenna', za' zoašazen yetgüiz, che'ena' xanenna' na' cuecan' yo beb. ⁹ Na' še cuian yixgüigw do yetgüiz, bitec da' güen, perw še bicze bi cuian, nach chogchon.”

Jesúsen' beyone' to no'ole ža che Dios

¹⁰ Na' to ža che Dios bsed blo'e Jesúsen' bene' že' to lo' yodao'. ¹¹ Na' zoa to no'ole bene' ba goc šino'šone iz yo'o nyaz da' xigüen' yichjlažda'ogüe'na'. Na' ben da' xigüen' cont bdohe

cuerp che'na', na' gague gocch se' to lica. ¹² Na' cate' ble'e Jesús'en' le', goxe'ne' na' gože'ne':

—No'ole, na'a yeyacdo' yižgüe' chio' nga.

¹³ Na' gw χ oa ne'e cuerp che no'ola', na' la' bezete' to lica. Na' no'ola' benxene' Diosen'. ¹⁴ Perw na' bene' gwnabia' che yodao'na' bloque' da' beyon Jesús'en' no'ole güen' ža che Dios. Na' gože' bene' ca' nita' lo' yodaon':

—De xop ža cont gonle žin. Le da lo ža ca' cont yeyone' yižgüe' chelen' perw bitw yidle ža che Dios cont yeyacle.

¹⁵ Nach Xancho Jesús'en' gože'ne':

—Bene' gwxiye' le' len bene' lježo'. ¿Gague lo ža che Dios bia'cze chsežle go'n chele o burr chele ga zjada'ba' chjasanlba' güe'ej nis? ¹⁶ No'ole nga naque' xi'iñ diaža che da' Abraham, na' Satanásen' dan' chnabia' da' xigüe' ca' benen cont ba bdoobe cuerp chen' šino'šone iz. Da'n'an' nacczen lica ba beyona'ne' ža che Dios.

¹⁷ Cate' gwne' ca', bene' ca' chesegue'e le' gosacde' zto', perw yogo'lol bene' ca' yezica'chle nita'na' besyebanchgüede' len yogo' dan' ben Jesús'en', le leca güen zjanac dan' benen'.

Yela' gwnabia' che Diosen' naquen ca biñ che xomdas

(Mt. 13:31-32; Mr. 4:30-32)

¹⁸ Nach gwna Jesús'en':

—Na'a gwlo'eda' le'e cont nezele šanch bene' yosozenag che Diosen' cont nabi'e yichjlažda'ogaque'. ¹⁹ Da'n'an' yela' gwnabia' che Diosen' naquen ca biñ che xomdas. To bene'

gozen' na' cate' blan' gwcha'on goquen yag cha'o
na' be ca' zjazoa xil goson ližgacba' lo xoze' yaga'.

*Yela' gwnabia' che Diosen' naquen ca levadura
(Mt. 13:33)*

²⁰ Nach da' yoble gozne':

—Na'a nia' le'e yelate' nac nac yela' gwnabia' che
Diosen'. ²¹ Naquen ca levadura dan' gwlec no'olen'
len to rob yezj cont gwcha'o doxenen.

*Cheyala' chiljwlaže'cho nac goncho cont soacho
binlo len Diosen'
(Mt. 7:13-14, 21-23)*

²² Na' gwda Jesúsen' bsed blo'ede' bene' ca'
že' ciuda ca' na' yež ca' gan' bedie' cont bežine'
Jerusalénna'. ²³ Na' to bene' gože' Jesúsen':

—Xanto', ¿con to chopze bene' šjasyenite' len
Diosen'?

Nach Jesúsen' gože' legaque':

²⁴ —Chnia' le'e, bene' zan chese'nde' yesenite'
binlo len Diosen', perw gwžin ža cate' bich gac
yesone' cont yesenite' binlo len le'. Da' nac žialao
gonle, chiljwlaže'le nac gonle cont soale binlo len
Diosen' ²⁵ cont bi gone' len le'e ca ben to xan yo'o
cate' bžin hor gwseyjuen'. Gwzože'e bseyjue', na'
gwdechle besežin bene' bososiže' le'e puert che'na'
na' bich gwsaljue' cont yeso'e. Na' gose'ene':
“Gwsaljwšca cont šo'to'.” Na' gože' legaque': “Bitw
nombi'a le'e, neca nezda' ga za'acle.” ²⁶ Can' gac
che balle. Nach solaole ye'line': “Güe'ej gwdagwto'
len le' na' bsed blo'edo' neto' la cay lažto'.” ²⁷ Perw
na' da' yoble ye'e le'e: “Bitw nezda' ga bene' le'e.
Le šjaya'ac yogo' le'e bene' güen da' mal.” Can'
ye'e le'e. ²⁸ Na' le'ele Abraham na' Isaac na' Jacob

na' yogo'lol be_{ne}' ca' gosoe' xtiža' Diosen' cani' nite' yaba gan' zoa Diosen' chnabi'e. Na' le'e bitw gac šo'lena'. Nach cuežyaše'le na' gagwxejte layle dan' leca žaglaole cate' gacbe'ele bich gac šo'le. ²⁹ Be_{ne}' zan be_{ne}' za'ac doxen yežlio yesyežine' yaba gan' zoa Diosen' chnabi'e na' yesebi'e cho'a mes yesagüe'. ³⁰ Nita' be_{ne}' zjanaque' be_{ne}' bzebe na'a perw gwžin ža cate' yesaque' be_{ne}' žialao. Na' nita' be_{ne}' zjanaque' be_{ne}' žialao na'a, perw gwžin ža cate' yesaque' be_{ne}' bzebe.

Begüine' Jesúsén' neche xtola' be_{ne}' Jerusalén ca' (Mt. 23:37-39)

³¹ Lo ža na'teze bal be_{ne}' fariseo ca' besežine' gan' zoa Jesúsén' gose'ene':

—Cheyala' yoxonjo' nga gan' chnabia' rey Herodes, le chaclaže' gote' le'.

³² Jesúsén' gože' legaque':

—Herodesen' naque' ca to beza' yela' gwxiye' čhen'. Le šja'ac na' ye'lné' yeto chope žazen' soa' yebejcha' da' xigüe' ca' zjajo'o zjanyaz yichjlaždao' be_{ne}' na' yeyoncha' be_{ne}' chesacšene. Ba zoa yeyož gona' dan' cheyala' gonan'. ³³ Perw ca nac dan' chona' na'a gonchczan' gwxe güižj. Gague ngan' chesote' be_{ne}' ca' chesoe' xtiža' Diosen', san Jerusalén chesote' be_{ne}' ca'.

³⁴ 'Le'e be_{ne}' Jerusalén, chotle be_{ne}' ca' chesoe' xtiža' Diosen' na' ca nac nochle be_{ne}' ca' chsela' Diosen' len le'e, chčhellene' yej. Zan ni'a goclaža' yotoba' le'e ca to jed xcaca' be nče' xi'in na' chyežba' legacba', perw bitw goclaže'le. ³⁵ Na' na'a ba gwlejyichj Diosen' le'e. Na' chnia' le'e, bich le'ele neda' na'a. Cate'ch žin žana' nale: “Mbalaz

ben' za' nga nsel_a' Xancho Diosen' le' cont nabi'e", cana'ch le'ele neda' da' yoble.

14

Jesúsen' beyone' to be_{ne}' de yi

¹ Na' to ža čhe Dios Jesúsen' gwyeje' jatagüe' liž to be_{ne}' fariseo ben' nac be_{ne}' blao. Na' yezica'chle be_{ne}' fariseo ca' chosogüia chesene'e bixen' goncze' cont gata' da' yosode'ede' yesagüe' xya čhe'. ² Na' lagüe'na' zecha to be_{ne}' chacšene, de cuerp chen' yi. ³ Na' gož Jesúsen' be_{ne}' fariseo ca' na' be_{ne}' ca' chososed chosolo'e ley dan' bzoj da' Moisés:

—¿De lsens len ley chechon' yeyoncho to be_{ne}' güe' ža čhe Dios o še bitw bi lsens de?

⁴ Perw notno boži'i xtiže'na'. Nach Jesúsen' be_{xue}' na' bena' na' beyone' le', na' gože'ne':

—Guac yeyejo'.

⁵ Nach gož Jesúsen' be_{ne}' ca' že' liž be_{ne}' fariseon':

—Le'e še zoa to burr o to go'ñ chele na' lažo'ba' to lo' yechw sitjw, ¿cabi la' yebejteleba' la'šaze nac ža čhe Dios?

⁶ Na' nono goc yoži'i xtiža' Jesúsen'.

Be_{ne}' ca' gosaxe' gan' chac güešagna'

⁷ Na' ble'e Jesúsen' can' cheson be_{ne}' ca' gosaxe' liž be_{ne}' fariseon', gosebeje' gan' zjachi' be_{ne}' blao ca' cont gosebi'ena'. Na' Jesúsen' be'e to jempl, gože' legaque':

⁸ —Cate' to be_{ne}' gaxe' le'e gan' chac güešagna', bitw cue'le gan' cheya_{la}' cue' be_{ne}' blao ca', le še cue'le na', guacte yid be_{ne}' nacch be_{ne}' blao ⁹ na'

ḡan yo'ona' ye'e le'e: “Le soža' cont cue' benga.” Nach do chaquele zto' soža'le cue'le ga yoble len beṇe' ca' bitec bi zjazaca'. ¹⁰ Na' cate' gan' gaxe' le'e cue'le len beṇe' bitec bi zjazaca', na' cate' yid ḡan yo'ona' na' ye'e to tole: “Beṇe' migw chia', da cui'o len beṇe' blao ca'.” Nach gacxenle lao beṇe' ca' zjachi' len le'e cho'a mesen'. ¹¹ Le note'teze beṇe' chonxen cuine', Diosen' gone' cont si'e zto' lagüen'. Na' note'teze beṇe' chzexjwlaže' lagüen', Diosen' gone' cont gacxene'.

¹² Na' lecze gož Jesúsen' ben' goxe' le' ližen':

—Cate' gono' to lṇi na' gaxo' beṇe' yesagüe' len le', bitw gaxo' beṇe' biše' lježo', beṇe' migw chio' o beṇe' zjanaque' beṇe' gwṇi'a. Legaque' lecze yesaxe' le' ližgaquen', na' yesyegüe'e gwzon lagüe dan' ba goxgaco'ne' ližo'na'. ¹³ Cate' gono' to lṇi gox bene' yaše' na' beṇe' nchog no ṇi'a na'gaque', beṇe' nxinj ṇi'e, na' beṇe' lchol. ¹⁴ Še gaxo' legaque', Diosen' gone' so' mbalaz, le beṇe' ca' bi gac yesyegüe'e gwzon chio'. So' mbalaz cate' Diosen' yosbane' le' ladjo beṇe' guat ca' txen len yezica'chle ben' ja'ac to licha cate' gosebane'.

Jempl che to beṇe' ben lṇi xen

¹⁵ Na' to beṇe' chi' cho'a mesen' txen len Jesúsen' bende' xtiže'na' na' gože'ne':

—Mbalaz soacho gagwcho lo lṇi da' gac caten' ba chnabia' ben' sela' Diosen'.

¹⁶ Nach Jesúsen' gwne':

—To beṇe' bene' to lṇi xen, na' goxe' beṇe' zan šja'ac ližen' cont yesagüe'. ¹⁷ Na' cate' bžin hor yesagüe', na' ḡan yo'ona' gwsele' xmosen' cont šjatobe' legaque' yesagüe'. Na' cate' jaṇe'e to toe',

gože' legaue': "Le šo'o, ba bsini'e dan' gagwchon'." ¹⁸ Na' yogo'lole' gose'e ben' bi zjazoe' latje šja'aque' gan' chone' lnin'. Bene' nechon' gwne': "Za' gwxia' to yežlio, na' cheyala' šjana'an. Na' ye'šco' xanon' bitw gac yida'." ¹⁹ Na' yetoe' gwne': "Za' gwxia' gayo' cue' go'n na' na'a šjengaca'ba' prueba. Ye'šco' xanon' si'xene' chia', bitw gac yida'." ²⁰ Na' yetoe' gože'ne': "Za' bšagna'. Da'nan' bitw gac yida'." ²¹ Na' mosen' beyeje' na' jayeže' xanen' can' gose' bene' ca' le'. Nach xan yo'ona' ben' chon lnin' bže'e. Nach gože' xmosen': "Gwyej jata to to cay na' to to nez lo ciudan', na' gwtobo' bene' yaše' na' bene' nchog ni'a na'gaue' na' bene' nxiņj ni'e, na' bene' lchol cont yeside' yesagüe'." ²² Gwde bene' ca' nach gože' le': "Xana', ba jatoba' bene' ca' ba gwnaon', na' ne' dehcze latje par bene' yoble." ²³ Nach xane'na' gože' le': "Bchoj lo' ciudan' na' gono' byen yesid ben' nita' chanez. Na' šjaxi'o bene' ca' zjaže' yixe'. Gono' byen yeside' liža' nga yesagüe' cont yežan' bich bi latje šo'. ²⁴ Na' ca' nac bene' ca' goxa' da' nechw, bich gua' latje yesagw legaue' dan' ba bsini'ana'."

Dan' cheyala' goncho cont gaccho txen len Jesu-criston'

²⁵ Na' bene' zan juisyw zjana'ogüe' Jesús'en', na' gwyečhje' gože' legaue':

²⁶ —Note'teze bene' še chaclaže' šejnilaže' neda' na' gwzenague' chia', še bi gacchde' neda' clal ca xaxne'e, no'ol che', xi'ine', biše', zane', na' lente cuine', bi gac gone' neda' txen. ²⁷ Na' note'teze bene' bi chzanlaže' cuine' saca'zi'e o gate' ne' chia' neda', lecze bitw gac gone' neda' txen. ²⁸ Še tole

che'nele gonle to campanaryw, zgua'tec cue'le na' gonle xbab gwsaca'le ca do gaca' da' chyažjele cont gonlen, še gaque xmechwle cont yeyož campanaryon'. ²⁹ Še bi gwchix gwtole xbab chelna' gaca'te' dan' chyažjele, cate' ba gwlecle lenenna' na' gacbe'ele bich bi mechw de cont yeyožen, na' yogo' bene' yesele'ede' lenenna' yesezi'diže' le'e, ³⁰ yesene': "Benga gwzolao chone' to campanaryw perw bitw beyož xšinen'." ³¹ Na' še to rey chone' xbab tile' len yeto rey, lecze zgua'tec gwsaque' še gwzoede' len ši mil soldadw che' gone' gan yeto rey bene' nche' galje mil soldadw. ³² Na' še chacbe'ede' bi gone' gan, šlac ne' zoa ben' yeto, zito', sele' ben' šjasedie' xtižen' lao rey ben' yeto yesenabe' yesyenite' binlo. ³³ Ca' naquen len le'e, note'tezle še bi cuejyichjle yogo'lol bi da' de chele, bitw gac gonle neda' txen.

Cate' zeden' bich naquen zxi'

(Mt. 5:13; Mr. 9:50)

³⁴ 'Zeden' naquen güen, perw na' še bich naquen zxi', ħnacxe goncho cont yeyaquen zxi' da' yoble? ³⁵ Bibi zacan', neca gaclenen yežlio, neca gaquen par beb, lete cho'oñchon. Le'e žia nagle da' chene, le gwzenag xtiža'na'.

15

Jempl che xila' ben' gocžeje

(Mt. 18:10-14)

¹ Na' bene' güeçhixjw ca' na' yebale bene' güen da' xinj, yogüe' gosebigue' gan' zoa Jesúsén' cont gosende' xtiže'na'. ² Na' bene' fariseo ca' na' bene'

ca' chososed chosolo'e ley dan' bzoj da' Moisés gosezi'diže' le', gosene':

—Benga chlebe' beṇe' güen da' xinj ca' na' chagwlene' legaque'.

³ Nach Jesúsen' be'e to jempl, gože' legaque':

⁴ —Še nita' to gayoa xila' chele na' gacžeje toba', ĵbi yocua'anle be ca' taplalj togalj gan' že'ba' latje daša' na' šjaydiljwle ben' ba gocžejena' cont yeželba'?

⁵ Na' cate' yeželban' yebechgüele na' yexoalba' ya'axichjle yeyoa'lba'. ⁶ Na' cate' yežin ližle, gw-toble beṇe' migw chele na' beṇe' gualič chele na' ye'lnē': “Le yebe len neda'. Ba bežel xila' chia' ben' gocžeje.” ⁷ Chnia' le'e, gwbeche Diosen' txen len angl che' ca' cate' to beṇe' chon da' mal yetinjde' xtole' clel ca' yesyebede' che taplalj togalj beṇe' zjanaque' beṇe' güen beṇe' bitw de xtoła'gaque' da' yesyetinjde'.

Jempl che mechw dan' gwnit

⁸ 'Na' le'e no'ole še de ši mechw plata chele na' še nit ton, la' gwguala'tele to yi' na' gwloale lo' yo'o chele na' yeyiljwyožlen cont yeželen. ⁹ Na' cate' yeželenṇa', na' yotoble no'ole migw chele ca' na' beṇe' gualič chele na' ye'le legaque': “Le yebe len neda', le ba beželda' mechw chia' dan' gwnit.” ¹⁰ Chnia' le'e lecze chesyebe chesyezaque' angl che Diosen' beṇe' zoa yaba cate' to beṇe' chon da' xinj chetinjde' xtole'na'.

Jempl che ben' benditje xi'inēn' xmechue'

¹¹ Na' lecze gože' legaque':

—Gwzoa to beṇe' na' gwnita' chop xi'inē' beṇe' byo. ¹² Na' bžin ža beṇe' xcuiden' gože' xēn': “Xa',

ben neda' dan' cheya_{la}' sia' da' de chio'." Nach xen' bnežjue' dan' cheya_{la}' si'en. ¹³ Goc to chop ža nach be_{ne}' xcuiden' btobe' yogo'lo_l bi da' de che' na' gwze'e gwyeje' naci_on zito' na' zlez da' bi zaca' jene'. Na' benditjde' xmechue'na' zejlene' da' malen'. ¹⁴ Na' cate' beya xmechuen', goc to gwbin juisyw doxen naci_on_{na}', na' bich bi gota' xmechue' cont si'e da' ye'ej gag_{ue}'. ¹⁵ Da'nan' gwyeje' gan' zoa to be_{ne}' naci_on_{na}' gw_nabe' žin, na' bena' gwsele' le' yi_xe' ga že' be zan xcoše' na' jayoe'ba'. ¹⁶ Na' catec gwdone' goclaže' gag_{ue}' dan' chosonežjue' chesagw coš ca', perw ne len ca bosonežjue' le' gag_{ue}'. ¹⁷ Na' beyone' to xbab šag_{ue}', gwne': "Nita' mos zan che xan' na' dechgua da' chesag_{ue}', na' neda' gatda' ye_{la}' chdon. ¹⁸ Yeza' nga na' yeya'a gan' zoa xa' na' yapa'ne' bena' da' mal lao Diosen' na' lao le', ¹⁹ na' bich zaca' gone' neda' cuent ca xi'ine', con še gone' latje gaca' ca to xmose'." ²⁰ Nach beze'e beyeje' gan' zoa xen'. Na' zito'le za' yežine' cate' ble'e xen' le' na' beyaše'de' le' na' gwza'sese' jašague'ne'. Na' gwde_{le}'ne' bnope'ne'. ²¹ Nach gož xi'ine'na' le': "Xa', ba bena' da' mal lao Diosen' na' laguo' le'. Bich zaca' gono' neda' cuent ca xi'ino'." ²² Na' xe'na' gože' xmose' ca': "Le šjalej tgot lache' šag_{ue}', le guacwben', na' le šjaxi' to niy na' le co'on xbembe', na' le šjaxi' šcue' yel na' gwdelen ni'abe'. ²³ Na' le šjaxi' go_n dao' ben' cha_{ne}' na' le gotba' cont gagwchoba', le goncho lni. ²⁴ Xi'ina' nga ba bena'be' cuent ca to bi' guat, perw ne' zoabe' mbambe' na'a. Gwlejjichjbe' chio', perw na'a ba bela'be'." Na' gosezolaog_{ue}' chesone' lni.

25 'Na' xi'ine' be_{ne}' nechon' zeje' yix'e' cate' bežin xi'inen' yeto ben' benditje xmechuen', na' cate' zeza' ben' gwyej yixen', ba zoa yežine' liž xen' cate' bende' chosocueže' na' chosoye'e. 26 Na' goxe' to mosen' na' gw_nabde' le' bixchen' chesone' l_{ni}. 27 Na' mosen' gože'ne': "Bi' bišo'na' ba bela' na' x_aon' ba betue' go'ñ daon' ben' cha_{ne}'chgua da' bela'be' to šagüe' to güen." 28 Nach xi'ine' nechua' bže'e na' bi goclaze' yeyo'e liž xen'. Na' bchoj xen' na' gota'yoede' le' yeyo'e yo'o. 29 Perw xi'ine' be_{ne}' nechua' gože' xen': "Zan iz ba chac zoa' nga chonteza' žin con can' žo' le', na' bi_{na}' gaca' be_{ne}' güedenag. Na' ne to šib dao' ca_{na}' go_{no}' neda' cont gota'ba' gona' l_{ni} len be_{ne}' migw čhia' ca'. 30 Na' na'a ba bela' xi'ino' nga benditjbe' yogo'lol da' bnežjo'be' gwdalembe' no'ole zle', na' beto' par lebe' go'ñ dao' ben' cha_{ne}'." 31 Na' xe'na' gože'ne': "Xi'indagua', le' zoatezo' len neda', na' yogo'lol da' de naquen čio'. 32 Perw cheya_{la}' goncho l_{ni} nga na'a da' chbechgüecho ba bela' bi' bišon', le ba bena'be' cuent ca to bi' guat, perw na'a zoabe' mbambe'; gwlejyichjbe' čio', perw ba bela'be'."

16

Jempl čhe to mos blao ben' benditjde' da' de čhe xane'

¹ Nach gož Jesúsen' be_{ne}' ca' zjanaque' le' txen:

—Gwzoa to be_{ne}' gw_{ni}'a na' gwzoa to mos blao čhe' ben' gwyo'o lo ne'e yogo'lol da' de čhe'. Na' be_{ne}' gw_{ni}'ana' bende' rson xmose' blaon' ba benditjde' bi da' de čhe'. ² Na' x_anen' goxe' le' na' gože'ne': "Ba benda' diža' can' chonon'. Cheya_{la}'

yodio' cuent yogo'lo' da' ba benditjedo' chia'. Bich gac gono' xšinan' na'a." ³ Nach mosen' bene' xbaben': "¿Bixe gona' na'a? Xanan' ba cholague' neda'. Bich gac gona' xšinen', na' neca gac goncha' žin gual, na' gacda' zto' še naba' carida. ⁴ Nezda' bi gona' cont nita' bene' yesene'e neda' cate' bich chona' žin che xanan'." ⁵ Nach goxe' yogo'lo' bene' ca' chesala' xmechw xane'na' tgüej tgüje' na' gože' bene' nechw: "¿Gaca' chal'o' che xana'?" ⁶ Na' bena' gože'ne': "Chala' che tap mil litrw set." Nach gož mos blaona' le': "Bedao'nez gwche'edo' na' bzoj lo cuenten' bzoan chal'o' che chop mil litrwze seten'." ⁷ Gwde na' gože' bene' gwchopen': "¿Gacan' chal'o' che xanan'?" Nach bena' gože'ne': "Chala' che to mil rob trigw." Nach mosen' gože' bena': "Gwche'edo' na' bzoj lo cuent chio'na' bzoan chal'o' che xono' gayoa robze trigon'." ⁸ Na' xan mos gwxiyen' gocbe'ede' xmosen' leca nye'e xbab da' beyiljwlaže' nacle gone' soe' binlo len lježe' bene' ca' chesala' che xanen'. Le bene' ca' zjachi' yichje' to zleze dan' chac lo yežlion' chesonchgüe' xbab nacle yesone' len dan' zjade chegaque', perw zan bene' ba zjajo'o be'ni' che Diosen' lo' yichjlažda'ogaque' bitw chesone' xbab naclen' yosočhine' dan' de chegaque'.

⁹ Na' chnia' le'e, dan' de chele yežlio nga da' te chen', perw le gwchinen cont nita' migw chele. Na' cate' ba beya bi dan' de chele yežlio nga, nach nita' bene' yosolebe' le'e cate' yežinle yaba gan' soale toli tocañe.

¹⁰ Še to bene' chone' can' cheyala' gone' len da' bibi zaca'tec, lecz ca' gone' len da' zaca'chgua. Na' bene' bi chone' can' cheyala' gone' len da' bibi

zaca'tec, lecz bitw gone' can' cheyała' gone' len da' zaca'chgua. ¹¹ Še le'e bi chonle can' cheyała' gonle len dan' de chele yežlio nga da' te čen', bitw gon Diosen' le'e da' zaca'ch da' bi te che. ¹² Dan' de chele yežlio nga, che Diosen' gague chelen'. Na' še bitw chonle can' cheyała' gonle len da' nac che', bitw gone' le'e da' zaca'ch da' bi te čen.

¹³ Nono mos gac gone' žin len chop xane' to ši'ize, le še gone' ca', gue'ede' to xan žinna' na' gacde' yetoe'; o gone' žin che toe' do yichj do laže' na' che ben' yeto gonon' do chža'alaže'ze'. Lecze ca' le'e, bitw gac gonle xšin Diosen' do yichj do laže'le na' gonte xšinle cont gacle bene' gwni'a.

¹⁴ Na' lecze nita' bene' fariseo ca' chešende' xtiža' Jesúsen', na' gosezi'diže' le', le gosaclaže' yesaque' bene' gwni'a. ¹⁵ Na' gož Jesúsen' legaque':

—Le'e chonle cont beŋachen' chesacde' chdaczle licha, perw Diosen' neze nle'ede' yichjlažda'ole, na' Diosen' chgue'ede' bał da' chesaque beŋachen' zjanaquen da' žialao xen.

Ley che Diosen' na' bene' ca' chnabia' Diosen' yichjlažda'ogaque'

¹⁶ Na' gozna' Jesúsen':

—Gwzolaon cani'te bžinten cate' bla' Juanna' bedetixjue'ede' xtiža' Diosen', ley dan' bzoj da' Moisés len dan' bosozoj yezica'chle bene' gosoe' xtiža' Diosen' bzejni'in chio' che Diosen'. Na' na'a gwzolaon len Juanna', ne' nita'cze bene' cheseyixjue'ede' Diosen' nabi'e yichjlaždao' bene' yosozenague' che'. Na' bene' zan cheseyiljue' nacle yesone' cont nabia' Diosen' yichjlažda'ogaque'.

17 'La'czla' še yežlion' len da' ca' zjažia le'e yaban' yesede čhegaquen, ca nac Xtiža' Diosen' dan' nyojen, ne late' daon' cbi te čhen.

Bi cheyala'yela'acho len no'ol čechon' cont soalencho no'ole yoble

(Mt. 19:1-12; Mr. 10:1-12)

18 'Note'teze beņe' chele'e len no'ol čhe' na' cheque'e no'ole yoble chone' da' xinj, tozcze ca naquen šaca' gata'lene' no'ol čhe beņe' yoble. Na' note'teze beņe' yošagna'lene' to no'ole beņe' bela'a len beņe' čhe', lecze tozcze ca da' xinj gone' len dan' chon beņe' chata'lene' no'ol čhe beņe' yoble.

Beņe' gwņi'a na' Lázaro

19 Nach gozna' Jesúsen':

—Gwzoa to beņe' gwņi'a na' xdanchgua goc xalane'na', na' leca gwdagwšagüe' yogo' ža. ²⁰ Na' to beņe' yaše' le' Lázaro, yogo' ža jasedixjue' le' cho'a puert zaguan čhe beņe' gwņi'ana' cont gwņabe' yosonežjue'ne' con gaca' da' chesezande'. Na' Lázaron' leca gwžia yežo' doxen cuerp čhen'. ²¹ Na' catec gwdone' goclaže' gagüe' bla'a dao' yela' guagw da' beselažo' cho'a mes čhe beņe' gwņi'an'. Na' beco' ca' ja'acba' jasele'eba' yežo' dan' gwžia cuerp čhe'na'. ²² Na' got beņe' proben' nach angl beņe' že' gan' zoa Diosen' besyezi' besyeque'e le' yaban' gan' zoe' na'a len da' xozxta'ocho Abraham. Na' lecze got beņe' gwņi'ana' na' bosocuaše'ne' ²³ na' beyeje' lo yi' gabil. Na' šlac chžaglagüe' na' gwłis lagüen' na' ble'ede' zito'le nita' da' Abraham len Lázaron' yabana'. ²⁴ Nach beņe' gwņi'an' gwņe' zižje gwne': “Xa' Abraham, beyaše'laže'šca neda' na' gwsela' Lázaron' cont yosbise' loža' nga len late'

nis da' gwlapa' xbene'na', le leca chžaglagua' lo yi' nga." ²⁵ Perw na' Abrahanna' gože' le': "Xi'ina', bosa'laže' cate' gwmano' yežlio zleze da' šagüe' da' güen gota' chio', na' Lázaro nga to zleze da' mal goc che'. Na' ba zoe' mbalaz nga na'a na' le' chžaglaguo'. ²⁶ Bi gac gona' can' chaclažon', le Diosen' bač nze' to bdiñj xen ga nono gac te, cont nono gac sa' nga šeje' gan' zon', neca nono gac sa' gan' zon' na' yide' nga." ²⁷ Nach bene' gwñi'ana' gože' Abrahanna': "Bene' gol dao', chata'yoeda' le' gwsela'sca Lázaron' liž xan'. ²⁸ Nita' gayo' bene' biša' na' che'nda' šjatixjue'ede' legaque' nac yesone' cont Diosen' bi yesele' legaque' latje nga gan' yesežaglagüe'." ²⁹ Na' Abrahanna' gože' le': "Decze dan' bzoj da' Moisésen' na' dan' bosozoj yezica'chle bene' ca' gosoe xtiža' Diosen' cani'. Cheyala' yosozenague' che da' ca' zjanyojen." ³⁰ Na' gože' Abrahanna': "Bitw, bene' gol dao'. Še to bene' yebane' ladjo bene' guat na' güe'lene' legaque' diža', nach yesyetinjde' xtoła'gaquen'." ³¹ Nach gož Abrahanna' le': "Še bitw chosozenague' che dan' bzoj da' Moisésen' na' dan' bosozoj yezica'chle bene' ca' gosoe xtiža' Diosen', la'czla' še yeban to bene' ladjo bene' guat ca', bi yesejle'cze' che Diosen'."

17

Bitw cheyala' goncho cont gon bene' da' xinj
(Mt. 18:6-7, 21-22; Mr. 9:42)

¹ Na' gož Jesúsen' bene' ca' zjanaque' le' txen:
—Decze da' gonen cont lažo' bene' yesone' da' xinj, perw nyaše'chguaze gac che bene' chone' cont bene' yoble yesone' da' xinj. ² Yejni'a šaca'

yosocheje' yene' to yiše na' šjasezale' le' lo' nisdao' cled ca soe' gone' cont to bene' za' gwzologüe' chejnilaže' neda' lažoe' gone' da' xinj. ³ Da'nān' le gwsaca' cont bi gonle ga lažo' bene' gone' da' xinj.

'Na' še to bene' lježle gonde' le'e mal, le tile' na' še gwše'e xbab na' ne' bich gone' ca', le yezi'xen che'. ⁴ La'czla' gaž ni'a lao tža gone' da' mal contr bene' lježen', še gaž ni'ate ne': "Ba betinjda' che dan' benan', bezi'xen chia'", na' cheyala' yezi'xene' che'.

Gosaclaže' yesejle' che' che Diosen'

⁵ Na' gose' postlw ca' Xancho Jesúsen':

—Gaclenšco' neto' cont šejle' chto' che Diosen'.

⁶ Nach gož Xanchon' legaque':

—Xsa yag xomdas naquen da' dao' riz, na' la'czla' dan' chejnilaže'le Diosen' naquen ca to xsa xomdas lagüe dan' bi chejnilaže'teclne', še šejnilaže'lnē', guaque ye'le yag nga: "Gwcuase nga na' jayzoa lo' nisdāon'", na' guaccze can' nalna'.

Dan' cheyala' yeson mos ca'

⁷ Le'e še mos chelen' chgua'aņe' go'ņ, o še chyoe' xila', cate' chele'e güeyeban' bitw che'lnē': "Beyo'o ngale, gwche'edo' gaguo' xše'." ⁸ San che'lnē': "Bsinia' da' ye'ej gagua' na' goņon'. Te yedaguan' nach gago'." ⁹ Na' bitw cho'elne' yela' choxcen cate' ba bene' dan' gožlene'. ¹⁰ Na' lecz ca' le'e, cate' ba benle yogo'loł dan' ža Diosen' gonle, cheyala' nale: "Bitw zaca'to' no goņ yela' choxcen cheto' ca dan' ba bento', le bento' con da' cheyala'cze gonton'."

Jesúsen' beyone' ši beṇe' chese'ede' yižgüe' da' nzi' lepra

¹¹ Na' zej Jesúsen' Jerusalénna' len beṇe' ca' zjanaque' le' txen na' gwdie' gan' ndil distritw Samaria len distritw Galilean'. ¹² Na' besežine' to cho'a yež dao' na' besechoj ši beṇe' chese'e yižgüe' da' nzi' lepra jasešague' Jesúsen'. Na' gosezie' zito' ¹³ na' goseṇe' zižje gosene':

—Maestrw Jesús, beyaše'laže' neto'.

¹⁴ Na' Jesúsen' cate' ble'ede' legaque' na' gože'ne':

—Le šjaya'ac lao bṡoz ca' cont yesene'e le'e še ba beyacle.

Na' goquen' lo neza' besyeyacde'. ¹⁵ Nach toe' cate' gocbe'ede' baḥ beyaque', na' bebi'e na' gwnie' zižje benxene' Diosen', ¹⁶ na' bzoa xibe' lao Jesúsen' bi'e le' yela' choxcen. Ben' ben ca' naque' to beṇe' Samaria. ¹⁷ Nach gwna Jesúsen':

—Beyona' ši beṇe'. ¿Ganxe beṇe' ca' yega? ¹⁸ ¿Toz beṇe' zito' nga bebi'e chonxene' Diosen'?

¹⁹ Nach gož Jesúsen' bena':

—Bezoža' beyej to šagüe' to güen. Ba beyacdo' da' chejnilažo' neda'.

Yela' chnabia' che Diosen'
(Mt. 24:23-28, 36-41)

²⁰ Na' beṇe' fariseo ca' gosenabde' le' batxen' yid ben' sela' Diosen' nabi'e nación Israelen'. Nach boži'i Jesúsen' xtiža'gaquen' gwne':

—Ca nac yela' gwnabia' che Diosen', bi naquen da' le'echo. ²¹ Nono cheyała' güe' diža' ne': “Gwṇa' nga chnabi'e”, o “Gwṇa' na' chnabi'e.” Le ba zoe' len le'e na'a chnabi'e.

²² Nach gože' beṇe' ca' zjanaque' le' txen:

—Gwžin ža cate' nale: “Šaca' na'a ba chnabīa' ben' gwsela' Diosen’”, perw bitw gac can' nablaže'len'.
²³ Yesenita' bene' yesi'e le'e: “Gwṇa'šc nga zoa ben' gwsela' Diosen’”, o “Gwṇa'šc na' zoa ben' gwsela' Diosen’.” Perw bitw ga'ole ben' yesi'e le'e ca'.
²⁴ Can' chac cate' chep yes, chsenin' doxen le'e yaban' zejzenez, lecze can' gac cate' žin ža yida' da' yoble, neda' naca' ben' gwsela' Diosen' golja' benačh. Yida' zejzenez na' yogo'lol bene' yesele'ede' neda'.
²⁵ Zgua'tec de da' zan da' cheyała' saca'zi'a na' bene' ca' že' na'a bitw yesejle'e chia'.
²⁶ Lecz ca' goc ca' tiemp che da' Noé, lecze ca' gac cate' ba zoa žin ža yida' da' yoble, neda' naca' ben' gwsela' Diosen' golja' benačh.
²⁷ Bene' gwnita' ca' tiemp che da' Noén' gosaše' gose'ej gosagüe' gosolaže' bosošagne'e na' bosošague' na' no xi'in che' cate' bžin ža gwyo'o Noén' lo' barcon'. Nach goc to yejwsio' juisyw. Na' gosebiayi' yogo' bene' ca' bi goso'o lo' barcon'.
²⁸ Lecz ca' goc ca' tiemp che da' Lot, bene' Sodoman' gose'ej gosagüe' gosote' bi da' de čhegaque', na' gosezi'e bi da' beseyažjde', na' gosaz gosa'ane', na' goson liže'.
²⁹ Perw na' žan' beza' Loten' Sodoman', Diosen' bene' cont byinj yi' na' azufre yaba na' gosebiayi' yogo'lole'.
³⁰ Can' gac cate' yida' da' yoble, neda' naca' ben' gwsela' Diosen' golja' benačh, na' yogo'lol bene' yesele'ede' neda'.

³¹ 'Na' ža caten' yida' še chda to bene' do yichjo'o che liže', na' xšinlaze' žen' lo' yo'o che', bi yeyetje' cont yotoben', con yoxonje'. Na' lecze ca' bene' chda do yixe', bitw gacde' yeyej liže'.

³² Le šjayza'laže' can' goc che no'ol che Loten'.

³³ Note'tez bene' chacde' gone' cont cbi saca'zie'

o cont nono yesot le', bena' cuiayi'. Na' note'tez be_{ne'} chzanlaže' cuine' saca'zie' o gate' ne chia' neda', ba de yela' mban che' toli toca_{ne}.

³⁴ 'Chnia' le'e, quinga gac caten' yida' da' yoble. Chope be_{ne'} zjadie' chesetase' toz cam. Toe' yeca'a Diosen' na' yetoe' yega'an. ³⁵ Na' chop no'ole nite' txen chesote', toe' yeca'a Diosen' na' yetoe' yega'an. ³⁶ Na' chope be_{ne'} nite' do yixe', toe' yeca'a Diosen' na' lecze yega'an yetoe'.

³⁷ Cate' gosende' diža' nga gose'e le':

—¿Gan' gac da' qui, Xanto'?

Nach Jesúsen' gože' legaque':

—Nga chonen che ben' že': “Gan' de be guat nan' chesežag šod ca'.”

18

Jempl che to no'ol güezeb len to juez mal

¹ Na' be'len Jesúsen' legaque' to jempl bsd blo'ede' legaque' cheyala' nita'teze' yesonchachlaže' yosol güiže' Diosen'. ² Na' gože' legaque':

—Gwche' to ciuda ga gwzoa to juez na' juezen' bi gwdape' Diosen' bala'an na' neca gwche'yichje' še chesazlaže' benachen' can' chonen'. ³ Na' ciudan' gwzoa to no'ol güezeb, na' goxje cheje' lao juezen' na' che'e le': “Ben yela' justis chia' len be_{ne'} chgue'ede' neda'.” ⁴ Ba goc sša bi chzenague' che', perw gwdechle bene' xbab, gwne': “Bitw chapa' Diosen' bala'an na' neca chi'yichja' še chesazlaže' benachen' can' chonan'. ⁵ Perw na' no'ol güezeb nga chone' neda' zed, na' na'a gaclena'ne' cont bich yide' yostoe' yela' chxenlaže' chia'.”

⁶ Nach gož Xanchon' legaque':

—Le gon xbab che dan' gwna juezen' ben' bi zej to licha. ⁷ Nacchxe gon Diosen' gwzenagche' che bene' ca' ba gwleje' cont zjanaque' xi'ine', bene' ca' chosol güiže' le' do ža do yel. ¿Gwleze' sša cont yosle' legaque' lo na' bene' ca' chesegue'ede' legaque'? ⁸ Chnia' le'e, Diosen' bedao'nez yosle' legaque' lo na' bene' ca'. Perw cate' neda' yida' yežlio nga yeto, neda' naca' ben' gwseła' Diosen' golja' benach, ¿ne' nita'ch bene' chesejnilaže' neda'?

Jempl che to bene' fariseo len to bene' güečhixjw

⁹ Gwnita' bal bene' gosacde' zjanaque' bene' güen lao Diosen' neche da' chesone'. Bene' ca' chesacde' bene' ca' yezica'chle bibi zjazaque' len Diosen'. Na' Jesús'en' bi'e jempl nga da' bcuišen bene' ca', gwne':

¹⁰ —Chope bene' ja'ac yodao' blao jasel güiže' Diosen', toe' bene' fariseo na' yetoe' bene' güečhixjw. ¹¹ Bene' fariseon' gwzeze' bol güiže' Diosen' na' con chonxen cuine', gwne': “Dios, neda' chona' yela' choxclen chio' bitw chona' cana' cheson yezica'chle bene'. Bitw chca'a bi da' de che bene' yoble, na' bitw chona' bichle da' mal. Bitw chata'lena' no'ol bi nac no'ol chia', na' neca naca' bene' mal can' nac bene' güečhixjw ni. ¹² Chope ni'a to xman chona' gwbas, na' yogo'lol da' chona' gan, chbecan' ši cuen na' chnežjua' to cuen che yodao'.” ¹³ Na' bene' güečhixjon' gwzeteze' zito'le, neca cheyaxjde' lis lagüe' yabale. Nach chbaže' lcho'e gwne': “Dios, beyaše'laže' neda' naca' bene' güen da' xinj.” Da'na'z da' gwna bene' güečhixjon'. ¹⁴ Na' chnia' le'e, Diosen' bezi'xene' che bene' güečhixjon' na' beyej liže' bibi xtole' gota'. Perw

bi goc ca' len bene' fariseon'. Le note'tez bene' chonxen cuine', Diosa' gone' cont si'e zto', na' note'tez bene' chzexjwlaže' lagüen', Diosen' gone' cont gacxene'.

Jasesane' bidao' lao Jesúsén'
(Mt. 19:13-15; Mr. 10:13-16)

¹⁵ Na' jasesane' bidao' lao Jesúsén' cont xoa ne'e yichjgacbe'. Na' cate' bene' ca' zjanaque' le' txen besele'ede' can' chesonen', gosedile' legaque'.
¹⁶ Perw na' Jesúsén' goxe' bene' ca' cont yeside' len bidao' chegaquen', na' gože' bene' ca' zjanaque' le' txen:

—Le güe' latje yesid bidao' ca' lagua' nga, bi gwžonle, le bene' ca' zjanac ca bidao' quinga, legaque' chosozenague' che Diosen' cont chnabi'e yichjlažda'ogüe'.¹⁷ Na' da' li žia' le'e, note'teze bene' bi yosozenague' che Diosen' ca cheson bidao' quinga cate' chosozenagbe' che xaxna'be', gwbat nabia' Diosen' yichjlažda'ogaque'.

To bene' gwni'a be'lene' Jesúsén' diža'
(Mt. 19:16-30; Mr. 10:17-31)

¹⁸ To bene' gwnabia' gože' Jesúsén':

—Maestrw, le' naco' bene' güen. ¿Bi cheyala' gona' cont gata' yela' mban chia' toli tocaņe?

¹⁹ Nach Jesúsén' gože'ne':

—¿Bixchen' žo' naca' bene' güen? Toz bene' güen zoa, na' len' Dios. ²⁰ Le' nezdó' da' none' mandadw goncho: “Bi gata'lenle no'ol bi nac no'ol chele o bene' byo bene' bi nac bene' chele. Nono gotle. Bi cuanle. Bi güe'le diža' güenlaže' che bene' lježle. Le gap bala'an xaxna'le.”

²¹ Na' gož ben' le':

—Yogo'lol da' quinga gwzolagua' chonczan' cate' ne' nactia' bidao'.

²² Nach cate' bene Jesús'en' xtižen' na' gože'ne':

—Zoa to da' ne' chyažjen gono', jayete' yogo' da' de chio', na' mechw dan' le'edo' chen, bnežjon bene' yaše'. Yeyoža' šejnilažo' neda' na' yo'o gaco' neda' txen. Nach še gono' ca', cate' yežino' yaba gan' zoa Diosen' da' zaca'ch gata' chio'.

²³ Perw na' bena' cate' beyož bende' diža' dan' gož Jesús'en' le', gocyāše'chgüede', le bene' gwñi'achgua goque'. ²⁴ Na' Jesús'en' gwñe'e bene' gwñi'ana' na' gože'ne':

—Leca zdebe naquen to bene' gwñi'a gwzenague' che Diosen' cont Diosen' nabie yichjlažda'ogüe'. ²⁵ Bedao'ch te to be xen be nzi' camello to lo' nag yeše' cled ca to bene' gwñi'a gwzenague' che Diosen' cont Diosen' nabie yichjlažda'ogüe'.

²⁶ Na' bene' ca' bosozenague' xtiže'na' gose'ene':

—¿Noxen' šjayzoa len Diosen' še ca'?

²⁷ Na' Jesús'en' gože' legaque':

—Da' bi gac gon beñachen', bitw nacho bi gac gon Diosen' len.

²⁸ Nach Pedroa' gože' le':

—Neto' ba gwlejjyichjto' yogo' da' de cheto' cont nacto' le' txen.

²⁹ Na' gož Jesús'en' legaque':

—Da' li žia' le'e, note'teze bene' ba gwlejjyichje' liže', xaxñe'e, biše', xo'ole' o xi'ine' neche chzenague' che Diosen' cont Diosen' chnabie yichjlažda'ogüe', ³⁰ yežlio nga yonežjo Diosen' le' da' nac da' zaca'ch, na' cate' yežine' yaban' gata' yela' mban che' toli tocañe.

*Da'yoble gosyixjue'e Jesúsen' ba zoa gate'
(Mt. 20:17-19; Mr. 10:32-34)*

³¹ Na' gwlejiže Jesúsen' beṇe' šižiṇw ca' gwleje' cont zjanaque' txen len le' na' gože' legaque':

—Na'a ba zejcho Jerusalénna' gan' gac yogo'lol dan' nyoj chia' dan' bosozoj da' beṇe' ca' gosoe' xtiža' Diosen' cani', neda' naca' bena' gwseła' Diosen' golja' beṇač. ³² Gaca' lo na' beṇe' ca' bi zjanac beṇe' Israel, na' yesezi'diže' neda', na' yesene' yela' ya' chia', nach yosoži'e xene' cho'alagua'. ³³ Yesot yeseyine' neda' na' yesote' neda', perw yeyon ža yebana' ladjo beṇe' guat ca'.

³⁴ Perw beṇe' ca' zjanaque' Jesúsen' txen bi gosejni'ide' dan' gože' legaque', le zjančhol yičhlažda'ogüen', da'nan' bi gosejni'iden'.

*To beṇe' lčhol beṇe' Jericó bele'ede'
(Mt. 20:29-34; Mr. 10:46-52)*

³⁵ Nach cate' ba zoa yežin Jesúsen' Jericó, to beṇe' lčhol chi'e chanezen' chṇabe' yosonežjo beṇe' le' con gaca' da' chesezande'. ³⁶ Na' bende' chesede beṇe' zan gan' chi'ena', na' gwṇabe' bin' chac. ³⁷ Na' gose'ene':

—Jesús beṇe' Nazaret chdie' lagu' nga.

³⁸ Na' bosya'adie' gwne':

—Jesús, xi'in diaža che da' rey David, beyaše'laže'sca neda'.

³⁹ Nach beṇe' ca' zjažialao lao Jesúsen' gosedile' beṇe' lčholen', gose'e le' cheyala' soe' šize, perw nachle bosya'adiache', gwne':

—Xi'in diaža che da' rey David, beyaše'laže'sca neda'.

40 Jesúsen' gwleze', nach bene' mandadw šjasexi'e bene' l̄cholen' lagüe'na'. Na' cate' gwbiga' beñe' l̄cholen' lao Jesúsen', nach gože'ne':

41 —¿Bi chaclažo' gonda' le'?

Na' bene' l̄cholen' gože'ne':

—Xana', benšca cont yele'eda'.

42 Jesúsen' gože'ne':

—Bele'e. Dan' chejnilažo' neda' bačh beyac yejlagon'.

43 Na' la' bele'ete beñe' l̄chola' na' gwda'ogüe' Jesúsen' benxene' Diosen'. Na' lecze ca' yogo' beñe' ca' besele'ede' can' goquen' gosonxene' Diosen'.

19

Jesúsen' na' Zaqueo

1 Nach Jesúsen' gwyo'e yež Jericó na' gwdeze' yešla'a ciudan'. 2 Na' zoa to bene' le' Zaqueo. Naque' bene' gwnabia' che bene' güechixjw ca', na' naque' bene' gwni'a. 3 Gwdiljwlaže' naclen' gone' le'ede' Jesúsen', perw bitw goc, le gwnita' bene' zan len Jesúsen' na' Zaqueon' goque' to bene' b̄checw dao'. 4 Da'nan' gwza'sese' gwdie' lao bene' ca' cont gwype' to lo yag da' zoa gala'ze gan' te Jesúsen'. 5 Perw na' cate' bžin Jesúsen' xan yaguen', gwñe'e lo yaguen' na' gože'ne':

—Zaqueo, bedao'nez beyetj. Cheyala' yega'ana' ližo' na'aže'.

6 Nach Zaqueon' beyetjsese' chebede'. Nach beče'e Jesúsen' liže'na' na' benxene' le'. 7 Perw na' bene' ca' zjanžague' len Jesúsen' cate' besele'ede' can' goquen', yogüe' gosenie' che Jesúsen' gosene':

—Ba zeje' zjazoe' to liž bene' güen da' xinj.

⁸ Nach Zaqueon' gwzeche' na' gože' Xanchon':

—Xana', gašje dan' de chia' gwnežjuan' bene' yaše'. Na' dan' ba gwca'a che bene', gwziya'a legaue' cont goseyixjwche' da' zcha'och ca dan' cheyala' yeseiyxjue', yonežjwgaca'ne' tap ca'te'le.

⁹ Na' Jesús'en' gože'ne':

—Na'aža ba ben Diosen' yela' mban chio' toli tocanē len che bene' lo' yo'o chio'. Na' da' li ba naco' xi'in diaža che da' Abraham lagüe dan' ba chejnilažo' Diosen' can' ben da' xozxta'ocho Abraham. ¹⁰ Ca nac neda', gwseła' Diosen' neda' golja' benach cont zedyediljua' note'tez bene' ba mbiayi', na' gwnežjua' legaue' yela' mban toli tocanē.

Jempl che ši bene' bnežjw xanguaque' legaue' mechwen

¹¹ Na' šlac ne' zjanžag bene' chosozenague' diža' dan' choe' Jesús'en', be'lene' legaue' to jempl, le ba nite' gala'ze Jerusalēnna' na' gosacde' la' solaote nabi'e nación Israelen'. ¹² Nach gwne':

—To bene' blao gwyeje' to yež zito' jene' dan' cheyala' gone' cont jaxi' lo' ne'e nabi'e yež che', le gosebeje'ne' nabi'e yež chen' cate' yežine'. ¹³ Na' cate' za' se'e, gwleje' ši moš che' na' bnežjue' to toe' mechwen. Nach gože' legaue': “Mechw nga gonele negosyw šlac bi zoa”. ¹⁴ Perw bene' gualaž chen' besegue'ede' le', nach cate' beyož gwze'e, gosesele' bene' lao xane'na' ben' gwnabia'che' lao yogüe', jaseže'ne': “Bitw chaclaže'to nabi'a' benga neto'.” ¹⁵ Perw la'czla' bi gosaclaže' bene' gualaž chen', bia'cze gwxi' lo' ne'e nabi'e. Nach cate' bežin lažen' da' yoble, bene' mandadw šja'ac xmose' bene' ši ca' lagüe'na', bene' ca'

bocua'anlene' xmechuen'. Goclaže' nezde' gaca' gosone' gan len mechw dan' bocua'anlene' to toe'.
 16 Beņe' nechw bžine' lagüen' na' gože'ne': "Xana', xmecho' dan' bocua'anleno' neda' benen gan ši ca'te'le ca dan' bocua'anon'." 17 Nach xanen' gože'ne': "Ba beno' da' güen. Naco' mos güen. Beno' can' cheyala' gono' len da' daon' bocua'anlena' le', da'nan' gona' cont nabi'o ši ciuda." 18 Na' beņe' gwchopen' bžine' lao xanen' na' gože'ne': "Xana', xmecho' dan' bocua'anleno' neda' benen gan gayo' ca'te'le ca dan' bocua'anon'." 19 Nach gože' le': "Le' nabi'o gayo' ciuda." 20 Nach bžin yetoe' lao xane'na' na' gože'ne': "Xana', nga de xmecho' dan' bocua'anleno' neda'. Ba blažečhačan' bay nga. 21 Bžeba' le' dan' naco' to beņe' znia. Chono' gan da' bi beno' žin na' chelapo' dan' gosaz beņe' yoble." 22 Nach gož xanen' le': "Dan' ba gwnao' ca' chlo'en napo' doła'. Naco' mos mal. Chacdo' naca' to beņe' znia, na' nezdo' chona' gan da' bi bena' žin na' chelapa' dan' gosaz beņe' yoble. 23 Na' še nezdo' chona' ca', ¿bičen' bi gwlejo' xmechuan' beņe' yoble cont yezian' len yichjen na'a ba bela'a?" 24 Nach gože' beņe' ca' zjaze cuite'na': "Yeca'ale xmechuan' dan' bocua'anlena'ne' na' gwnežjwlen ben' ba noxe' ši ca'te' ca dan' bocua'anlena'ne'." 25 Nach gose'e le': "Xanto', ba noxe'cze' ši ca'te' ca dan' bocua'anleno'ne'." 26 Nach gož beņe' gwnabian' legaque': "Chnia' le'e, ben' chon güen len dan' chnežjua'ne', gwnežjua'ne' da' zča'och, perw na' bena' bi chgone' žin dan' chnežjua'ne', yeca'a da' daon' noxe'na'. 27 Na' ca' nac beņe' ca' chesegue'ede' neda', beņe' ca' bi chesaclaže'

ṇabia'gaca'ne', le šjaxi'e na' gotlene' lagua' nga.”

*Gosonxene' Jesúsen' cate' beyo'e Jerusalén
(Mt. 21:1-11; Mr. 11:1-11; Jn. 12:12-19)*

²⁸ Na' cate' beyož be' Jesúsen' jempl nga nach gwze'e zeje' ciuda Jerusalén. ²⁹ Na' cate' ba zoa yesežine' yež ca' da' zjanzi' Betfagé na' Betania do gan' zoa ya'a da' nzi' Ya'a Olivos, na' gwsele' chop beṇe' ca' mandadw ben' zjanaque' le' txen, ³⁰ gože' legaque':

—Le šja'ac yež dan' chi' gala'ze, na' cate' žinlen' na' yeželele to burr dao' da'ba' yag, be nono ṇa' cuia. Le sežba' na' le che'ba' nga. ³¹ Še no ṇab bixchen' chsežleba', na' ye'lnē': “Xanto' chyažjde'ba'.”

³² Nach beṇe' ca' gwsela' Jesúsen' gosa'aque' na' besele'ede'ba' da'ba' gan' gož Jesúsen' legaque' ca'. ³³ Nach šlac cheseseže'ba', xamba' ca' gose'e legaque':

—¿Bixchen' chsežle burr daon'?

³⁴ Nach beṇe' ca' gwsela' Jesúsen' gose'e legaque':

—Xanton' chyažjde'ba'.

³⁵ Nach goseche'eba' lao Jesúsen' na' gosexoa xagaque' cože'ban' nach bosožie' Jesúsen'. ³⁶ Na' šlac zeje' ngüe'e nez beṇe' ca' zjanžag gosonxene'ne', na' goseyixjw no xagaque' lo nez cont blej burron' len. ³⁷ Nach ba zja'aque' gala'ze Jerusalénna' na' besežine' gan' yesyeyetje' Ya'a Olivos. Na' beṇe' ca' zja'aclene' le' gwzolao gosonxene' Diosen', zižje cheso'e diža' che yogo'lol yela' guac da' ba besele'ede' da' ben Jesúsen'. ³⁸ Nach gosene':

—¡Mbalaz rey chechon' ben' ba za' nga gwsela' Xancho Diosen' le' cont ṇabi'e! Cheyala' gonxencho

Diosen' txen len be_{ne}' ca' nita' gan' zoe'na', le ba bene' cont be_nachen' gac yesyenite' bin_{lo} len le'.

³⁹ Na' len be_{ne}' zan ca' zja'aclene' Jesúsen' zja'ac ba_l be_{ne}' fariseo. Nach to chope' gose'e Jesúsen':

—Maestrw, ben mandadw len be_{ne}' ca' za'ac len le' txen cont yesenite' šize.

⁴⁰ Nach boži'i Jesúsen' xtiža'gaquen', gwne':

—Chnia' le'e, šaca' be_{ne}' quinga nite' šize, yej quinga yesosya'an yesonxenen neda'.

⁴¹ Cate' bžine' ga_la'ze Jerusalén_{na}', gw_{ne}'e ciudan', na' bene' xbab che be_{ne}' lo' ciudan' na' gwchežyaše', ⁴² na' gwne':

—Šaca' la'ch na'aža šejni'ile nac gon_{le} cont soale bin_{lo} len Diosen', perw na'a ne' ngašen'. ⁴³ Gwžin ža cate' be_{ne}' ca' chesegue'ede' le'e yesone' to yež de yej da' šechjen ciudan' cont nono gac yoxonj. ⁴⁴ Na' yesote' le'e len xi'inle ca'. Na' yosyočinje' ciudan' na' yesoslase' yej ca'. Ca' gac lagüe da' bi chejle'le Diosen' ba gwsele' neda' laole nga.

Jesúsen' bebeje' be_{ne}' ca' cheson ya'a yodao' blaon'

(Mt. 21:12-17; Mr. 11:15-19; Jn. 2:13-22)

⁴⁵ Jesúsen' gwyo'e chyo'o yodao' blaona' na' gwzomagüe' bešaše' be_{ne}' ca' chesote' na' be_{ne}' chesa'o na'. ⁴⁶ Na' gože' le_{ga}que':

—Nyojcze Xtiža' Diosen' žan: “Ližan' naquen to latje gan' yesol güiž be_{ne}' neda'”, perw le'e ba ben_{len} ca to latje ga že' be_{ne}' gwban.

⁴⁷ Na' bsd blo'ede' be_{ne}' ca' že' yodao' blaona' yogo' ža. Na' b_xoz gwnabia' ca' na' be_{ne}' ca' chososed chosolo'e dan' bzoj da' Moisésen' na'

nochle bene' blao che bene' Israel ca', gosey-
iljwlaže' nacle yesone' yesote'ne'. ⁴⁸ Perw bi
besyeželde' nacle yesone' le' neche yogo' bene'
besyebechgüede' xtiže'na'.

20

Yela' gwnabia' che Jesúsen'
(Mt. 21:23-27; Mr. 11:27-33)

¹ To ža šlac chsed chlo'e Jesúsen' bene' ca' chyo'o
yodao' blaona' na' chyixjue'ede' diža' güen che
Diosen', besežin bχoz gwnabia' ca' na' len bene' gol
ca' chesenabi'e naciónna' na' bene' ca' chososed
chosolo'e dan' bzoj da' Moisés. ² Na' gose'e le':

—Gwnašč neto' bi yela' gwnabia' napo' chono'
da' qui, na' no ben yela' gwnabian' cont chonon'.

³ Na' boži'e xtiža'gaquen', gwne':

—Lecze de to da' nabda' le'e. Le našč neda' ⁴ ¿non'
gwsela' da' Juanna' bzoe' bene' nis? ¿Dios nan'
gwsele'ne', še benachen'?

⁵ Na' legacze' gose' lježe':

—¿Bi nacho? Še ye'chone' Dios gwsela' le', na' ye'e
chio': “¿Bixchen' ca gwyejle'le che'?” ⁶ Na' bi gac
ye'chone' benach gwsela' le', le yogo'te bene' že' nga
chesejle'e Diosen' gwsele' da' Juanna' be'e xtiže'na',
na' yosožie' chio' yej še ye'chone' ca'.

⁷ Na' gose'e Jesúsen':

—Bi nezeto' non' gwsela' da' Juan.

⁸ Nach Jesúsen' gože' legaque':

—Lecz ca' neda' bi yapa' le'e bi yela' gwnabian'
chonlenda' da' ca'.

Jempl che mos mal ca'
(Mt. 21:33-44; Mr. 12:1-11)

9 Na' be'e jempl nga bzejni'ide' bene' ca' chosozenag che', gwne':

—To bene' goze' to cue' xen yag uvas na' bocua'anen' lo na' bene' ca' yesonen' žin na' gwze'e gwyeje' zito' na' jasoe' sša. 10 Cate' bžin ža yosyotobe' cosešen', nach gwseła' to xmose' lao bene' ca' nac lo na'gaque' yag uvasen' cont yosyonežjue'ne' to tlacw coseš dan' yesyezi'en. Na' bene' ca' nac lo na'gaque' yag uvasen' goseyine' mosen' na' to ga'alze bosyose'ene' bibi goso'ene'. 11 Nach xan yežlion' gwsele' yeto mosen', na' lecze gosot goseyine' le' na' gosonde' le' zgot, na' to ga'alze bosyose'ene' bibi goso'ene'. 12 Na' xan yežlion' gwseła'che' mos gwyone, na' lecze gosotlate'ne' gosone'ne' güe', na' besyebeje'ne' gan' že' yag uvas ca'.

13 Na' xan yežlion' gwne': “¿Nacxe gona?” Nach beyone' xbab gwne': “Seła' xi'ina' ben' chacchgüeda', le šeca güesezi'e xtiža' le'.” 14 Perw bene' ca' nac lo na'gaque' yag uvasen' cate' be-sele'ede' xi'ine'na', gose' lježe': “Benga yega'anlene' yežlio nga cate' gat xe'. Le da gotchone' cont yega'anlenchon.” 15 Nach besyebeje' le' gan' že' yag ca' na' gosote'ne'.

Nach Jesús'en' gwñabde' bene' ca' zjanžaguen':

—¿Nacxe gon xan yežlion' len bene' ca' bocua'anlene' yežlio chen'? 16 Šeje' šjetue' legaque' na' yodie' yežlion' lo na' bene' yoble.

Na' bene' ca' že'na' cate' gosende' diža' quinga dan' be' Jesús'en' gosene':

—¡Catec da' mal juisyw dan' goc!

17 Na' Jesús'en' gwña'chgüe' legaque' na' gwne':

—¿Bixe zejen da' nga nyojen le'e Xtiža' Diosen'?
žan:

Yej dan' bi gosaclače' güen yo'o ca' yosočhine',
len ba naquen yej squin.

¹⁸ Na' ca nac yejna', note'tez bene' lažo' lo yeja' na'
cue'žošje', na' note'tez bene' chiže' yeja' cate' lažon'
na' gwšošjen le'.

Ca nac dan' cheyala' gaxjw

(Mt. 21:45-46; 22:15-22; Mr. 12:12-17)

¹⁹ Na' bene' ca' chososed chosolo'e dan' bzoj da'
Moisés na' b̄xoz gwnabia' ca' la' besyeyiljwlaže'te
nacle yesone' yesezene' Jesúsen', le gosacbe'ede'
Jesúsen' be'e jemplna' neče dan' bi chesejnilaže'
le'. Perw bibi gosone', le besežebe' bi yeson bene'
ca' že'na' bene' chesejle'e che Jesúsen'. ²⁰ Da'nan'
gosesele' bene' yosogüia yesene'e Jesúsen' cont
yesebeje'ne' diža' da' yosode'ede' cont yesagüe'
xya che' lao gobernador ben' chnabia'. Gosacde'
gone' xbab do laže'gaque' chosozenague' che'.
²¹ Nach gose'e le':

—Maestrw, nezeto' diža' da' cho'o na' da' chsed
chlo'edo' bene' zejen to licha. Nezeto' toz can'
chono' len note'tez bene'. Na' nezeto' diža' li cho'o
chsed chlo'edo' bene' can' chazlače' Diosen' gon-
cho. ²² Na' da'nan' zedenabeto' le' ¿naquen binlo
no čixjo da' cheyala' čixjwcho che ben' nac
la'zelagüe bene' gwnabia' ben' chi' Roma, še bi?

²³ Na' goče'e Jesúsen' gague do lažen' chese'ene'
ca', san chesaclače' yesagüe' xya che xtižen'. Na'
gože' le'gaque':

—¿Bixčhen' chačlače'le yoslačo'le neda' len
xtižan'? ²⁴ Le gwlo'e neda' to mechw. ¿No lao

dan' da' le'e mechw nga? na' ¿no la' dan' nyoj le'en ni?

Nach gose'ene':

—Che César ben' nac la'zelagüe beñe' gwnabia' ben' chi' ciuda Roma.

²⁵ Nach gože' legaque':

—Le gwnežjo beñe' gwnabian' da' nac che beñe' gwnabia', na' le gwnežjo Dios dan' nac che Dios.

²⁶ Na' bi gosezaque'de' yosolažoe' le' len xtižen' lao beñe' ca' že'na'. Na' besyebande' can' boži'e xtiža'gaquen', na' bich bi gose'ene'.

Cate' yesyeban beñe' guat ca'

(Mt. 22:23-33; Mr. 12:18-27)

²⁷ Na' lecze besežin bał beñe' saduceo gan' zoa Jesús'en'. Beñe' ca' chesene' beñe' guaten' bi yesyebane'. Nach gosenabde' le', gose'ene':

²⁸ —Maestrw, da' Moisés'en' bzoje' can' cheyała' goncho, gwne' še to beñe' byo gate' na' chzeb no'ol chen' perw na' nono bi güezeb chga'an, na' beñe' biše' ben' ba gota' cheyała' yošagna'lene' no'ol güezeba' cont yesenita' xi'in diaža che da' bišen'.

²⁹ Na' gosenita' beñe' gosac gaž biše'. Na' beñe' nechua' bšagne'e, na' gote' nono xi'ine' gwnita'.

³⁰ Na' beñe' gwchopen' bošagna'lene' no'ol güezeba', na' lecze gote' nono xi'ine' gwnita'.

³¹ Na' beñe' gwyona' lecze bošagna'lene' no'olen', na' lecze ca' goc len le'.

Na' ca' goc gosedaš beñe' gaža' bosošagna'lene' no'ola', na' ne toe' ca' gosezoa xi'ine' len le'.

³² Gwde gosat yogo'lol beñe' ca', nach got len no'ola'. ³³ Na' cate' yesyebane' ladjo beñe' guat ca', ¿nox beñe' ca' soalene' no'ola' ca' xo'ole'?, le yogo' beñe' gaža' bosošagna'lene' le'.

³⁴ Na' Jesúsen' boži'e xtiža'gaquen', gože' legaque':

—Beñe' ca' nita' lo yežlio nga chosošagne'e na' lecze chosošague' na' no xi'ingaue'. ³⁵ Perw na' beñe' ca' chaque Diosen' zjazaque' cont yosbane' legaque' ladjo beñe' guat ca' cont šjasyenite' len le' toli tocanē, caten' yesyežine' gan' zoa Diosen' bich yosošagne'e neca yosonežjo xi'ine' no'ol yosošagne'e. ³⁶ Bich yesate', le yesaque' ca angl ben' že' yaba, na' yesaque' xi'in Dios lagüe dan' ba bosban Diosen' legaque' ladjo beñe' guat ca'. ³⁷ Na' lecze da' Moisésen' bzoje' che dan' chesyeban beñe' guat ca'. Bzoje' can' gož Diosen' le' caten' bol güiže'ne' to lo yag yeše' dao' da' chey. Na' gwne' Xancho Diosen' naque' Dios ben' chonxen Abraham, ben' chonxen Isaac, na' ben' chonxen Jacob. ³⁸ Na' beñe' guat ca' bi chesonxene' Diosen', san beñe' zjamban. Na' yogo' beñe' ba gosejnilaže' Diosen', ne' zjambane' cont chesonxene' le'.

³⁹ Na' bal beñe' chososed chosolo'ede' ley dan' bzoj da' Moisés gose'e Jesúsen':

—Maestrw, binlo boži'o xtiža'gaquen'.

⁴⁰ Na' bich besyeyaxjde' bi yesenabde' le'.

*Criston' naque' xi'in diaža che da' rey David
(Mt. 22:41-46; Mr. 12:35-37)*

⁴¹ Jesúsen' gože' legaque':

—¿Nacxečen' chesena beñe' Criston' ben' yedenabi'e naque' xi'in diaža che da' rey David?

⁴² Cuin Daviden' bzoje' Xtiža' Diosen' le'e libr da' nzi' Salmos, gwne':

Xancho Dios gože' Xanan':

“Gwche'edo' cuita' nga nabia'cho txen,

43 na' gona' cont yogo' no chesegue'e le' yosozexjw
yichje' yosozengue' chio'."

44 ¿Nacxe gac nacho Criston' naque' xi'in diaža che
da' rey David? le' cuin Davin' gože' le': "Xana'".

*Xtolā' bene' ca' chososed chosolo'e dan' bzoj da'
Moisésen'*

(Mt. 23:1-36; Mr. 12:38-40; Lc. 11:37-54)

45 Bene' zan zjanžag chosozenague' cate' gože'
bene' ca' zjanaque' le' txen:

46 —Le gwsaca' cont bi gonle can' cheson bene'
ca' chososed chosolo'e ley dan' bzoj da' Moisés.
Legaque' chesyebede' chesaše' zjanyaze' lache' ton.
Na' chesyebede' chesonxen bene' legaque' cate'
chesyežague' lagüe ya'a. Chesyebede' chesebi'e
gan' chesebe' bene' blao cate' chja'aque' yodao' na'
cate' chac lni. 47 Na' chesyequ'e yo'o che no'ole
güezeb ca'. Na' cate' chosol güiže' Dios, sša cheso'e
diža' cont yesaque bene' leca chesonxene' Diosen'.
Bene' can' chesacche' castigw clél ca yezica'chle
bene' güen da' xinj.

21

To no'ole güezebe bnežjue' Diosen' xmechue'na'

(Mr. 12:41-44)

1 Šlac zoa Jesúsén' chyo'o yodao', gwñe'e na'
ble'ede' bene' gwñi'a ca' gosego'o xmechwgaquen'
lo' cajen' gan' chesegüe'e mechw che yodaon'. 2 Na'
lecze ble'ede' to no'ol güezebe bene' yaše' gwlo'e
čhop centav dao' che'na'. 3 Nach Jesúsén' gwne':

—Da' li žia' le'e, no'ol güezebe yaše' nga ba
gwlo'oche' mechw da' zaca'ch clél ca yogo' bene'
ca' yezica'chle. 4 Le yogo' legaque' chesegüe'e da'

checho'onen lo yela' gwni'a chęgaquen', perw no'ol nga, lo yela' yaše' yela' zi' che' gwlo'e yogo' da' de che', yogo' da' chachande'.

Gwžin ža yosyočinje' yodao' blaona'
(Mt. 24:1-2; Mr. 13:1-2)

⁵ Na' bal' bene' ca' chesejnilaže' che dan' chsed chlo'e Jesúsen' goso'e diža' catec xdan nac yodao' blaona' dan' gosonen' de yej xdan da' zaque' na' yo'on bi da' bosonežjo bene'. Nach Jesúsen' gwne':

⁶ —Ca nac da' quinga chle'ele ngan', žin ža cate' ne to yej dan' zjancua' nga ca yega'an zjancua' cože' lježen. Yogon' yosyočinje'.

Dan' gac cate' ba za' bagwze yeyož yežlion'
(Mt. 24:3-28; Mr. 13:3-23)

⁷ Na' gosenabde' Jesúsen' gose'ene':

—Maestrw, ědo bat gac dan' žo' nga? na' ěnac gac nezeto' cate' ba zoa gac yogo' da' ca'?

⁸ Na' gwne':

—Le gwsaca' cont nono siye' le'e. Le bene' zan yesaš yežlio nga bene' yesaclaže' yosolane' xlatja' nga, yesene': “Nedan' Criston' ben' gwlej Diosen' cont nabi'a”, na': “Ba za' gac juisyw.” Perw le'e bitw gwzenagle xtiža'gaquen'. ⁹ Na' cate' yenele chac gwdile nile na'le o yenele chi' žaš contr bene' ca' chesenabia', bi žeble, le zgua'tec da' quinga cheyala' gac. Perw gague lenna' nacho na'tec na'a yeyož yežlion'.

¹⁰ Nach gože' legaque':

—Na' yesedile to yež len yeto yež yoble na' to nación len yeto nación yoble, ¹¹ na' zan cuen ga xo'chgua na' zan latje lo yežlion' ga gata' gwbin na' cue' yižgüe', na' yesac yela' guac da' yesele'e bene'

le'e yaban' da' zaca' yesyebande', na' yesežebchgua beṇachen' neche dan' chac.

¹² Perw za' gac yogo' da' quinga cate' yesezene' le'e na' yosoči yososaque' le'e na' yesone' le'e lo na' beṇe' gwnabia' che yodao' chelen', na' yeseyixjue' le'e ližya. Na' yeseche'xoxje' le'e do lao rey na' do lao nochle beṇe' gwnabia' dan' chejnilaže'le neda'. ¹³ Na' cate' gac da' quinga güe'le xtiža'na'. ¹⁴ Na' le gon xbab zoacza' chaclena' le'e, nach cate' gacle lo na' beṇe' ca' bi cuec yičjle nacle yoži'ile xtiža'gaquen', ¹⁵ le neda' goṇa' le'e xbab len yela' sina' chian' cont yoži'ile xtiža'gaque' sin cbi bi gac yesene'. ¹⁶ Na' balle xaxṇa'le na' beṇe' biše'le na' biše' lježle na' beṇe' migw chele yesechje' yesone' le'e lo na' beṇe' chesegue'e le'e. Na' yesote' balle. ¹⁷ Na' yogo'ze beṇe' yesegue'ede' le'e dan' chejnilaže'le neda'. ¹⁸ Perw chape Diosen' le'e na' bitw güe'e latje cuiayi'le, ¹⁹ na' goṇe' yela' mban chele toli tocaṇe še soale gwyo gwčhejle yogo'lol dan' yesonde' le'e.

²⁰ Na' cate' le'ele ba besela'ac soldadw zan cue'ej cuit Jerusalenna' ben' yesedillen le'e, canan' nezele ba zoa cuiayi' ciudadan'. ²¹ Cana' beṇe' yesenita' Jerusalén cheyała' yosoxonje'. Na' beṇe' že' yezica'chle yež ga mbane Judea cheyała' šja'aque' do ya'adao'. Na' beṇe' yesenita' yixe', bi cheyała' yesone' xbab yesyeyo'e lo' ciuda. ²² Cana' gwnežjo Diosen' castigw che xtoła' beṇe' ca' že' Judean', cont gac can' nyojen le'e Xtiža' Diosen'. ²³ ¡Nyaše' zjanac no'ol ca' zjanao' xi'in na' no'ol ca' ne' chosoguaže' bidao' lo ža ca'! Leca yesesaca'zi' beṇe' ca' že' doxen Judean', le Diosen' ža'achgüe'

legaue'. ²⁴ Soldadw ca' yesote' bale' lo gwdile na' yebale' yeseche'xoxje' naci6n ca' dan' zjachi' doxen yežlion'. Na' beņe' ca' bi zjanaque' beņe' Israel yosyočinje' yo'o ca' dan' že' Jerusalėnna' na' yosolej yosošošen'. Perw ba bžia' Diosen' bia' žin ža cate' beņe' ca' bi zjanaque' beņe' Israel bich yesenabi'e naci6n Israel.

Yid Jesucriston' da' yoble

(Mt. 24:29-35, 42-44; Mr. 13:24-37)

²⁵ 'Ca nac gwbiž, bio' na' beljw ca', gac da' yebanecho len legaquen. Na' beņe' že' yežlion' yesaque' tole na' yesacžejlaže' catec sšag gon nidaon' chas chata' gaquen. ²⁶ Na' beņe' že' yežlio nga yesatte' šlat yesežebchgüe' dan' gaquen, le yogo' da' chle'echo le'e yaban' yesaquen ca' chac yežlion' cate' chxo'. ²⁷ Na' cana'ch beņe' že' yežlion' yesele'ede' neda' naca' ben' gwsela' Dios golja beņač, za'a to lo' bejw len yela' guac xen na' yela' beņe' zaca' juisyw chia'. ²⁸ Na' cate' solao gac da' quinga, le gončač laže'le na' le yebe. Ba zoa žin ža yida' da' yoble yebeja' le'e lo da' malen'.

²⁹ Na' Jesúsen' be'lene' legaue' to jempl, na' gože' legaue':

—Le na'šc can' chon yag yixgüigw na' bite'teze yag yoble, ³⁰ cate' chle'ele ba chebian laga' che'en dao' nach nezele bač zoa yela' tiemp ba. ³¹ Ca'czen' cate' le'ele ba chac da' mal ca' ba gwnia', cana'ch nezele ba zoa gwlo'e Diosen' yela' gwnabia' che'.

³² 'Da' li žia' le'e, bina' yenit diaža' che le'e nita'le na'a cate' yeyož gac yogo'lol da' ca'. ³³ Le'e yaba na'

yežlion' yesede čhen, perw ca nac xtižan', gague da' te cbi gac can' žanna'.

³⁴ Na' le gon xbab cont bi gacle beņe' lia na' beņe' borrašw na' cont bi soale yelaļ yežejele. Beņe' ca' yesac beņe' lia na' borrašw na' beņe' ca' yesyelaļ yesyežejde' bi yesebeze' batcan' gac yogo' da' quinga. ³⁵ Na' toz can' gac che beņe' že' doxen yežlion', yesac yogo' da' quinga cate' nono chon xbab. ³⁶ Perw yogo' ža le soa le cuez batcan' gac da' quinga na' le yol güiž Diosen' cont bibi gac čhele na' gac yedyesoale len neda' naca' ben' gwsela' Diosen' golja' beņach.

³⁷ Yogo' ža gwzoa Jesúsen' bsd blo'ede' beņe' yodao' blao, na' yogo' že' beyeje' lo ya'a da' nzi Ya'a Olivos. ³⁸ Na' yogo' zil besežin beņe' zan bosozenague' che' šlac bsd blo'ede' legaque' chy'o yodao' blao.

22

Bosoxi'e cont yesezene' Jesúsen'

(Mt. 26:1-5, 14-16; Mr. 14:1-2, 10-11; Jn. 11:45-53)

¹ Na' ba zoa gala' lni pascw caten' chesagüe' yetextil da' bibi levadura yo'on. ² Na' bχoz gwnabia' ca' na' beņe' ca' chososed chosolo'e ley dan' bzoj da' Moisésen' beseyiljue' nacle yesone' na' bi da' yosode'ede' cont yesezene' Jesúsen' na' yesote'ne', le besežebe' še cate' bi yesone yezica'chle beņe' legaque'.

³ Nach Satanásen' dan' chnabia' da' xigüe' ca' gwyo'o gwyazen lo' yichjlaždao' Judas Iscarioten' ben' goque' txen len beņe' šižiņw ca' zjanaque'

Jesúsen' txen, ⁴ na' gwyeje' jane'e b̄xoz gwnabia' ca' na' beñe' gwnabia' che beñe' ca' chesape' yodao'na' cont bosoxi'e nacle gone' gwddie' Jesúsen' lo na'gaque'. ⁵ Na' leca besyebede' na' gose'e le' yosonežjue'ne' mechw. ⁶ Na' Judasen' gw̄xenlaže' len legaque', na' gwzologüe' gw̄diljwlaže' nacle gone' gwddie' Jesúsen' lo na'gaquen' cate' bi že' beñe' zan.

Jesúsen' blo'ede' legaque' can' cheyała' yesone' šjasyeza'laže' dan' gaten'
(Mt. 26:17-29; Mr. 14:12-25; Jn. 13:21-30; I Co. 11:23-26)

⁷ Na' bžin ža gala' l̄ni caten' chesagüe' yetex-til dan' bibi levadura yo'o. Naquen ža cate' chesote' xila' dao' cont šjasyeza'laže' can' bosla Diosen' da' xozxta'ogaquen' lo na' beñe' Egipto ca'. ⁸ Na' Jesúsen' gwleje' Pedroa' len Juanna' na' gože' legaque':

—Le šja'ac na' le šjasin̄i'a dan' gagwcho lo l̄nin'.

⁹ Na' gose'ene':

—¿Ga che'ndo' šjasin̄i'ato'?

¹⁰ Nach gože' legaque':

—Le šja'ac na' cate' ba gwyo'ole ciudan' na' yežagle to beñe' byo no'e to che'e nis. Na' šejlenl̄ne' na' gan' yežinen' ¹¹ le ye' x̄an yo'on': “Maestron' že': Gonšco' to yo'o ga gagua' xše' že' l̄ni nga len beñe' ca' zjanaque' neda' txen.” ¹² Nach gwlo'ede' le'e to quart xen dan' zoa yichjen na'ale gan' de yogo' da' chyažjecho. Na' le gwsin̄i'a cont gagwcho na'.

¹³ Na' gosa'aque' na' yogo' can' gož Jesúsen' legaque' goc. Nach bososin̄i'e xše' že' l̄nina'.

14 Na' cate' ba_{ch} gwchi'e cho'a mesen' len postlw che' ca', 15 na' gože' lega_{que}':

—Leca gwzelaža' gagua' yela' guagw che l_{ni} nga len le'e na'a za' saca'zi'a na' gata'. 16 Chnia' le'e, na'a zelao gagan'. Cate'ch ba blo'e Diosen' yela' gwnabia' che'na', cana'ch gagan' da' yoble.

17 Na' gwxi'e vas gan' yože nis uvasen', na' beyož be'e yela' cho_xclen che Dios, nach gwne':

—Le sin', na' le ye'ej yogo'le late' güeje dan' yože lo' vas nga. 18 Chnia' le'e na'a zelao che'aja' vino che uvasen'. Cate' ba blo'e Diosen' yela' gwnabia' che'na', cana'ch ye'ejan' da' yoble.

19 Nach gwxi'e yetextilen' na' be'e yela' cho_xclen che Diosen' na' bzo_xjen' na' bnežjuen' lega_{que}'. Na' gože' lega_{que}':

—Da' nga cuerp chia' chzanlaža' ne_{che} le'e. Quinga gonle cont šjayze'ele bi zejen len le'e dan' yesote' neda'.

20 Na' lecze be_{xue}' vassen' cate' ba beyož gosagüe' xšen' na' gože' lega_{que}':

—Dan' yože lo' vas nga zejen da' cobe dan' gwna Diosen' gone' gaclene' le'e. Na' solao gone' can' gwne', le yesote' neda' na' gw_lalj x_{chenan}' ne_{che} le'e.

21 'Na' da' li ben' gw_{die}' neda' lo na' be_{ne}' ca' chesegue'e neda' nga chagwlene' neda' txen. 22 Na' gac chia' can' nžia' bia' gac, neda' naca' bena' gwse_{la}' Diosen' golja' be_na_{ch}, perw nyaše'chguaze nac ben' gw_{die}' neda' lo na' be_{ne}' ca'.

23 Nach gosezolagüe' gosenabe lježga_{que}' noen' gon da' malen' nac ca'.

Gosacyože' noe' nacch blao

24 Na' lecze gosezolagüe' gosacyože' noe' nacch blao. 25 Na' Jesúsen' gože' legaque':

—Nita' beñe' gwnabia' che to to nación ca' na' chesone' byen chosozenag beñe' chegaque', na' beñe' gwnabia' ca' chesaclaže' yesoe' beñe' diža' chegaque' zjanaque' beñe' güenchgua. 26 Perw le'e gague can' cheyala' gonle. Še no le'e nacchle beñe' blao, cheyala' gwzexjwlaže'le len beñe' lježle na' gonle ca beñe' xcuide' ben' bibi na' neze. Na' še no le'e chnabia'le, cheyala' soale gaclen lježle. 27 Le gon xbab noe' nacch beñe' blao, še bena' chi' cho'a mesen' o še xmosen' ben' chon mandadw che'. Nacbia'cze ben' chi' cho'a mesen' naccze' beñe' blaoch. Perw neda', zoa' cont gaclena' le'e la'cze naca' Xanle.

28 'Le'e biña' cuejyichjle neda' la'czla' beñe' zan ba chesegue'ede' neda'. 29 Na' ca nac Xan' ba none' chia' cont nabi'a txen len le', lecze neda' ba nona' chele cont nabi'a'le txen len neda'. 30 Na' gona' cont ye'ej gagwle txen len neda' cate' yela'le gan' nabi'a, na' cue'le cuita'na' nabi'a'le šižinw cuen beñe' ca' zjanaque' xi'in diaža che da' Israel.

*Jesúsen' gwne' Pedroa' bi chebe' še nombi'e le'
(Mt. 26:31-35; Mr. 14:27-31; Jn. 13:36-38)*

31 Nach Jesúsen' gwne':

—Simón, ben xbab chio', Satanásen' dan' chnabia' da' xigüe' ca' ba gwñaben gaco' lo ne'en cont gonen cuejyichjo' bich šejnilažo' neda'. Na' dan' gonen len le' naquen ca dan' chon beñe' caten' chdie' trigon' lo' rner. 32 Perw na' neda' ba gwñaba'

gac̄len Diosen' le' cont bi cuejyichjo' dan' chejni-lažo' neda'. Na' cate' ba betinjdo' xtolo'na', gono' chach̄ laže' bene' lježo' quinga.

³³ Nach Pedroa' gože'ne':

—Ba bechoglaža' sa'alena' le', gague ližya na'ze, san gatlencza' le'.

³⁴ Na' Jesúsen' gože'ne':

—Pedro, žia' le', biṇa' cuež jean' na'aže' cate' gac šon̄ ni'a bi chchebo' še nombi'o neda'.

Gwne' ba zoa yosoči yososaca' bene' legaque'

³⁵ Na' gože' bene' ca' zjanaque' le' txen:

—¿Byažjele bi da' byažjele cate' gwseła' le'e jatixjue'ele xtiža'na'? Gwseła' le'e sin cbi bia'le mechw, ne bzod, na' neca bia'le xelle.

Na' gose'ene':

—Bitw bi byažjeto'.

³⁶ Na' gože' legaque':

—Perw na'a še napple mechw, cheyała' gua'len, na' lecze ca' gua'le bzod. Na' še bitw bi spada chele de, le gote' xadon̄ chelen' cont si'le to spada.

³⁷ Chnia' le'e gonle ca', le gac chia' can' nyojczen le'e Xtiža' Diosen' žan: “Gosone'ne' ca bene' güen da' xinj.” Na' cheyała' gac yogo'lol dan' nyojen.

³⁸ Nach gose'ene':

—Xanto', gwna'šc nga noa'to' chope spada.

Na' gože' legaque':

—Güesaqueczen.

Jesúsen' chol̄ güiže' Diosen' latje gan' nzi' Getsemaní

(Mt. 26:36-46; Mr. 14:32-42)

³⁹ Nach gwze'e gwyeje' Ya'a Olivos can' ba yolagüe' chone', na' bene' ca' zjanaque' le' txen

zjana'ogüe' le'. ⁴⁰ Nach cate' besyežine' latjen' na' gože' legaque':

—Le yol güiž Dios cont bi gon gwxiyen' le'e gan.

⁴¹ Na' gwle'e len legaque' zito' ca gan' zelao žin to yej da' gwzala'cho, na' bzoa xibe' na' bol güiže' Dios, ⁴² gwne':

—Xa', benšca cont bi saca'zi'a na' bi yesote'nda' še ca' chazlažo', perw bi chnaba' gac da' žia' neda', san gac can' nao' le'.

⁴³ Na' to angl bene' za' yaba blo'elagüe' le' na' be'e le' fuerz valor. ⁴⁴ Na' šlac chžaglaochgüe' len yichjlažda'ogüe'na' gwzolao chžaglaochē' chol güiže' Diosen' beyačlojite' yes. Na' nis yes che'na' beyaquen ca tlabā' güeje chen dan' zjanaquen chelson, besyeyinjten lo yo. ⁴⁵ Na' bezeche', na' beyeje' gan' nita' bene' ca' zjanaque' le' txen, ble'ede' zjanite' chesetase' dan' leca gosacyaše'chgüede'. ⁴⁶ Na' gože' legaque':

—¿Bixchen' chtasle? Le chas, le yol güiž Dios cont bi gon gwxiyen' le'e gan.

Gosezene' Jesúsen'

(Mt. 26:47-56; Mr. 14:43-50; Jn. 18:2-11)

⁴⁷ Ne' choe'te Jesúsen' diža' cate' besežin bene' zan gala'ze gan' zoen'. Na' ben' le' Judas, ben' goque' txen len bene' šižinw ca' gwlej Jesúsen' cont zjanaque' le' txen, žialagüe' laogaque'. Na' gwbigue' gan' zoa Jesúsen' na' bnope' xague', perw gague do lažen' bene' ca'. ⁴⁸ Na' Jesúsen' gože' le':

—Judas, ¿chnopo' neda' cont gwodio'nda' lo na' bene' quinga? neda' naca' bena' gwsela' Diosen' golja' benach.

49 Na' cate' bene' ca' zjanaque' Jesúsén' txen be-sele'ede' can' gac che'na' nach gose'ene':

—Xanto', ¿gwyinto' bene' quinga spada cheton'?

50 Na' toe' gwdinen' mos che bꞑoz blaon', gwꞑhogtechgüe' nague' licha. 51 Perw Jesúsén' gože'ne':

—Bich gonle ca'.

Nach gwdane' nag mosen' na' beyone' le'. 52 Jesúsén' gože' bꞑoz gwnabia' ca' na' bene' ca' chesenabi'e bene' ca' chesape' yodao', na' bene' gole blao ca' chesenabia' nación Israelen' ben' zja'ac zjasexi'e le', gože'ne':

—¿Bixchen' nonle neda' ca to bene' gwban za'acle zedexi'le neda' len spada na' len yag?

53 Yogo' žaze gwzoa' len le'e chyo'o yodao' blaon' na' bitw gwzenle neda'. Perw na' ba bžin ža gonele neda' con can' chaclaže'le, na' ba bžin ža gac can' chaclaže' Satanásen' dan' chnabia' bene' ca' chesaš lo cholen'.

Pedroa' bi gwꞑchebe' še nombi'e Jesúsén'

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

54 Nach gosoxe' Jesúsén' na' goseche'ene' liž ben' naque' bꞑoz blao che nación Israelen'. Nach Pedroa' na'ogüe' Jesúsén' zito' zito'le. 55 Na' bosoxene' yi' chyo'o che bꞑoz blaona' na' gosebi'e cho'a yi'na'. Na' gwche' Pedroa' len legaque'. 56 Na' to no'ole güen žin ble'ede' chi'e cho'a yi'na' na' gwne'e le' na' gwne':

—Lecze len benga naque' txen len Jesúsén'.

57 Perw Pedroa' bitw gwꞑchebe' še nombi'e Jesúsén'. Gože'ne':

—No'ole, bitw nombi'ane'.

⁵⁸ Na' gocze šlož, yeto be_{ne}' ble'ede' Pedroa' gože'ne':

—Lenczo' naco' txen len be_{ne}' ca'.

Na' Pedroa' gože'ne':

—Bitw lena' len legaque'.

⁵⁹ Gwde to hor yetoe' gwne':

—Da' licze nac benga txen len Jesúsen', le naque' be_{ne}' Galilea.

⁶⁰ Na' Pedroa' gože'ne':

—Be_{ne}', bi ne_zda' bi dižan' cho'o.

Na' ne' choe'te Pedroa' dižan' ca', gwchež to jea.

⁶¹ Na' Xancho Jesúsen' gwye_{ch}je' gwne'e Pedroa' na' jayze'e Pedroa' diža' dan' gož Xancho_n' le' caten' gwne': “Bi_na' cuež jean' na'aže' cate' gac šone ni'a bi chebo' še nombi'o neda'.” ⁶² Na' Pedroa' beze'e leca gwchežyaše'.

Gosezi'diže' Jesúsen'

(Mt. 26:67-68; Mr. 14:65)

⁶³ Na' be_{ne}' ca' gose_{ch}e'e Jesúsen' gosezi'diže' le', na' gosot goseyine' le'. ⁶⁴ Na' boso_{ch}eje' to lache' lao Jesúsen' na' goseyine' le' na' gose'ene':

—Gw_neya'ašč non' chyin le'.

⁶⁵ Na' zanch diža' da' gosene' gosezi'diže' Jesúsen'.

Gose_{ch}e'e Jesúsen' lao be_{ne}' ca' chesenabia' nación Israelen'

(Mt. 26:59-66; Mr. 14:55-64; Jn. 18:19-24)

⁶⁶ Na' cate' gw_yeni', be_{ne}' gole blao ca' chesenabia' nación Israelen' na' b_xoz gw_nabia' ca' na' be_{ne}' ca' chososed chosolo'e ley dan' bzoj da' Moisés besežague' na' gosone' mandadw

gwyej Jesúsen' laogaque' gan' chesenabi'ena', nach gose'ene':

⁶⁷ —Gwnašč neto' še le' naco' ben' gwlej Diosen' cont nabi'o nación chechon'.

Nach gože' legaque':

—Šaca' nia' le'e neda' naca' Criston' ben' gwlej Diosen' cont nabia' nación chechon', bitw šejle'le chia'. ⁶⁸ Na' šaca' bi nabda' le'e, neca yoži'ile xtižan', neca gwsanlenda. ⁶⁹ Neda' naca' ben' gwseła' Diosen' golja' beňach. Na' na'a cui'a cuit Diosen' nabi'a txen len le', Dios ben' chnabia' doxen.

⁷⁰ Nach yogüe' yose'ene':

—¿Len' naco' dogualje Xi'in Diosen'?

Na' gože' legaque':

—Le can' žale nan' naca'.

⁷¹ Na' gosene':

—iNoch no chyažje no gagw xya che! Chio' ba benecho na'a chne' che Diosen' dan' že' ca'.

23

Bosocuiše' Jesúsen' lao Pilaton'

(Mt. 27:1-2, 11-14; Mr. 15:1-5; Jn. 18:28-38)

¹ Na' yogo'lol beňe' ca' gosezože'e na' goseche'ene' lao Pilaton' ben' nac gobernador.

² Na' gwzolao bosocuiše' Jesúsen' gosene':

—Ba gwchoglaoto' che benga cheyala' gate' dan' chde' chgo'oyele' nación Israelen' cont yesejle'e che' na' lecze chžone' chixjwto' da' cheyala' chixjwto' lao rey César. Na' lecze že' len' naque' Criston' ben' gwlej Diosen' cont nabi'e nación cheton'.

³ Nach Pilaton' gwnabde'ne' gože'ne':

—¿Len' naco' rey che beňe' Israel?

Nach Jesúsēn' boži'e xtižen', gwne':

—Can' gwnao'na', can' naquen.

⁴ Nach Pilaton' gože' b̄xoz ca' len yogo'loḷ beṇe' ca' zjanžag lagüe'na':

—Bibi n̄la'lagüe' še bi doḷa' nap benga.

⁵ Perw na' goseneche', gosene':

—Chde' chgo'oyeḷe' yogo' beṇe' že' distritw Judea nga yesejle'e dan' chsed chlo'ede'. Gwzolaogüe' b̄sed blo'ede' distritw Galilean' perw lencze nga baḥ chsed chlo'ede' ṇa'a.

Pilaton' gwsele' Jesúsēn' lao Herodes

⁶ Cate' bene Pilaton' can gosene', nach gwṇabe' še Jesúsēn' naque' beṇe' Galilea. ⁷ Na' cate' gocbe'ede' Jesúsēn' ze'e Galilean' gan' chnabia' gobernador Herodes, na' gwsele'ne' lao Herodes, ḷe ca hora' zoa Herodes Jerusalénna'. ⁸ Cate' Herodes ble'ede' ḷe' bebede', ḷe ba goc s̄ša che'nde' le'ede' ḷe'. Ba bende' xtiža' Jesúsēn' na' zoe' lez le'ede' gone' to da' zaca' yebande'. ⁹ Nach da' zan da' gwṇabde' Jesúsēn', perw ṇe to xtižen' ca boži'i Jesúsēn'. ¹⁰ B̄xoz gwṇabia' ca' na' beṇe' ca' chososed chosolo'e ley dan' bzoj da' Moisés gosezeche' gaḷa'ze na' bosocuiše'ne' len zan diža'. ¹¹ Na' Herodes len zan soldadw che' ca' gosezolaogüe' gosezi'diže'ne' na' gosonḷe' che'. Nach cate' beyož bosoguacue'ne' to lache' xdan juisyw, gosesele'ne' da' yoble lao Pilaton'. ¹² Na' žana' Pilaton' len Herodes gwzolao gosaque' migw, la'czḷa' cate' za' gac ca' besegue'e ḷježe'.

Gosechoglagüēn' gat Jesúsēn'

(Mt. 27:15-26; Mr. 15:6-15; Jn. 18:39-19:16)

¹³ Nach Pilaton' botobe' b̄xoz gwṇabia' ca' na' beṇe' ca' chesenabia' nación Israelen' len yezan

bene' yež, gan' chesone' yela' justisen'. ¹⁴ Nach gože' legaque':

—Le'e bedesanle benga lagua' nga, na' gwnale chde' chgo'oyele' bene' Israelen' yesone' contr go-biernna'. Neda' bach gwnabyožda'ne' lao le'e ca xyan' dan' chagwle che', ne to da' xinj ca chželda' še bi dan' none'. ¹⁵ Na' lecz ca' Herodes bitw bi xtole' bželde', na' besele' le' laoto' nga. Na' nachbia' bibi ben benga da' cheyała' gate'. ¹⁶ Na' na'a con gona' mandadw yeseyine' le' na' gwsana'ne'.

¹⁷ Gwne' ca', le yogüiz chsane' to bene' pres lo lni pascw chegaque'. ¹⁸ Na' yogo' bene' ca' že' bososye'e toz ca gosene':

—Chojtega benga gate' na' gwsano' Barrabásen'.

¹⁹ Na' Barrabásen' goseyixjue'ne' ližya da' bxie' gwdile lo' ciudan' na' goque' to bene' güet bene'. ²⁰ Na' da' yoble Pilaton' gwnabde' legaque' še gwsane' Jesúsena', ²¹ perw bososye'e zižjech gosene':

—¡Bde'e le'e yag cruz! ¡Bde'e le'e yag cruz!

²² Da' gwyon ni'a gož Pilaton' legaque':

—¿Bixe da' xinj nonen'? Ne to da' xinj bi chželda' še bi none' da' zaca' gate'. Na' gona' mandadw yeseyine' le' na' gwsana'ne'.

²³ Perw gosone' byen bososye'e yelate' zižjech gosenabe' gwde'ene' le'e yag cruz. Nach Pilaton' bzenague' chegaquen' ²⁴ na' gwchoglagüe' che' gac can' gosenabde' le'. ²⁵ Nach bsane' Barrabás ben' zjanyixjue' ližyan', ben' gosenabe' gwsane', la'czła' Barrabásna' goque' ben' bxie' gwdile na' bene' güet bene'. Na' Pilaton' bodie' Jesúsena' lo na'gaque' cont yesone' len le' ca chesacłaže'.

Bosode'e Jesúsen' le'e yag cruz
(Mt. 27:32-44; Mr. 15:21-32; Jn. 19:17-27)

²⁶ Na' šlac zjanche'ene' gan' yesote'ne' besyežague' to be_{ne}' yež Cirene le' Simón, za' zeze'e yi_xe'. Na' bosogüe'ene' yag cruz che Jesúsen' na' gweje' gwda'ogüe' Jesúsen'.

²⁷ Na' be_{ne}' zan zjana'ogüe' le' na' zjalen zan no'ole. Na' no'ol ca' gwzolao bososye'e gosebeže' che'. ²⁸ Na' Jesúsen' gwechje' na' gože' lega_{que}':

—No'ole Jerusalén, bitw cuežle chia'. Yejni'a le cuež chele na' che xi'inle. ²⁹ Da' li gwžin ža cate' yesene': “Mbalaz nita' no'ole güiž no'ole cono gw_xan na' nono bguaže'.” ³⁰ Cana' yesenablaže' yesebi_xe ya'a ca' cont chenen lega_{que}'. Yesenablaže' che' bdi_{nj} goten lega_{que}'. ³¹ Še yesot be_{ne}' neda' len bibi xto_{la}' de, inachxe yesonde' le'e nacle be_{ne}' güen da' xi_{nj}!

³² Na' lecze goseche'e chop be_{ne}' güen da' xi_{nj} cont bosode'e lega_{que}' le'e yag cruz can' gosone' len Jesúsen'. ³³ Na' cate' besežine' latje gan' nzi' Latje che Žit Yi_{chj} Be_{ne}' Guat, bosode'e Jesúsen' le'e yag cruzen'. Na' lecze bosode'e be_{ne}' mal ca' chop le'e yag cruzen' len le', toe' gwda' cuit Jesúsen' li_{cha}, na' yetoe' gwda' cuiten' robes. ³⁴ Na' Jesúsen' gwne':

—Xa', bezi'xen che be_{ne}' quinga chesegue'ede' neda'. Gague zjan_{ez}de' bin' chesone'.

Na' gosone' rifa cate' besyele'e xa_lane' cont gota'bia' noe' yechelen. ³⁵ Na' be_{ne}' zan besyežejde' le'. Na' be_{ne}' gwnabia' chega_{que}' ca' gosonle' che', gosene':

—Yezica'chle bene' bosle'. Še da' li naque' Criston' ben' gwlej Diosen' yedenabi'e, ¿bixchen' bi chosla cuine'?

³⁶ Nach soldadw ca' lecz ca' gosonle' che'. Gosebigue' gała'ze gan' zoa yag cruzen' na' bosonežjue'ne' vino zichj. ³⁷ Nach gosene':

—Še len' naco' rey che bene' Israel, bosla cuino'.

³⁸ Na' yichj yag cruz che'na' gwzoa to dan' nyojen, žan: “Bengan' rey che bene' Israel.” Na' byojen diža' griego, diža' latín na' diža' hebreo.

³⁹ Na' to bene' mal ben' da' le'e yag cruz cuit Jesúsen' lecze gwzi'diže'ne', gože'ne':

—Še le' naco' ben' gwlej Diosen' cont yedenabi'o nación chechon', bosla cuino' na' lecze bosla neto'.

⁴⁰ Na' ben' yeto gwđile' bene' lježen' gože'ne':

—¿Bi chžebo' Diosen'? Chio' ba da'cho le'e yag cruz cont gatcho can' da' le', ⁴¹ na' dan' gat chio' naquen licha cont si'cho castigw che xtoła'chon'. Perw benga, bitw bi doła' nape'.

⁴² Nach gože' Jesúsen':

—Jesús, šjayza'laže'go' neda' cate' žin ža nabi'o.

⁴³ Na' gož Jesúsen' le':

—Da' li chnia' le', na'aža soaczo' len neda' gan' zoa Diosen'.

Can' goc caten' got Jesúsen'

(Mt. 27:45-56; Mr. 15:33-41; Jn. 19:28-30)

⁴⁴ Na' cate' bžin guagwbiž goc chol doxen lo yežlion' bžinte do cheda šone. ⁴⁵ Bitw bseni' gwbižen'. Na' ca nac lache' dan' ze lo' yodao' blaona', bcheza' gacholen. ⁴⁶ Nach Jesúsen' bosye'e zižje gwne':

—Xa', chon cuina' lo nao', bezi' spiritw chia'na'.

Na' beyož gwne' ca' gote'.

⁴⁷ Na' cate' ble'e xan soldadon' can' goquen',
benxene' Diosen' na' gwne':

—Da' licze benga goque' bene' gwyej to licha.

⁴⁸ Na' bene' zan bene' besežag besele'ede' can'
goc na' yogo'lole' besyeya'aque' chesebaže' lcho'e
gosacde' da' juisyw ba goc. ⁴⁹ Na' yogo' bene'
ca' zjanombia' Jesúsén', na' len no'ol ca' zjanao'
le' caten' beze'e Galilean', gosezeche' zito'le be-
sele'ede' da' ca' goquen'.

Bosocuaše' Jesúsén'

(Mt. 27:57-61; Mr. 15:42-47; Jn. 19:38-42)

⁵⁰ Na' zoa to bene' ciuda Arimatea gan' mbane
Judean' na' le' José. Naque' txen len bene' ca'
chesenabia' nación Israel, na' naque' to bene' güen
bene' zej to licha. ⁵¹ Ba zoe' chbeze' batcan' so-
lao nabia' ben' sela' Diosen'. Bitw bene' txen len
bene' ca' gosechoglagüen' yesote' Jesúsén'. ⁵² Bena'
gwyeje' lao Pilaton' jaynabe' cuerp che Jesúsén'.
⁵³ Na' beletje'ne' le'e yag cruzen' na' btobe' le'
to lache' xen na' la' bcuaše'te' le' to lo' bloj da'
nche'ene' le'e yej. Na' naquen to ba cobe ga nono
na' yosocuaše'. ⁵⁴ Na' yogo' da' ca' goc ža cate'
chososini'e che ža che Dios. Na' ba bžin hor cate'
cheyala' yosocueze' bite'teze žin o mandadw da'
chesone'.

⁵⁵ Na' no'ol ca' za'aclene' Jesúsén' cate' gwze'e
distritw Galilean' ja'aclene' Josén' cont besele'ede'
ba che Jesúsén' gan' gwxo'a cuerp che'na'. ⁵⁶ Nach
gosa'aque' na' gosone' to da' chla' zix da' yeseyebe'
cuerp che Jesúsén'. Na' ža che Diosen' gosenita'cze
can' ža ley chegaquen', bibi žin gosone'.

24

Jesúsen' bebane' ladjo bene' guat

(Mt. 28:1-10; Mr. 16:1-8; Jn. 20:1-10)

¹ Bał dmigw ja'ac no'ol ca' da' yoble cho'a bloj gan' bosocuaše' Jesúsen' na' gosoxe' da' ca' ba gosone' da' chla' zix, na' yebał no'ole ja'aclene' legaque'. ² Na' cate' besežine' na' besele'ede' ba bga'a yejen' dan' bosode'e cho'a blojen'. ³ Na' gosoe, na' bitw besyeželde' cuerp che Xancho Jesúsen'. ⁴ Šlac zjanite' chesyebande' che da' quinga, besele'ede' chope bene' zjazecha cuitgaquen' zjanyaze' lache' da' chactitchgua. ⁵ Na' no'ol ca' besežebe' na' bosochegue' yichjgaquen' gosene'e lo yole. Nach bene' ca' gose'e no'ol ca':

—¿Bixchen' cheyiljwle to bene' mban nga ladjo bene' guat? ⁶ Notoch no nla' nga. Ba bebane' ladjo bene' guat na' mbancze'. Le šjayza'laže' can' gwne' cate' ne' zoale Galilean'. ⁷ Gwne' le' naque' ben' gwsela' Diosen' golje' beňach. Na' gwne' cheyala' gaque' lo na' bene' mal ca' cont yesote' le' yosode'ene' le'e yag cruz, na' yeyon ža yebane' ladjo bene' guat.

⁸ Na' no'ol ca' jasyeze'ede' xtiže'na'. ⁹ Na' besyeya'aque' cho'a blojen' na' jasedixjue'ede' yogo' da' ca' len postlw ca' šnej na' len yezica'chle bene' ca' nita' txen len legaque'. ¹⁰ Na' no'ol ca' jasedixjue'ede' postlw ca' zjanaque' bene' quinga: María bene' Magdala, na' Juana, na' María xna' Jacobo, na' len yebałe no'ole. ¹¹ Na' postlw ca' bitw gosejle'e che no'ol ca', gosacde' chesenazen'.

¹² Perw na' Pedroa' la' gwzoža'te' na' la' gwza'seste' bžine' cho'a blojen' na' bcheque'

na' ble'ede' lache' ca' zjachin' lo yo. Na' beze'e bebanchgüede' che da' ca' ble'ede'.

Blo'elao Jesús'en' chop bene' ca' šlac zja'aque' Emaús

(Mr. 16:12-13)

¹³ Na' lecze ža dmigwna' chop bene' ca' gosaque' Jesús'en' txen ja'aque' yež dan' nzi' Emaús, do šnej mil metr zito' par Jerusalénna'. ¹⁴ Na' legacze' bosošalje' che yogo' da' ca' ba goquen'. ¹⁵ Ne' chesone' xbab na' ne' chesoe'te' diža' chen cate' Jesús'en' gwbigue' len legaque' na' gwza'lene' legaque' txen, ¹⁶ perw bitw gosacbe'ede' noxen' zejlen legaque'. ¹⁷ Nach gože' legaque':

—¿Bi dižan' choe'le šlac ngo'ole nezen'? ¿Bixchen' chacyaše'le?

¹⁸ Na' toe' le' Cleofas boži'e xtižen' gože'ne':

—¿Nacxe chaquen' gwza'o Jerusalén na' biña' gacbe'edo' da' ca' ba goc lo' ciudan'? ¿Tozo' le' zo' Jerusalén na' biña' gacbe'edo'!

¹⁹ Na' Jesús'en' gože' legaque':

—¿Bi goquen' žale ca'?

Nach gose'ene':

—Dan' goc che Jesús bene' Nazaret. Goque' to bene' gwseła' Dios cont be'e xtižen', na' Diosen' len benachen' besyebede' yeła' guac chen' dan' blo'e na' diža' dan' be'e. ²⁰ Perw na' bxož gwn- abia' checho ca' len bene' ca' chesenabia' nación chechon' gosone' le' lo na' bene' ca' gosechoglagüe' che' cheyala' gate', na' bosode'e le' le'e yag cruz. ²¹ Ba goc šone ža na'a goc da' quinga. Na' neto' gwzoato' lez Diosen' gwsele' le' cont yebeje' nación checho lo da' malen'. ²² Na' no'ol ca' zjanac

txen len neto', ba_{le}' goso'e diža' da' chebaneto', ja'aque' cho'a ban' be'e ²³ na' bitw besyeželde' cuerp che'na'. Cate' besyela'aque' gosene' be-sele'eda'ogüede' angl be_{ne}' gose'e lega_{que}' ba be-bane' ladjo be_{ne}' guat ca'. ²⁴ Na' lecze to chop be_{ne}' byo be_{ne}' ca' zjana_{que}' txen len neto' ja'aque' cho'a ban' na' be-sele'ede' cayanen' gosena no'ol ca' naquen, perw bi be-sele'ede' Jesúsen'.

²⁵ Na' gož Jesúsen' lega_{que}':

—Nyaše'chguaze le'e bi chejni'ile na' bi chejle'le yogo' dan' bosozoj be_{ne}' ca' gwsela' Diosen' goso'e xtižen' cani'. ²⁶ ¿Chaquale bi cheyala' gac dan' ba goca? Cristo ben' gwlej Diosen' cont yedenabi'e, benen byen gwzaca'zi'e yogo' da' quinga ba goc, perw yeyoža' la'laon naque' be_{ne}' zaca' juisyw.

²⁷ Na' be'e diža' len lega_{que}' bsd blo'ede' lega_{que}' yogo' dan' nyoj che'na' le'e Xtiža' Diosen', gwzolaoteque' len dan' bzoj da' Moisés na' len dan' bosozoj yezica'chle be_{ne}' gwsela' Diosen' goso'e xtižen' cani'.

²⁸ Na' besežine' gala'ze yežen' gan' zja'aquen', na' Jesúsen' bene' ca' chon be_{ne}' šejch yelate' zito'ch. ²⁹ Perw be_{ne}' ca' gosone' byen yega'a_{ne}' len lega_{que}', gose'ene':

—Yega'a_{nczo}' len neto', le ba chal' na' ba nac bagwže' par šejo'.

Na' gwyo'e cont yega'a_{nlene}' lega_{que}'. ³⁰ Na' šlac zjachi'e cho'a mesen' txen, Jesúsen' gwxi'e yetextilen' na' be'e yela' choxclen che Diosen' na' bzoj-_{jen}' bnežjuen' lega_{que}'. ³¹ Cana'ch gosacbe'ede' le'na'. Na' šlac ne' nite' ca' con be_{nite}'. ³² Nach gose' lježga_{que}':

—Leca bebe lažda'ochon' cate' be'lene' chio' diža' chanez na' bsed blo'ede' chio' can' nyojen che' le'e Xtiža' Diosen'.

³³ Na' la' besyeya'actie' jaya'aque' Jerusalénna' na' besyežine' gan' zjandop zjanžag postlw ca' šnej len beņe' ca' yezica'chle. ³⁴ Na' beņe' šnej ca' gose'e beņe' ca' za' besyežin:

—Da' licze ba beban Xanchon'. Ba blo'elagüe' Simónna'.

³⁵ Nach beņe' ca' chop gose'e legaque' dan' goc šlac zjangüe'e nezen', na' gose'e legaque' besyeyombi'e le' cate' bzoxje' yetextilen' cont yesagüen'.

*Jesúsen' blo'elagüe' beņe' ca' zjanaque' le' txen
(Mt. 28:16-20; Mr. 16:14-18; Jn. 20:19-23)*

³⁶ Ne' chesoe'te' dižan' ca', cate'cze gwzecha Jesúsen' gachol. Nach gože' legaque':

—Le soa binlo len xbab dan' yo'o lo' yichjlažda'olen'.

³⁷ Perw leca besežebe' na' besyebande', gosacde' še chesele'ede' bxin che da' beņe' guata'. ³⁸ Nach Jesúsen' gože' legaque':

—¿Bichen' chacle tole? na' ¿bichen' chonle xbab ca' lo' yichjlažda'olen'? ³⁹ Le na'šč ni'a na' nga cont gacbe'ele nedan'. Le can neda' cont gacbe'ele. Šaca' naca' beņe' guat, bi nac žit bela' chia' ca dan' chle'ele nga.

⁴⁰ Beyož gwne' ca', blo'ede' legaque' ni'a ne'e ca'.

⁴¹ Na' legaque' biņa' yeyož yesejle'e catec chesyebande' na' catec chesyebede'. Nach Jesúsen' gože' legaque':

—¿De late' da' gagua'?

⁴² Nach bosonežjue'ne' late' yid bel gagüe' na' late' chixe beser da' yože šina'ba'. ⁴³ Gwxi'en na' gwdagüen' laogaquen'. ⁴⁴ Nach gože' legaque':

—Ba gwnia' le'e cate' ne' zoalena' le'e cheyała' gac yogo'lol da' ca' bsi' Diosen' xneze zjanyoj chia' le'e ley dan' bzoj da' Moisés, na' le'e dan' bosozoj bene' ca' goso'e xtiža' Diosen' cani', na' lecz ca' da' nyoj le'e Salmos ca'.

⁴⁵ Nach ben Jesús'en' cont gosejni'ide' da' ca' zjanyoj che' le'e Xtiža' Diosen'. ⁴⁶ Na' gože' legaque':

—Benen byen goc da' quinga cont goc can' nyojen žan neda' gata' na' yebana' ladjo bene' guat yeyon ža, neda' naca' Cristo ben' gwlej Diosen' yedenabia'. ⁴⁷ Na' le'e cheyała' güe'le xtiža'na' len bene' že' yogo' nación. Solaotecle güe'len Jerusalén. Güe'le xtižan' nale cheyała' yesyetinje benachen' xtola'gaquen' cont Diosen' yezi'xene' chegaque'. ⁴⁸ Le'e cheyała' güe'le diža' che da' quinga ba ble'ele dan' ba goc chia'. ⁴⁹ Na' lecze seła' Spiritw che Xa' Diosen' yedesoan len le'e can' gwnen'. Na' le yega'an lo ciuda nga na'a cuezle gon Xa' Diosen' le'e yela' guac da' za' yaba.

Beyep Jesús'en' yaba

(Mr. 16:19-20)

⁵⁰ Na' Jesús'en' gwche'e legaque' ja'aque' gan' chi' yež dan' nzi' Betania na' gwlis ne'e gwñabde' Diosen' gone' cont nite' mbalaz. ⁵¹ Na' ca beyoža' beyepe' yaban'. ⁵² Na' bene' ca' gosaque' le' t xen besyega'ane' yešlož dao' gosonxene' Jesús'en' nach jaya'aque' Jerusalénna', chesyebchgüede'. ⁵³ Na' gwnita'teze' lo' yodao' blaona' chesonxene' Diosen'. Da' na'ze chzoja' na'a.

**Diža' güen che ancho Jesucristo
New Testament in Zapotec, Zoogocho
(MX:zpq:Zapotec, Zoogocho)**

copyright © 1987 Wycliffe Bible Translators, Inc.

Language: Zapotec, Zoogocho

Translation by: Wycliffe Bible Translators, Inc.

Zapoteco, Zoogocho [zpq], Mexico

Copyright Information

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Zoogocho

© 1987, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 22 Feb 2024 from source files
dated 29 Jan 2022
de7d40fb-3909-53d8-8bea-744cf1ce0e41